

# KA INDIRA GANDHI



*Da*

U PASCAL MALNGIANG





# **Ka Indira Gandhi**

*da*

**U PASCAL MALNGIANG**

**La pynmih da**

**U Bab W. Rossman Nongkyarib**

*Kharmalki*

*Shillong - 793001*

**1985**

***Ja ka hok longtrai la tyngkai***





"Lada nga lap noh mynta ka sagi,  
Man i synjaw snam jong nga  
In sa aibor aisor shuh shuh  
Ya ka Ri"  
—Indira Gandhi.

---

U PASCAL MALNGIANG (26), u Samla ba dang pule u la lum thup fa ka kot *Rwai ko paid u Blei* (1978), u fa noh synkhang fa ki jingrwai jong u sha ka *Jam sur ka Ri* Volume I-III (1980-82), *Ka Lynti Bneng* 1980), *Sing a New song*, Bombay (1980-83), *Sing Jor Joy* (1980)

U la thoh fa *Ki nongmait shrah* (1983), *Wat khum ia u paid jong nga* - ka jingim u Martin Luther King (1983).

Ha une u snem rakhe burom fa ki samla u la pynmih fa *U Apostol ki Khasi-Pnar* ka jingim u Rev. Vendrame (1985), *Ban ieid ka pynmong* (1985), *Ka ieid ha ban da blej* ka jingim ka Mother Teresa (1985), u *Pope John Paul II* (1985) bad kiwei.

Shen yn sa pyllait paidbah ruh fa ka kot jingrwai ba fa thoh hi ma u : *Jesus Lord, The Healer* (Kevin Mayhew Ltd, London), *Ka Snap ki longshuwa*, *U Khun ka Ri* bad kiwei.

(Ia kine ki kot lah ban  
foh na u Nongthoh hi)

---

## **BAN PYRTO IEID**

*Ka Indira Gandhi ka la long ka Myntri Rangbahduh ka Ri India naduh ka 24 tarik u kyllalynekot 1966, haduh ka 22 tarik u lber 1977 nangta pat naduh ka 14 tarik u kyllalyngkot 1980 haduh ba kan da khlad noh ha ki kuli bakthang jong ki lehnoh bad ki thrang snam kiba kwah ban pynpait pynpra ia ka Ri ha ki lyngkhot lyngkhai. Ka Indira Ganahi ka la aiti ia la ka jingim na ka bynta la ka jong ka Ri, dei namar kane ka daw ba mangi ki khun samla ka Ri ngi sngewdei ban pyrto ieid ia ka.*

*Hashurva, nga la thoh ruh shaphang ka Jingim jong u Rev. Martin Luther King ( Wat khum ia u paid jong nga ), Ka Jingim jong u Rev. Constantine Vendrame (U Apostol ki Khosi-Pnar) ka jingim u Pope John Paul II bad ka jingim jong ka Mother Teresa (Ka leid haban da Biej), mynta pat ngi ioh sa kane kawei ka thup jingiathuhkhana bashisha shaphang ka Jingim jong ka Indira Gandhi. Ha kaba thoh ia kine ki biography, nga don ia ka jingangnud ba ki parari kin ioh ia ki jingtip bad kin lah ban sot ia ka jingpyrsad mynsiem na ki ha kaba shakri ia ka Ri bad ka Jaitbynriew. Ka jingkylli kaba dei ban ktik ia ngi katba ngi dang pule ia kine ki biography ka long : "Lada ma ki ki lah, balei ngi ngim lah !" Nga kyrmen ba kine ki jingiathuhkhana bashisha kin pynmyntoi ia ki nongpule baroh.*

*Ka pateng bynriew jong ngi ka don ia ka jingtahkhlieh kaba khia na ka bynta ka Ri bad ka jaitbynriew. Ngiki samla ngi long ka lashai jong ka Ri. Nga kyrmen ba kane ka jingim shaphang ka Indira Gandhi kan ai mynsiem khamtam eh ia ki samla samhoi ha Ri.*

*Ha kaba thoh ia kane ka thup jingiathuhkhana nga la ioh ia ki jingpynshlur na ki dong bapher, na ki rangbah rangsan bad ki para samla samhoi. Nga sngewdei ban da pynpaw paidbah hangne ia ka jingsngewnguh kaba khraw ia i Kong Margarette Mawlong, Director of Public Instruction, Shillong, iba la pule ia ka typescript bad iba la kynthoh sngewtynn timer ruh halor kane ka kot. Nga sngewnguh ruh ia u Prof. J.K; Tariang bad u Rangbah L.H, Pde,*

*M.C.S., kiba la pule bad kiba la ia pynnoh lem ia u synñiang ha kaba pynbeit bad pynbiang ia kane ka jingthoh. Ka jingpynshlur lem jong u Rangbah Peter Marbaniang M.D.C, Chairman ka East Khasi Hills District Council, u Rangbah Billy P. Domes bad ka jingkloi ban iarap lem jong u Rangbah Hughlet Warjri bad u Rangbah Kosterwell Majaw ka la iarap ia kane ka kot ba kan mih bad paw pyrthei ha ka por kaba biang eh. Nga sngewnguh ruh ia u Dr B.B. Dutta, u General Secretary ka M.P C.C (I) ra ka bynta ka jingiarap ha kaba pynmih ia kane ka kot.*

*Nga sngewdei ban ai ka jingkhublei kaba kyrpang ia u Rangbah T. Marbaniang, u trai ka Scorpio Press, Mawkhar, uba la leh shitom katlah katiai ban pynioh ia ka dur jong ka Indira ha ka sop hakhmat, bad uba la al jingmut lem ia nga ha ki liang hapher. Kane ka jingsbun jong u ka la aimynsiem shikatdei eh ia nga. Khublei shibun eh ia phi Bah Ther bad ia ki nongtrei jong phi. Ha kaba phai sha ki proof sheets pat, i Kong Rosa D. Pathaw i la pynpeit pynjngoh lem da ka jingminot. Khublei shibun eh ia phi !*

*Khatduh iawai, nga pynpaw ia ka jingsngewnguh ia i Pa bad i Mei jong nga kiba la buddien ia kane ka kot naduh ba nga dang sdang ban thoh haduh ba kan da mih na Press. Ka bor mynsiem kaba ki la bsiap ha nga, ka long kaba nga da tyngkai eh. Ki hynmen ki para jong nga baroh ruh ki la noh lem la i buit i bor ha kaba wanlam ia kane ka kot. Khublei shihajar nguh ia phi baroh !*

*Nga pdiang sngewbha ia kino kino ki jingai jingmuf na phi ki nongpule ban nang kham pynbiang shuh shuh ia kiei kiei kiba duna.*

## KHUBLEI

*Kharmalki,  
Shillong 793001  
11-11-1985.*

**Pascal Malngiang**

## **“SHIKYNTIEN”**

**Da ka jingsngewburom ia ka jingtrei minot I Bah Pascal Malngiang nga kwah ban buh ia kine ki kyntien harum halor ka kot “Ka Indira Gandhi” kaba ma i i la thoh.**

**1. I Bah Pascal Malngiang i la lum thikna ia ki jingtip baroh shaphang ka Indira Gandhi naduh ka longing longsem jong ka bad ki ‘pa kulong kumah jong ka. I la pyni ba ban synshar kat ia ka ri imat donkam hi da ki nongsynshar ia kiba la kha la pun bad la pynheh pynsan hapteng ki nongsynshar khadar.**

**2. Ki kpa tymmen ha ring ha sem ki Nehru pateng la pateng ki la long kiba iadei kti bad ki kam hima sima naduh ka por ki syiem Mughul. Haba ka Kamala Nehru ka la kha da i khun kynthei, ka kiaw jong ka ka la diaw namar ha kum ka ring jong ki, ka Kamala ka la dei ban kha da u khun shynrang na ka bynta u lok jong ka, U Jawaharlal Nehru. U kparad pat U Motilal Nehru u la kdup hun fa ita i khunlung kynthei bad kum uba la iohi lypa ia kaba shadien u la ong “kane ka khun kynthei u Nehru kan palat fa ki shihajar ngut ki rangbah”. Ka la jia shisha kumta. Tang khyndiat ngut ki nongsynshar ha ka pyrthei kaba mynta ki lah ban iakot dor bad ka jingkhraw ka Indira.**

**3. Ka rukom pynheh pynsan bad ka jingsaindur ia ka pule ka dangle jong ka Indira ka pyni ba haduh katno naduh u kparad haduh u kpa bad ka kmie ki da ia tai bad buh jingmut.**

**4. Naduh ba ka Indira ka dang khunlung, ka mynsiem feid ri bad ka mynsiem ieid ia ka jinglailtuid ka ri ka la ngam jylliew ha ka. Ki ktien bakhatduh ha Bhubaneswar shuwa ka jingsbahsiat ki la long kiba pynwan dur thik ia u jylli ka jingim uba sdang bad uba kut ha ka jingieid ri haba ka la ong “Ngam tip kaei ka ban jia ia nga hynrei nga tip ba nga thrang ba man la ka syrwet snam na ka met jong nga kan long namar ka ri”.**

5. Ka rukom thoh ia ka jingiathuhkhana ka long kaba iaid shar shar bad ka pynskuin ia ki nongpule ba kin pule ha ban da kut khlem sangeh,

6. Ka style thoh ka long kaba sngewthuh suk ia ka jingiathuhkhana ha ki nongpule wat kito ki bym shym pat da iaid shaphrang ha ki kyrdan kiba kham shajrong ha ka pule ka dangle. Khlem pep ki khynnah ne kiba la rangbah kin sngewtynn timer kumjuh ia kane ka kot.

7. Kawei pat ka kot kaba i Bah Pascal Malngiang i la thoh ka long shaphang ka Jingim U Martin Luther King, ka kot kaba ai mynsiem ia ki nongpule ba kin sngewthuh ka mut aia ban ieng skhem namar ka hok.

8. Kawei de na ki kot jong i kaba kyrteng "Ban ieid ka Pynmong" ka bthah bad pyni ia ka rukom pynheh pynsan ia ki khun lyngba ka khana bashoh mynmysiem. Wat lada kaei kaei kaba dei ban jia kan pynmong ia ka dohnud ki kmie ki kpa hynrei na ka bynta ka jingbit ki khun ki kyan tiaw bad leh ia ka.

9. Ki Kot i Bah Pascal Malngiang khamtam leilei ka kot shaphang ka Jingim jong ka Indira Gandhi, khlem pep kan bsut ha ngi kiba long ki Nong India ia ka mynsiem ban trei bad kyrshan tyngch namar ia ka Ri. Ki jingtrei jong i ki long halor ki nongrim baskhem kiba ka jaitbynriew kaba dei ban roi ka dei ban ieng/

10. Haba nga iathuhkhana bad ine i nongthoh nga shem ba i long iba minot i ba bad ieid shibun ia ka thoh bad ka pule bad iba lah ban mutdur ia ka lawei. I long iba sbun mynsiem shikatdei eh naba i ai ia ki jingtip bastad ba i lum ia la ka jaitbynriew lyngba ki kot kiba i pynmih. Ngidang donkam shibun ki kot kiba bha ban pynroi ruh ia ka ktien khasi bad ban rah ia ka sha ki kyrdan kiba kham shalor na ka bynta ki nongpule ha Meghalaya. Nga ai khublei ia i Bah Pascal Malngiang. Khlem pep in sa nang pynmih shuh ki kot kiba kum kine.

**Khublei**

**Dated Shillong  
12-11-1985**

**Mrs. M.R. Mawlong  
Director of Public Instruction Meghalaya**

## KI SKER

1.	Ha duwan kñia jong ka Ri	—	1
2.	Dei ka khun kynthei	—	12
3.	Marwei ha la Rympei	—	20
4.	Shabar na la ri	—	25
5.	Ka jingim kaba thymmai	—	39
6.	Ka Indira ha ka India Laitluid	—	47
7.	Ki Kjat Sngi phyrngab	—	52
8.	Ha 'Matlong ka ri	—	60
9.	Ka Nonglalam jong ka ri	—	65
10.	Ka Nonglalam bymriej	—	81
11.	Khlem pyunksan, tang kaba dei	—	94
12.	Ka Sngi badum ngiew	—	105
13.	Ka jingialeh kaba shyrkhei	—	113
14.	Ka Radbah jong ka ri	—	121
	— Ki Par jingtip	—	131

## LYNNONG

### I

#### HA DUWAN KNIA JONG KA RI

Ka la long kaba pynkyndit ia ki briew baroh naduh ki babu phabu haduh ki nongbylla nongsngi, haba ka khubor ka la saphriang kylleng ba ka Myntri Rangbahduh jong ka Ri, ka Indira Gandhi, ka la shah siat ha la ka jong ka kompon-iing ha ka step 31 tarik u Risaw 1984, ha ka por 9.30 kiew sngi.

Sha kat ba laid ba ieng, iohsngew tang ia ka khana shaphang kane ka briew kaba la aiti ialade na ka bynta la ka jong ka Ri. Ka hamsala ka la laid sawdong, ba ka la shah siat haduh 32 kuli bad don pat ruh kiba la pynksan ba dei tang 8 kuli.

Ka khubor na ka All India Radio, Delhi, ha kata ka sngi por shibaje nohphai sngi, ka la shu pynbna ba ka Myntri Rangbahduh ka shitom jur. Hynrei haba iohsngew la kat kita ki kuli kiba la rung ha ka met jong ka, baroh baroh ki la shu la kyrngah la ki khlich ban ong ba katto te ka Myntri Rangbahduh kam don shuh.

Ka step 31 tarik u 1984, ka la long kaba lai lai. Kumba ju long ha kiwei pat ki step ha kata ka step ruh ka la miik na I, Saldarjang

Road ban leit sha ka ophis jong ka kaba don ha Akbar Road, ka iing kaba don marjan hi. Ha kata ka step ka la dei ban iakynduh ia kawei ka kynhun ki nongring phlim Television kiba nabar ri, haba kyndit kynsan ka la shah kyn-shait kuli bad hadien shikhyllipmat hi ka la kyllon khram da kaba lynñiar.

Mar ia iohsngew ia ka jingbthei jong ki suloi, ka Sonia Gandhi, ka lok u Rajiv, ka la mih bra nbran na la ka kamra bad ka la mareh sha ka jaka ba shah siat ka kiaw jong ka da kaba iam lynñiar artat. La rah ia ka Indira mar mar sha ka All India Institute of Medical Sciences ban shah sumar.

Ki kuli baroh kiba la rung ha ka met jong ka ki la long 16 tylli. Ka la mynsaw jur na skhep bad na shadem. Hadien san kynta ba ki doktor radbah ka Ri ki la pyrshang katlah katlai ban pyllait im ia ka, ki la pynbna ba kam don shuh.

La don kiba la mut ban pynduh nob ia ka la arsien shuwa. Ka sien kaba nyingkong ka la long ha u iaiong 14 tarik 1980, haba u Ram Balchand, u briew uba dang 37 snem ka rta na Baroda (Gujarat) u la pyrshang ban siat ia ka ha Parliament House. Hynrei u la shah kem shuwa ba un leh ia kata ka kam bym-man. Ka ba ar pat, ka la long ha u nohprah 30 tarik 1981, ha ba uwei pat u samla uba dang 24 snem, ka rta u la pyrshang ban siat iap ia ka da ka suloi thaw tuh ha Tanda (Uttar Pradesh) shuwa ba kan kren ha ka jing-talang paidbah.



Ha kane ka step 31 tarik, kiba la siat la ka ki long ki briew kiba dei ban pahara bad ban iada la ka wat da kaba pha la la ka jingim ruh. Kita ki arngut ki long u Sub-Inspector Beant Singh, uba dang 34 snem ka rta, uba la shah siat kylla ha kata ka jing-kynshait kuli jong u ha ka met kynthel jong ka Indira. Uba ar pat u long u Satwan Singh u khynnah samla uba dang 21 snem ka rta. Une u la pynsuda la la ka jong ka sten gun ha ka met jong ka Indira na ka jaka kaba tang laiphut jingjingal. U Satwan Singh u la mynsaw jur ha kane ka jinglaleh bad la rah la u sha Lohia Hospital ban shah sumar. Dei da ka jingaibuit bad ka jingkyshoit jong u Beant Singh ba u Satwan u la leh la kane ka kam beain, da ka jingthmu ban pynhiar kput halor ka Myntri Rangbahduh, ba ka phah la ki shipai ki swar sha ka Golden Temple, ban lalah pyrshah la ki lehnoh kiba kwah ban seng la ka state thymmai jong ki punjabi kaba ki la jer kyrteng ka Khalistan.

U Satwan bad u Beant Singh ki la bam smai bam spot ban pynduh noh la ka Indira ha kawei ka Gurdwara (ka lingmane ki sikh). Ka jingangpud jong ki ka la urlong ba ka step 31 tarik. Ha kata ka jinglalah kaba bad u Beant Singh u la lap ha shen, kumjuh ruh u Harnam Singh uwei pat u shipai Komando u bym don jingladel kti satia bad kine ki arngut. U la lap na ka daw ka jingdel ki kuli kaba ki dang lasiat.

Mar ia poi ha Hospital, ki doktor ki la faleh katlah katiai wat ban pynim jubor ruh ia ka Indira lada lah. Ki la pyntied ia u klongsnam jong ka da ki kor ki bor, hynrei phewse khlem phoida eiei. Napdeng kita ki doktor kiba la sumar ia ka, la don ruh u Dr. P.N. Tandon, u Dr. D.R. Nandi, u Dr. L.K. Dhawan bad u Dr. Venugopal.

Haba ki la sdang ban puid ban sei ia ki kuli na ka met jong ka, la don ka Sonia Gandhi, u M. Fohtedar, u R.K. Dhawan bad u Arun Nehru ha ka kamra kaba marsyndah bad kata ka kamra puid, katba u paidbah babun u sdang ban ialum lymbung hakhmat ka phalor jong ka Hospital ba ki kwah tip eh, ka Myntri rangbahduh ka la long kumno.

U Rajiv, u khun jong ka, u la loh ia kane ka khubor basogewsih bad bashyrkhei na ka All India Radio, katba u dang sngap ia ka jing-ialeh kirkkit hapideng ka India bad ka Pakistan. Ha kata ka por u dang don ha ka kali kaba rah ia u na Contai sha Mahishadal ban leit artat sha Kolaghat (West Bengal). Shen ki pulit lyngba ka wireless ki la pyntip ia u shaphang kata ka khubor basogewsih. Na Kolaghat u Rajiv u la kiew da ka Helicopter ban leit sha Calcutta bad na Calcutta sha Delhi da ka liengpuli bakyrpang jong ka Indian Airlines, lang bad u Myntri tyngka-pia u Pranab Mukherjee bad u Lat ka West Bengal, u Uma-shankar Dikshit.

U Rajiv, mar ia poi ha Palam Airport (Delhi), u la leit beit beit sha ka hospital. U President Zail Singh ruh u la poi sha Delhi na North Yemen ka ka por 5.30 janmiet. Na Kad liengsuiñ u la leit beit beit sha ka All India Institute of Medical Sciences ban jngoh ia ka met bathylli jong ka Indira.

Hadien ba u President u la leit noh, ki kur ki kha kynthei jong ka Indira ki la pynsum pynsait ia ka bad ki la pynphong ia ka da ka sari rong tama. Bad ha ka por 9.15 mynmiet ki la rah ia ka met jong ka na Hospital sha ka I, Safdarjang Road, katba ki briew babun ki dang ia peit ieid ia ka, da ka jingsngew shempap bad ka jingsngewlanot kaba khraw ban ym iohi shuh ia la ka nongialam.

Ha ka shitarik, u Naiwieng por 7.50 kiew-sngi, ki la rah ia ka met jong ka na ka iing jong ka na I, Safdarjang Road sha ka Teen Murti House, ban pdiang ia ki jingkhublei khatduh na ki khun ka Ri bad ki nongialam pyrthei. Da ki hajar ngut ki briew ki la pyndap ia ka surok baroh arliang ban khmih ia ka kali kaba kit ia ka met jong ka briew kaba la long ka bor bad ka buit jong ki da bun bun snem. Hadien kata ka kali, la bud u Rajiv ia uba la pynsmai Myntri Rangbahduh ha ka miet ba la lah, ka lok bad ki khun jong u: ka Sonia, ka Priyanka bad u Rahul. Hadien jong ki, ha kawei pat ka kali la don u Amitabh Bachchan bad ka lok jong u, ka Jaya. La pynthiah ia ka met jong ka hajan jong ka dwar

bah ka Teen Murti House. Da ki hajar khlieh ki la ieng laiñ dangngir dangngab tang ban shu iohi khatduh liak ia ka briew kaba ki da burom-ieid.

U President ka Ri, u Giani Zail Singh bad u Vice President, u R. Venkataraman ki la leit jngoh bad buh syntiew halor ka met jong ka. Kumjuh ruh u Nongbishar baheh duh ka Ri, u Chief Justice Y.V. Chandrachud bad ki 17 ngut ki Nongbishar ka Supreme Court ki la poi ban khublei khatduh ia ka. Ki Myntri Rangbahduh bad ki Lat jong ki jylla bapher ki la leit ban pynpaw ia ka jingsngewnguh ia kane ka Nongtalam bakhraw da kaba leit buh syntiew halor ka met jong ka, na ka bynta ialade hi shimet bad na ka bynta ki briew, kiba ma ki ki ieng mihkhmat.

Ka Jingshahsiat iap jong ka Indira Gandhi, ka la long ka khubor kaba dungkura ym tang ia ka Ri India, hynrei wat ia ka pyrthei baroh kawei ruh. Ki Nongtalam na ki Ri bapher ki la pynrem ia ka jingialeh be-aifñ da ka sum ka wait. Ki da burom ieid ia ka kum kawei na ki nongtalam bym rie j jong ka Non-Aligned Movement (ki ri ki bym ia shah liang), bad ka briew kaba imsngi ban trei tang na ka bynta ka jingsuk jingsaifñ ha ka pyrthei.

U President Chernenko jong ka Soviet Russia, uba long ha ka ka juh ka por u General Secretary jong ka Soviet Communist Party, u la ong da ka khmat sngewsih, "Ka kyrteng jong ka Indira kan lai neh sah ha ka jingpyrto ieid jong

ki Nong Russia". Ka Cabinet bad ka Presidium jong ka juh ka Ri, ki la phah ia u kyrwoh sngew-sih sha u Zail Singh da kine ki kyntien : "Ka kyrteng badonburom jong ka Indira Gandhi kan neh sah ha ka histori".

Ha Washington, ka nongbah jong ka America, u President Ronald Reagan u la loh ia ka-ne ka khubor batriem bad basngewsih ha ka por 3 baje mynstep haba la shu pynkyndit ia u na bathiah. U la phah ia u kyrwoh sngewsih da kaba pyrto ia ka jinglah bad ka jingtbit, ka jing-iar jingmut bad ka jingsngewthuh bashemphang jong ka, kum ka nongialam. Kiwei pat kiba la phah ia u kyrwoh sngewlem ki la long ka Syiem Elisabeth bad ka Myntri Rangbahduh ka Margarette Thatcher jong ka England, u President Fidel Castro jong ka Cuba, u General Figueredo u President jong ka Brazil, u President ka France u Francois Mitterrand, u President ka Germany ha Mihngi u E. Honecker, u Emir ka Kuwait, u Shongknor ka Palestinian Liberation Organisation (PLO) u Yesser Arafat, u President Zia ul Hag ka Pakistan, u President Ershad ka Bangladesh, u President Jayawerdane ka Sri Lanka bad ki nongialam jong kiwei pat ki ri babun,

Ha ka 3 tarik u Naiwieng, la rah khatduh iawai ia ka met jong ka Indira lyngba ki surok jong ka Delhi sha Shanti Vana, ka rynsan thang ba la shna kyrkieh bad kyrpang na ka bynta'jong ka, kaba don hapdeng ka rynsan thang jong u Mahatma Gandhi, ka Rajghat bad ka rynsan thang jong u Nehru, ka Shanti Vana.

La kit ia ka met jong ka na Teen murti House ha ka por 12.30 mynsngi ha ka kali ba la shu tan da ki shipai ba la jied na ka kynhun ki shipai madan, ki shipai suiñ bad ki shipai du-riaw. Ka jingleit on thang ka la long ka lynti kaba jlan bad kaba ishongkun shibun eh. Da ki hajar ngut ki briew ki la ia jngoh ieid ia ka lyng-ba ki surok bañar jong ka Delhi, bad da ki mi-lion ngut ki la ia shong sawdong ki television ban jngoh bad ban sakhi ia kane ka jingleit on thang da ka mynsiem kaba raikut ban aiti ialade ha ka duwan jong ka Ri.

Ki heh ki haiñ, ki kynrem ki lyndan na satlak ka pyrthei ki la poi ban leit on khatduh khatwai iawai ia ka sha ka jingsuk jai, sha ka jaka ha kaba yn ym don shuh ki kuli ban pyn-mynsaw, ne ki tari ban pynmong. Hapdeng jong ki la don ki nongmihkhmat na Soviet Rus-sia ha ka jingialam u Myntri Rangbahduh u Ni-kolai Tikhonov, u Vice Premier ka China u Yao Yilin, U President Jayewardane ka Sri Lan-ka, u President Zia Ul Hag ka Pakistan, U General Ershad ka Bangladesh, u Secretary General ka Common Wealth u Sridath Ramphal, u Secretary General ka United Nations u Perez de ceuller, U Secretary of States ka America, u George Schultz bad kiwei de. ka Ma-kasin Competition Success ka la ong : "Palat ia ka 60 ngut ki nongialam na kylleng ka pyrthei ki la ia poi sha India ban leit on thang ia ka Indira. Hapdeng jong ki la don 14 ngut ki Pre-sident, 25 ngut ki Myntri Rangbahduh (Prime

Minister), Uwei u Syiem, uwei u Governor General, 2 ngut ki Syiem khynnah, 7 ngut ki Vice President bad 7 ngut ki Deputy Premier".

Katkum ki dustur ki riti niam, u Rajiv, u khun jong ka, u la ai ding ia ki dong baroh jong ka met jong ka ba la kynton da ki dieng-iwbih, katba ki lyngdoh ka Niam Hindu ki nang duwai jam ia ki jingduwai kiba iadei bad kane ka khep. Ka met ka la shim por da ki kynta ban ing. Ki la theh bun tin ka khi, bad ki la bret shuh shuh ia ki kyndok iwbihi, ba kan ia mir lang bad ka tдем kaba kiew sha sahiti na ka duwan knia jong ka Ri.

Ha ka step kaba bud, u Rajiv bad kiba ha ting ha sem jong u, ki la leit lum ia ki dpei jong ka ha ki khiew riong bad la phah ia ki sha man ki jylla jong ka Ri India, ha kaba u babun u balang u bym loh lad ban leit pynpaw ia la ka jingsngewieid, sngewburom bad ka jingpyrto, ki la ialum ha man ki nongbah ban peit bad ban ai khublei leit suk ia kata ka snap dpei. Hadien khyndiat sngi ba kine ki dpei ki la sah ha ki nongbah bapher jong ka Ri, la rah biang ia ki sha Delhi, bad ha ka step II tarik, la ber ia uta u dpei ha klier jong ki lum Mangkashang, ki lum shong blei, kiba ka Indira Gandhi ka da leid eh haduh katta katta.

Nedah ka sngi ba ka khubor ka la paw ha ka Myntri Rangbahduh, ka Indira Gandhi ban don shuh, u paid byllien jong ka Ri, u la sngew iadei ba u don ha ka dum sngiem, ka biej bad

ka rangli. Na ka mynsiem kaba sngewsih la mih ki jingsngew kiba harrukom, haduh ba ka Ri baroh kawei ka la shong syier ha thmit jong ka jingia umsnam paramarjan marpa, ka jingluh roit ia kawei ka jaitbynriew da kawei pat, khlem pyrkhat ia ki jor tynrai kiba kham kongsan shuh shuh. Katkum ki khubor, ha ki 80 tylli ki nongbah la pynjari ia ka curfew, naba ha kita ki laisngi jan haduh 500 ngut ki briew ki la iap bad da ki hajar, khamtam eh kito kiba dei na ka jait Sikh, ki la duh noh ia la ki iing shong, ki mar ki mata, ki jingdon jingem, bad ka jingim jong ki ruh ka shu syier miet-sngi. La khot ia ki shipai ban pynthanda ia ki nongrit bad ki nongbah babun jong ka Ri, ban iarap ia ki bor synshar ban pyniaid ia ka Ri.

Ka jingshemphang jong u Myntri Rangbah, duh bakhynnah tam, u Rajiv, uba la duh noh ymtang ia ka nongialam hynrei ia ka kmie la jong, ka la pynlong ba yn burom ia u ym namarba u dei u khun ka kmie jong u, hynrei u briew uba lah uba lai hi dalade. Une u nongialam bathymmai jong ka Ri, u la phah noh ia ki Lat bad ki Myntri rangbah jong ki jylla sha la ki jong ki nongbah, ban pyntogen bad ban peit ban jngoh ba yn ym don jingthut ha ki jylla jong ki.

Da ka jingkhlad noh jong kane ka Riewradbah, ka Ri India ka la duh noh ia ka spahbah, ka nongialam batbit, kaba lohi jngai, kaba am sia tang ia ka jingpahuh pahai, ka jingsuk jingsaid bad ka jingkieu rat ha ki phang babun.



**Ka Indira ka long ka briew kaba la aiti falade met bad mynsiem na ka bynta ka Ri kaba ka da ieid eh.**

**Ha ka jingkren lyngba ka All India Radio bad ka Doordashan ha ka miet 31 tarik, hadien ba la pynsmai fa u, kum u Myntri Rangbahduh da u President, u Rajiv Gandhi u la ong: "Ka Indira ka la long ka kmie ym tang fa nga hynrei fa ka Ri baroh kawei. Ka la shakri fa ki nong India haduh ban da pjiar lut fa la ka snam. Ka Ri ka tip shai, kumno ba ka la trei dohim doh-lap da ka mynsiem kaba aiti hun falade na ka hynta ka jingfaid shaphrang jong ka Ri India. Phi tip fa ka jingagnud bajyllew tam ba ka don bad fa ka jingphohsniew jong ka, ba ka Ri India kan long kaba tylli mlon kawei, kaba pahuh pahai bad kaba suk ba saif - Ka India ha kaba baroh ki nong India kin ym kheif fa ka jingfapher ha ka niam ka rukom, ka ktien ka thyllicj, ne ha ki khap ka saif hima sima, kin im kum shi ling shi sem da kaba laitluid na ki jingfakob bad ki jingfa mutsniew"**

**Kane ka long ka pasoh jong ka jingim jong ka Indira Gandhi, naduh ki por ba ka fa sdang ban plie fa ki irmat tat haduh ba yada khang khyrdep fa ki jubor justi da ki kuli bakthang jong ki lehnoh kiba kwah ban pyaduh pyndam, kiba pyrkhat ba ka bor ka long ka hok.**

## LYNNONG

### 2

## DEI KA KHUN KYNTHEI

La kha ia ka Indira ha ka 19 tarik u Nai-wieng 1917, ha ka nongbah Allahabad (Kaba mut ka nongbah jong u Allah-u Blei jong ki Musulman), ha ka iing ka sem kaba don ba em jong ki jait Nehru, kiba long da ki pateng ki riwstad-aiñ ha ka lingdulan jong ki Patsha Mughal. Ka jait Nehru ka la wan mih na ka thain Kashmir, Ki dei ki Kashmiri Brahmin. U Patsha Mughal uba kyrteng u Farrukhsiyar, u la dawot ia u kpa kulong jong ki sha ka nongbah jong u ka Delhi, ha ka spah snem kaba khathyn-riew. Kumta pateng la pateng ki la long ki briew kiba ia don kti don kjat ha man la ki khep jingim jong ka synshar ka khadar ki Patsha Mughal. Hadien habud haba la rah noh ia ka Iingshari sha Allahabad, ki Nehru ruh ki la ia leit noh shata. Dei ha kane ka nongbah ba la kha ia u Myntri Rangbahdub banyngkong jong ka ri, u Jawaharlal Nehru, u Myntri Rangbahdub ba-ar, u Lal Bahadur Shastri bad ia ka Myntri Rangbahdub balai, ka Indira Gandhi.

“Dei ka khun kynthei”, la iathuh u doktor ha ki ba ha iing ha sem katba ki dang ia ap ha ki kamra basawang jong ka iing u Nehru, ha Anand Bhawan.

"Hynrei, ka Kamala ka la dei ban kha da u khun shynrang!" la kren diaw ka Swarup Rani, ka kmie kha jong ka Indira.

"Kawei ka khun kynthei jong u Nehru, phi lah ban mutdur hi, kan kham lah ma ka ban ia shihajar ngut ki khun shynrang", la kren u Motilal, u paieid jong ka Indira, kum uba iohi lupa ia ka lawei jong ka.

Ka Swarup Rani da ka bym shym pynleit jingmut ia kaei kaba u ong, ka la shu kohnguh la ka khlieh, khlem da pynpaw shuh ia la ka jong ka jingsngew.

U Motilal Nehru (U kpa jong u Jawaharlal) u la jer ia ka ksiew jong u, da ka kyrteng jong ka kmie-rad jong u, Ka INDIRA; bad ki kmie ki kpa jong ka pat, u Jawaharlal Nehru bad ka Kamala Nehru ki la bnoh sa kawei pat ka kyrteng pynbud da ka 'PRIYADARSHINI', kaba mut kaba i ieid ia ki khmat. Kumta la jer ia kane ka khun phrangsngi: INDIRA PRIYADARSHINI katkum ki riti niam Hindu.

Ka Sarojini Naidu, kawei na ki kynrem ki lyndan ka seng Congress, kaba long ruh teng ka Lat (Governor) bad ka myllung ba paw khmat ba ka Ri, ka la phah ia u kyrwoh iaroh sha u Jawaharlal, haba u la ioh ia kane ka khun kynthei bad ka la pynkut ia u kyrwoh jong ka da kaba ban, ba kata ka khun jong u ka long "Ka mynsiem bathymmai jong ka Ri India". Kane ka la long kum ka jingfathuh lupa ia ka jingkie jingbah, ba kane ka briew ka dei ban tyrpeng shisien ka singi na'ka byntr la ka jong ka Ri.

Ka Anand Bhawan ka long ka rympei ha kaba ka Indira kum ka khynnah ka da juh bad sngewtynnad eh. Ka Indira hi hadien habud ka kynmaweid ia kita ki sngi da kaba ong : "Ka long kaba pynkmen ia ngi ki khynnah, namar ba ka jaka ka byllai ba ngin ialeh iarieh." Ym ju duh brieve ba wan ba leit ha Anand Bhawan, kaba long ka lypung, ka mynshem ha kaba ki kynrem ki lyndan, Ki iarmangkalai na kylleng sawdong ki ia wan ban ia mir jingmut bad ban ia kren bad u Paieid jong ka, u Motilal ne bad u kpa jong ka, u Jawaharlal Nehru.

Dei ha ki snem ba la kha ia ka Indira, ba ka jingkhiiwin ban pynioh ia ka India kaba lait-luid na ka jingsynshar ki Dohlieh, ka la sdang ban ioh bor na ki kyndong kynshrot bapher jong ka Ri. u Motilal bad u Jawaharlal Nehru ki la long kum ki rishot blei ha kane ka jinglakhih, hapoh ka jingialam bariewblei jong u Mohandas Karimchand Gandhi.

U Motilal, u Paieid jong ka, u ju sngewsa-rong ban btin lang ia ka ksiew jong u, ka Indira sha ka lypung ki heh ki haiñ kiba wan rung sha ka iing jong ki. Ka Indira ruh ka la ieid ia la u jong u Paieid shisur mynsiem. Hadien, ka la thoh kumne shaphang jong u : "Nga ju iaroh feid ia i Paieid jong nga kum u brieve uba khlaif bad nga la ieid ia ka jingim bym ju tyngkai jong i, kaba i Papa i la ioh hadien habud. Nga la sngewshoh mynsiem khamtam eh da ka jingheh brieve jong i—Ngam mut ka jingheh tang ha ka met ka phad...I kumba i lah ban piam ia ka pyrtnei baroh kawei"

Ym dei tang u Motilal uba ju pynkjeh ia ka Indira, hynrei baroh baroh hi naduh ki kha ki man, ki kur ki jait, haduh ki paralok parajor jong u kpa jong ka. Wat ka Swarup Rani ruh, kaba la kren bynñiaw haba iohsngew ba ka Kamala ka la kha ym da u khun shynrang hynrei da ka kynthei, mynta ka la klet lut ia kita ki jingbynñiaw baroh, bad wat ma ka ruh, ka ju pynkjeh bha ia ka Indira da ki jingbam bang bam thiang kiba ym ithuh ithaw. Haba peit ia ka jingloh mon iohli jong ka, baroh ki shu kyrngah la ki khlieh da kaba ong "tip kan long kumno ynda ka la heh la san".

Hapdeng kat kita ki jinglohli iohmon, ka Indira ka la don ia kawei ka nonghikai kaba thikna, kaba long ka kmie jong ka—ka Kamala Nehru. ka Kamala ka pynsum pynsleh, ka aibam aidih bad ka hikai ia ka, ia ki riti ki dustur jong ka niam ka rukom ki Hindu. Ka kmie jong ka ruh ka dei ka nong kashmir, ka la ia poikha poiman bad u Jawaharlal katkum ka rukom hindu da kaba shu pyniabuh ki kmie ki kpa jong ki. Ka Indira ka la ieid ia ka kmie jong ka palat ban ia kino ma ki briew ha pyrthei. Ma ka hi ka la iathuh, "Ngi la iajan bha iwei ia kiwei pat. Nga la ieid jylliew bha ia i mei, bad haba nga tip ba don ba pynmong ia i, nga ju ialeh pyrshah bad nga da ia kajia ruh bad kita ki briew."

Haba ka Indira ka dang dap kumba shisnem shiteng eiei. kata, ha u Lber 1919, ka Sorkar Phareng ka la pynlong aia la ka Rowlatt Act. Da kane ka aia la pynpyrkhing

shibun ia ka saifi hima sima ki nong India. Ka la mana ia ka jinglailuid, ha ka kren ka thylliej bad da kane aifi la niefw ia ki nongialeh ban ioh ia ka jinglailuid kum ki nongleh be-aifi. Ha ka 6 tarik u Iaiong, u Gandhiji u la sangot ban long ka hartal (Ka khang shnong) ha ka ri baroh kawei kum ka jingleh pyrshah ia kane ka aifi. Dei ha kane ka sngi ba la mih bun jait ki jingkulmar. Ha Amritsar (Punjab), ki jingjia ki la nang sniew shuh shuh haduh ba kawei ka nonghikai skul dohlieh ka la shu lait da ka said na ki tyrsim jong ki nong India. Ha ka 11 tarik, u Brigedier General Reginald Edward Harry Dyer, uba dang shu poi shen ha Amritsar, u la khang ia kino ma ki jingialang paidbah bad ki jingialeh pyrshah sorkar. Ha ka 13 tarik u Iaiong, palat ia ka san hajar ngut ki nongshongshnong ka Amritsar, da kaba mut pyrshah ia kata ka adong, ki la ialum paidbah ha Jallianwalla Bagh, ka kynja madan ba la ker kut da ki kynroh iing. U General Dyer, u la khang kdong ia ka phalor bah bad u la hukum ia ki shipai ban siat. Ki paidbah ba kulmar jingmut da ka jingtieng, khlem tiar ialeh, ki la phet ruma rutit sha ki kyndong kynshrot baroh. Ha ka shiphew minit, ym duna ia ka 400 ngut ki briew ki la iap bad kumba 1200 ngut kiba la mynsaw bad dkoh. Ha ka sngi kaba bud, u General Dyer u la mana ba baroh ki nong India kiba ia laid na kata ka surok ha kaba ka nonghikai dohlieh ka la shah shoh, ki dei ban par na ki kti bad ki khohsiew kum ka jingpynshitom ia ka jingleh jong ki. U la mana

shuh shuh ba uno uno u Nong India, u bym  
pynpaw ia ka jinglehburom ia ki phareng da  
kaba hiar na ki kali kulai ban khublei ia u  
phareng uba laid, un shah sympat paidbah.

Kane ka jingleh jong ki phareng ka la pyn-  
ingkhong khait ia ki nong India baroh. Ban pyr-  
shah ia kane ka jingleh, la pynlong ia ka jingla-  
lang paidbah jong ka Seng Congress ha Calcutta  
ha u snem 1920 hapoh ka jingialam jong u  
Gandhiji. Ha kata ka jingialang ki la rai shisur  
ban sdang ia ka jingkhiiwin da kaba khlem  
phlei snam (Non violent), khlem ia ksoh kti bad  
ka sorkar (Non Cooperation), da kaba kyntu  
ia ki nong India baroh ban weng noh lalade  
na ki dorbar thaw aiñ, ki lingshari, ki skul  
bah ki skul rit sorkar bad da kaba kyntait ia  
ki mar ki mata ba wanrah da ki mynder. Ki  
wonglashim bynta ba kata ka lypung ki la ia  
rai jingmut ban phong da ki jaiñ ba shu thaiñ  
hi ha ling. Kumta ka seng Indian National  
Congress ba la seng ha u 1885, da ka jingai  
jingmut jong uwei u dohlich hi, u A.O. Hume  
kum ka kynhun ai jingmut ia ka sorkar Phareng,  
ka la kylla tong ka seng saiñhima sima kaba  
pyrshah thlong mluh thlong sying ia ka sorkar  
bad kaba kwah ban pda ruh ia ka na ka  
khyndew ka shyiap jong ka ri India.

Ka ling ka sem jong u Nehru da kaba bud  
ia ka rai jong ka Seng Congress, ki la sdang ban  
phong ban beit tang da ki mar thaiñ hi. U  
Nehru u la pynduna ia ka jingdon ki shakti  
shakor. bad u la weng ia ki mar ki mata kaba

pynpaw ba u long uba don ba em. Talade hi, u Nehru u la weng ia ki patlun, ki jingkyrdoh ryndang bad u la pien da ka jaiñboh bad u la phong da ka kurta. U la sei ia ki jaiñ khor jaiñ khriam nongwei baroh shabar bad u la wiang ding ia ki baroh khoit ha phyllaw. Ha kata ka por ka Indira ka dang dap tang kumba saw snem ka rta. Ka la long ka jingkmén na ka bynta jong ka ban iohi ia kaei kaba ma ka, kum ka khynnah ka sngew ba ka long ka jinglehkmen lehsngewbha suda.

Khyndiat por hadien kata ka jinglehkmen lehsngewbha sawdong ka ding. Ka Indira ka la dei ban iakynduh marmet ia ka jingdawa bad ka jingiatiplem kaba iadei bad ka Ri ba ma ka, ka ieid ka thoiñ. Kane ka la jia haba kawei ka kur jong ka kaba dang shu wan phai shen na Paris (France), ka la wan sha Anand Bhawan, ka da wanrah artat ia kawei ka sopti ba la suh ohshrong ohshrup bha, kum ka jingaisngewbha na ka bynta ka Indira. Ka Kamala, ka kmie jong ka Indira, ka la kyntait ieid ia kata ka jingaisngewbha da ka jingdonakor, da kaba batai ba ka ling ka sem jong ka baroh kawei hi, ki la rai ban phong tang da ki jaiñ ba shu thaiñ hi ha India.

“Nga tharai ba phi la ia khileh tiej baroh baroh”, la kren dom kata ka briew, “Hynrei phi la ia san ia rangbah, bad lada phi kwah ban ia pang ia shitom—kata phi la tip hi maphi. Hynrei phim don lok ban pynpang pynshitom ia



kane ka khynnah bapli. Dei na ka bynta jong ka ba nga la thied ia kane ka jingaisngewbha”.

Ka Kamala ka la khot ia ka Indira kaba dang falehkai hajan hangta bad ka la ong: “I nahnah i la wanrah na ka bynta jong phi kawei ka phrok na ri bajngai. Ka long kaba itynnat bad phi lah ban phong ia ka lada phi kwah, hynrei nyngkong pyrkhat shaphang kato ka miet ba ngi la thang ia ki jaiñ baitynnat baroh”.

Ka Indira kum ka khynnah ka la i kwah eh ia kata ka sopti, ka la kner ia la ki kti ban shim, haba kyndit kynsan ka la sangeh da kaba ong, “shim, shim noh, ngam kwah ban phong!”

“To, to Hep riewkhuid,” la kren dom kata ka briew ka peit artat ia ka Indira ba ka kdup ia uwei u khunbynriew, “Kumno pat ba phi nud ban kdup ia uto u khunbynriew ba la wanrah nabar ri?”

‘Nga la ieid bha ia ita i khunbynriew’, la kren bynñiaw ka Indira hadien habud, da ka ba sngew khuslai sat. Ka mynsiem jong ka, ka don ha ka lyngkhyrwiang kaba triem, naba ka jing- ieid jong ka ia ita i khunbynriew ka long kaba palat bad ha ka juh ka por ka sngewthuh ia ka kamram jong na ka bynta la ka ri. Da ka myn- siem kaba khia ka la bret ia ita i khunbynriew ha ding. Ka Ri ka wan nyngkong barabor, ka la sngewthuh.



## LYNNONG

### 3

## MARWEI HA LA RYMPEI

Ki sngi shuwa ka jinglailtuid ka Ri Indía ki la long ki sngi kiba dum ngiew da ki jingban-beiñ kiba harrukum. Ka jingshahset phatok hakdak khlem daw ia kino ma kiba kren pyrshah ia ka sorkar, ki jingbom beiñ da ki pulit ki la long ki jingjia kiba ju jia man la ka sngi.

Ki sngi jong ka jingialehlaitluid ki la long ki sngi kiba pynkulmar thlim ia ki rympei ieid ri babun bad wat ia ka iing ka sem jong u Nehru ruh.

Ka Indira ka la sngewtmang ha bun ki khep ha kaba ka la dei ban sah ha iing tang bad la ki jong ki kmienah kmiesan, khlem la ki jong ki kmie ki kpa kiba bunsien ki don ha phatok. Kane ka jingkyñjah, ka jingsngewtmang ka la dei ban kham sting lada ka don ia ki hynmen ne ki para ban lalehkai lang. Sniewbok ba ka long ka khun phrangsngi marwei. Ka Indira ka la pynpaw ia kata ka jingsngewtmang khlem la ki kmie ki kpa haba ka la ong, "Ha kata ka por nga la sngew atnud khait ba i mei, i pa jong nga kim don bad nga, katba kiwei pat ki khynnah ki don ia la ki kmie ki kpa hajan jong ki barabor."

Haba ki brierw ki wan wad ia ki kmie ki kpa jong ka, ka Indira ka ju plie ia ka jing-khangbah da kaba ong artat ia kita ki brierw ba baroh arngut ki ia don ha phatok. "I kumba i mei bad i papa jong nga ki ia juh bha ha phatok" ka la ong.

Ha iing ha sem, ka Indira ka la sdang ban heb ban san kum u khynnah shynrang ha ka rukom leh, ha ka riam ka beit bad ha ka dur ka dar ruh hi. Ka kmie jong ka, ka Kamala Nehru ka la pyrshang katlah katiai ban ym pynrieh ia ka khun kynthei jong ka hadien ki pyrda kumba long ki kynthei hindu, hynrei ka la pynphong ia ka da ki jaiifi shynrang, ka pynriam pynbeit ia ka ha ki jaiifi uniphom jong ki nongtrei Congress da kaba pynteh bha ia u shfiuh jong ka bad da kaba pynbuh-rieh ia uta u shfiuh ha ka tupia lieng kaba ju tip koit kum ka tupia Congress. Ha kane ka rukom ka ju laid ju ieng hapdeng ki nong-wan nongleit, bad kane ka jingriam jingbeit jong ka kumne ka ju pyngulmar kulwit ia ki nong-wan nongleit.

"U hynmen jong phi pat u don haei?" ki ju kylli ia ka Indira haba ka la kylla sha ki riam kynthei.

"Ngam don hynmen shynrang!" ka ju jubab.

"Ngi dang shu lohi myntan da la ki jong ki khmat", ki shu kren da kaba tharai ba ka Indira ka shu kren thok ia ki. Kane ka long ka khulpi kaba tang ka kmie jong ka bad ma ka ki tip.

Hadien ba ka Indira ka la dep pule shaphang ka Joan of Arc, ka nonglapom bashyrkhei jong ki phareng, ka la kwah ialade ruh ban long kum kata ka briew baradbah. Marwei marwei ka ju kren kumne : "Ha kawei ka sngi nga ruh ngan sa ialam ia ki briew jong nga sha ka jinglailuid kumba leh ka Joan of Arc."

Ka sien banyngkong ba ka Indira ka la dei ban iakhlad na la ki jong ki kmie ki kpa, ka la long haba ka la dap saw snem ka rta. Ka la long ha u Naiwieng 1921, haba u Gandhiji u la pynbna ia ka Khang shnong paidbah (Hartal) ha ka sngi ba u khun syiem ka Ri Bilat u la dei ban wan jngoh ia ka Ri India. Ka sorkar phareng, haba iohsngew ia kata ka jingmut ban pynkhihwin, ka la bom syndon na tynrai. Ki Nehru ki la shah set phatok bad ki la dei ban hajir ha ki lingshari. Ka Indira ruh ka la shim bynta ha kine ki lingbishar da kaba pynleit jingmut,

Ha u Iaiong 1922, u Nehru u la shah kem biang na ka daw ka jinglashim bynta jong u ha kaba pyrshah ia ka jingdie ia ki mar ba la wanrah na ri mynder. Ka kot khubor Independent ka la thoh kumne shaphang ka jingleit hajir jong ki Nehru sha lingshari halor kata ka kam :

"U Pandit Nehru bad ki khyndai ngut kiwei pat kiba long ka Jingsarong jong ka Allahabad, ki dang ia leit sha ka jaka shong k koidi. U nongbishar u la shong ha ka khet bishar da ka maifi kaba i donburom. La pynbeit ia ki jaka shong jong ki nonglasngap-kai ha ka rukom jong ka shiteng jyli ..."

“İa kata ka jingjarjar la pynkheif da kawei ka sur jong i khynnah rit, ka sur jong ka khun ba dang saw snem jong u Nehru kaba la ong : “Mei, kin İa pyni baoskop ne mynta ?”

Ka bapli ka Indira, khlem da sngewthuh İa ki jingshitom, ki jinglanot jong ki kmie ki kpa jong ka na ka bynta ka jinglailtuid ka Ri India, ka la long ha ka rukom barit jong ka, ka nong-İaleh na ka bynta ka jinglailtuid.

Katba ka Indira ka nang kham heh kham san, u Motilal, u Paieid jong ka u la pyrkhat ruh shaphang ka kot ka sla jong ka. Ka la long ka jingİaleh kaba shyrkhei na ka bynta u Motilal bad u Jawaharlal. Katkum ki aif ka saif pyrthei kim dei ban phah İa ka sha kino kino ki skul ba pynİaid da ki dohlieh, bad katba ka jingİatiplem jong ki, khamtam ka jong u Motilal ka nang ktik İa u, badei tang ki skul dohlieh kiba lah ban ai İa ka jingnang jingtip kaba pura İa ka ksiew jong u. Ma u hi u la long u briew uba la dihsngiam İa ki um jingstad ka ri sepngi, kumta u la sngew ba ka pyrsa jong u, kum u khun jong u. u Jawaharlal, ka dei ban İoh İa ka edukashon kaba paka.

Ka Indira ka la leit shuwa ha kawei ka skul kindergarten ha Delhi, nangta la rah İa ka sha ka Modern School ha Allahabad. Kane ka skul ka long kaba duna shibun ha ki liang bapher. Dei namar kane ka daw ba u Motilal u la pynkynriah noh İa ka na kata ka skul sha ka Cecilia School ba la pynİaid da ki dohlieh. Ka jingthmu

jong u ka long ba ka Indira kan ym sngewtmang,  
 hynrei kan ioh ia ki paralok kiba ia biang snem  
 ia biang rta ban ialehkai bad ban ialeit ia wan,  
 U Jawaharlal u la pyrshah ia kane ka jingleh  
 jong u kpa jong u, kumta la sei noh ia ka Indira  
 na katei ka skul bad la hikai ia ka ha iing. U  
 Motilal u la sngewsih jur halor kane ka jingleh  
 jong u khun jong u, hynrei hapoh ki krem doh-  
 nud pat u la kubur ba ka ktien bad ka kam ki  
 dei han ia hap tarajur, la dei ha ka saiñ hima  
 sima, ka arei ka ktah, la dei ha babun briew  
 ne haba don marwei.

Ka jinghi'kai ha la iing ka la long kaba paka  
 bad kaba biang eh, hynrei na ka bynta ka  
 Indira hi shimet, ka la long ki sngi jong ka jing-  
 kynjah bad ki jingsngewtmang ban ym ioh ialeit  
 iawan, ialehkai iabiria bad ki para khynnah.  
 Nalor, ka jingkynjah bym don paralok khynnah  
 rit ba ia biang rta, ka kmie jong ka ruh ka  
 long ka briew kabym biang ha ka koit ka khiah.  
 Dei namar kane ka daw ba la thut noh sa ki  
 jingpun jingkha jong ka, tat haduh arsien.



## LYNNONG

### 4

## SHABAR NA LA RI

Naduh u snem 1919, ki doktor ki la suba ba ka kmie jong ka Indira ka la sdang ban loh ia ka jingpang Tuberculosis (T. B.), bad dei tat ha u snem 1925 ba ki la kynpham ia ka ba ka dei ban leit shong thait noh sha ki jaka kiba kham kynjah ban loh jingsumar. Kumta u Nehru u la mang ban phah ia ka sha Swit-zerland.

Ha u Lber 1926, u Jawaharlal u la lalam ia ka Kamala bad ia ka Indira ban leit noh sha Geneva da ka jhaid na Bombay. U Motilal u la maham jur ia ka Kamala ba kam dei ban doh feid ia la ka khun ha kane ka por loh labit, namarba ia kane ka jingpang la rah na kawei ka met briew sha kawei pat da kaba ladh ladh, da kaba ring mynsiem bad da ka hym sumar bha ia ka kyrkhah jong u nongpang.

Ha Geneva, la phah ia ka Indira sha kawei ka skul bapawnam ba kyrteng ka International school. Hadien khyndiat por ba ka la leit sha kane ka skul, ka Indira ka la nang ia ka ktien French, bad ka la la muja eh ruh bad ki paralok parajor ha kaba lalhka lang bad ha kaba la leit kiew lum thah,

Ha ka synrai u snem 1927, haba ki doktor ki la ai kaiphot ba ka Kamala ka la koit la khiah na kata ka jingpang T.B., u Motilal u la leit shaw ia ki dalade hi naduh na Geneva (Switzerland).

Ynda ka Indira ka la poi biang ha India ha u Nohprah 1927, ka la leit shong skul ha St. Mary's Convent ha Allahabad. Ynda ka poi iing na skul pat, ka ju khreh ia ka ktien Hindi dalade hi da ka jingiarap jong uwei u nonghikai uba u kpa jong ka u la buh kyrpang. Ha ka lyiur bashit lhop jong u snem 1928, ka Indira ka la leit sha *Musoorie*, bad dei ha une u snem ba la mih ki shithi balung mynsiem na u khulom ksiar jong u Nehru uba dang don ha phatok. Ia kine ki shithi la lum lang bad la shon ha kawei ka thup ba la ai kyrteng *Letters from a Father to a Daughter*, kiba long ki shlem kiba phrang ia ka jingthrang jong ka ban nang ban tip, bad ban kiew irat ha ka longbriew manbriew.

Arsnem hadien kata, u Jawaharlal Nehru u la kut jingmut ban thoh pat sa ia ka histori ka pyrthei naduh ki por bamynkulong kumah haduh ki por jong u, na ka bynta la ka jong ka khun. Ia kane u la thoh na ka phatok kaba kyrteng ka Naini Prison. Ia kine ki shithi jong u la lum lang ha ka kot bapawnam pyrthei ba la jer kyrteng *Glimses of World History*, kaba u la thoh khlem don ki kot librari ba un toh ktait. Halor jong kine ki shithi u la kynthoh tha ka khun jong u, "Phim dei ban pyskhat ba kiei kiei baron kiba nga



thoh ki long kiba shongnia bad kiba dei lut. U Iarmangkalai u ju kwah ban onge eiei ha man la ki phang, bad u ju leh mynleh ba u nang u tip barabor la ha ka jingshisha um bna eiei . . .” Ia kine ki shithi kiba iadei bad ka histori jong ka pyrthei, u Jawaharlal u la pynkut ha u Nailur 1933.

Kane ka jingai mynsiem jong u kpa, ka la ktik ia ka, ba ka dei ban khreh sani bha bin pa bin ia ka ktien Phareng, ka ktien Sanskrit bad ban pyntbit shuh ialade ha ka ktien French. Ka Indira ka la long ka nongpule kaba nguid naphang lin. Ka ju sngewtynnai ban pule ia ki kot Safans, ki khana parom, ki jinglathuh-khana shaphang ki briew bakhraw batri kum ka Joan of Arc, u William Tell, u Garibaldi, u Juarez bad kiwei. Ka bang ruh ban pule ia ki kot poitri jong u Oscar Wilde, u Victor Hugo bad kiwei. U kpa jong ka, u la mana ia ka: “Ka long ka jingmien kaba bha ban pule, hynrei nga suba ia kito kiba pule bun tylli palat ha ka por kaba khyndiat. Nga suba ia ki ba kim da pynleit jingmut ha kaei kaba ki pule, ba ki shu peit lyngba, bad ki klet noh ia kaei kaba ki la pule ha ki sngi kiba hashuwa.”

Ka shitarik u Kyllalyngkot 1931, ka la long ka sngi kaba pher bad kaba phylla na ka bynta ka Indira, naba dei ha kata ka sngi ba ka Indira ka, la ia khlad noh shipor na la ka jong ka kmie kaba ia dei ban leit sha phatoh na ka daw ki kam ield Ri.

Ha u snem 1928, haba ka Indira ka dang tang 12 snem ka rta, ka la kwah ban rung sha ka Seng Congress, hynrei ym shym la pdiang ia ka namarba ka dang rit than. Khnang ba kan loh long riewdkhot jong ka Congress, ka la dei ban kot ia ki 18 snem la kumno kumno. Haba kam shym lohla ban rung sha kane ka jylli ki nongieid ri, ka Indira ka la pyrkhat ban seng noh da kawei ka kynhun ki khynnah, kaba ka la ai kyrteng ka VANAR SENA-kaba mut ka *kynhun shipai jong ki shrieh*. Kane ka seng jong ki khynnah ka iarap ia ki nongtreikam ka seng Congress ha kaba leit sam ia ki byrta, ha kaba rah kyrwoh na kawei ka jaka sha kawei pat, bad da kaba peit kmang ia ka laid ka ieng jong ki pulit kiba long ki diengsympat ba jubor tam ia ki briew kiba ialch ban pynlailuid ia la ka Ri. Ha ka jingialeng banyngkong jong kata ka seng Vanar Sena, ka Indira kaba long ka shongknor, ka la ieng ban kren. Namarba bun than ki khynnah, ka sur jong ka ka la shu jah rngai ha ka jinghumhum hamham, kumta da ka jingiarap jong uwei u riew rangbah la rah ia ki ktien jong, ka sha man la ki kyndong jong kata ka mynshem. Kane ka seng Vanar Sena jong ki khynnah ka la long ka jingkyrkhu kaba khraw ia ki nongialch ban pynloh ia ka jinglailuid.

Arsnem hadien, kata ha u Rymphang 6 tarik 1930, U briew uba ka da feid butom, u Motilal Nehru u la khilad noh na kane ka pyrtet. Ka jingkilad noh jong u ka la long ka jingduh kaba khraw ia ka hi shimet. Ka jingfeid

jong u ia ka, ka la long kaba palat bad ma ka  
 ruh ka la ieid tyngkai bha ia u. Ka jingkhlad  
 noh jong u Motilal ka la long ka jingduh kaba  
 khraw ia ka ri India baroh kawei ruh.

Ha u snem 1931, ka Indira ka la synran ia u  
 kpa bad ia ka kmie jong ka sha Sri Lanka (Ka  
 Ceylon bamynshuwa) ban shong pynggad bad  
 shongthait shipor arpor, ban weng noh ia ki  
 jingsngewsih kiba la mih na ka jingkhlad noh u  
 Motilal. Ki Nong Sri Lanka ki la pdiang  
 burom ia ki, kum ki nongialeh pyrshah ka jing-  
 banbeifi bad ka jingkhñiot bor ia ka longbriew  
 manbriew.

Ynda ki la wanphai na Sri Lanka, U Nehru  
 da ka jingai jingmut jong u Gandhiji, u la phah  
 skul noh ia ka Indira sha Poona, ka skul ba la  
 seng bad pyniaid da ki khynnah ba la pas na ka  
 skulbah jong u Rabindranath Tagore. Kane ka  
 skul ka la long ruh kum ka kynja iingbasa na ka  
 bynta ki khun jong kito kiba jaleh ban pynloh  
 ia ka jinglaitluid ka ri India. Ia kane ka skul la  
 pyniaid da u Jehangir Vakil bad ka lok jong u.  
 Ka la long ka burom na ka bynta jong ki ban ai  
 iingbasa ia ka khun jong u Nehru. Ka Indira  
 ruh da ka jingsngewrit ka la bud thik ia ki ain  
 jong kata ka skul. Kane ka skul ka long kaba  
 pher bak ly bak na ki skul ba pyniaid da  
 ka sorkat ne ki dohlieh. Hangne, ki khynnah  
 ki trei ki krah da la ki jong ki kti, kin leh  
 mem leh sahep, ki bud shlip ia ki ain ka  
 skul, ki ialeh dril bad ki khublei ieid ia ka

lama Congress (ka dak jong ka India balait-  
luid) man ka step da kaba rwai artat ia ka  
jingrwai ieid ri VANDE MATARAM, kaba  
long ka kynja anthem jong ki riew ieid ri  
baroh naduh Makashang sha tduh ki krem ka  
Komorin. Ki Wakil ki la hikai ia ki khynnah  
kumno ban len lalade ; kumno ban iarap kyl-  
liang ia kiba donkam, kiba shitom, kiba kyr-  
duh bad ba kin long ki khun bashisha jong ka  
Ri ym tang da ka ktien hynrei da ka kam kaba  
kren kham jam.

Ka Indira ka la kmen eh ha kane ka jylli ki  
nongieit-ri, hynrei la ka sngewsuk katno katno  
ruh, ka jingtmang bad ka jingtympang ki nang  
bam kruiñ ia ka dohnud jong ka. Ka jingky-  
mawieid ia u Motilal, bad ki khubor ba ka shu  
lohsgew wurwur werwer ba ka kmie jong ka  
kam da shait da khlaifñ thikna, ki la pynlong ia  
ka ban leit sha ki jaka kiba long kyndong ban  
lam weibriew. Kito kiba ithuh ia ka naduh  
mynba ka dangrit, ki ju ong, ba ka long ka khyn-  
nah kaba rangbah ha ka jingmut jingpyrkhat bad  
ka bym ju da sngewtynnat eh ia ki biria ki birai.

Man man ba ka lohlah, ka ju peit lyngba ki  
kot khubor ban tip shaphang la ki kmie ki kpa  
kiba long ki rishot bah jong ka jinglah bah  
pynloh ia ka India kaba laitluid. Ka la long ka  
burom bad ka jingsngewsarong jong ka ban loh-  
lah ban lalapkhana shaphang ka jinglah jong  
ki kmie ki kpa jong ka ban wallam ia ka jing-  
laitluid ha ka ri baroh kayei.

Ka Indira ka wan na ka ling ka sem ka ba-  
don baem, kaba bun ka kynshew ka kyndiap,  
hynrei ka long ka khynnah kaba phikir bha ia  
la ki jong ki tiar ki tar. Ka da jngoh bha naduh  
u roba! rit haduh u let rit ba kin ym sepei. Ka  
sumar tyngkai ha ka juh ka rukom naduh ki ksa!  
ki thyrnia haduh ki kot ki sla. Ka jingbym long  
thurmur jong ka, ka long kawei na ki hok kiba  
paw tyngkreif ha ka jingim jong ka.

La bun makna ki jingsngewsih, ki jingshipa  
bad ki jingbymbiang ha kata ka Iingskul,  
ka Indira ka la pyrshang katlah katiai ban  
kmen bad ban ia shim bynta ha ki kam ki jam  
ha kata ka skul da ka jingpalei mynsiem. Haba  
la dei ban rah noh ia kata ka Iingskul na Poona  
sha Bombay na ka daw ka khlam ka ngoh kaba  
sdang ban rawang lyngba ki shnong jong ka  
Poona, Ka Indira ka la shim ia ka bhah kaba  
heh ha kaba iarap ban lum pisa na ka bynta ki-  
to kiba shah khñot ha kata ka khlam. Na ka  
daw ban ioh jingiarap, ka la kiew sha ki rynsan  
ialehkai ban shad ia ka jingialehkai ba la thoh  
da u Rabindranath Tagore kaba kyrteng ka  
*Ritu Raj*—kaba mut ka shalyntem jong ka syn-  
rai. Kane ka la long ka sien banyngkong bad  
bakhatduh ba ka Indira ka la kiew ia ki rynsan  
ialehkai.

Kawei na ki sap kiba paw shynna ha kane  
ka por, ka la long ka sap ban tre! na ka bynta  
ka imlang sahlang. Kum kawei na ki khynnah  
kiba kham heh, ka Indira ka la long ka nongra-

lam ha skul bad Ka ju shongknor ha ki jingfla-  
lang jong ki khynnah skul. Katba ka dang don  
ha kane ka skul, ka ju leit ruh sha ka phatok ka  
ba don ha Poona kaba kyrteng ka Yervada Jail  
ha kaba la set ia u Mahatma Gandhi Haba u  
Gandhiji u la rai ban shah jingit haduh ban da  
iap na ka daw ba ka sorkar dohlieh ka kwah  
ban pyniapher hapdeng ki kor-jait bad ki poh-  
jait, ka Indira ka la leh katba don ei la i buit i  
bor ban pynpaw ia ka jingsngewlem jong ka ia  
u. Ka skul jong ka baroh kawei hi ka la shah  
jingit sngewlem bad u Gandhiji shisngi, ki da  
mih na la ka Iing skul ban aibam aidih, bad ban  
pynsum pynsleh ia ki khunrit jong ki poh-jait.  
Kane ka la long kawei na ki daw kiba la pyn-  
kmen ia u Gandhiji—ban iohi ba ym tang ka  
sorkar, hynrei ba wat ki khunlung khynnah ruh  
ki sngewthuh bha ia ka jingangnud jong u.

Ka Indira ka la pas ia ka eksamin matrik ha  
u snem 1934. Haden khyndiat por, ka Kmie-  
kha jong ka, ka la pyrshang ban pynbeit ba ka  
Indira ka dei ban iapoikha poiman noh. Ka  
kmie jong ka pat, ka Kamala, ka la pyrshah doh-  
im dohiap ia kata ka jingangnud jong ka Kmie-  
kha jong ka. Da ka jingai jingmut jong u Nehru,  
ki la phah noh ia ka Indira sha ka Vishwa Bha-  
rati University ha Shantiniketan, ha kaba u  
Rabindranath Tagore, u myllung bapawnam jong  
ka Ri u long u nongseng bad u nongpynlaid.

Haba ka Kamala, ka la wan on ia ka sha  
Shantiniketan ha u nallar 1934, ka Indira ka la  
sngewphieng ban don hajan jong u briew ba la

ba nam pyrthei. Ka jaka ka long kaba ipher bak, kumjuh ruh ka ktien ka thylliej bad ka koh-shor ; hynrei hangne ka Indira kam shym sngew nongwei, ka la sngewjuh shisyndon.

Ha ka hostel jong ka, kaba kyrteug ka Sri Bhawan, ka Indira ka la sah lang ha kawei ka kamra bad laingut kiwei pat ki khynnah kynthei. Ha kane ka hostel jong ka Shantiniketan ym don shakri shakor. Ki khynnah dalade hi ki shet ki tiw, ki sait ki khlieng, ki sar iing sar sem bad ki pynkhuid ia ka jaka ka puta. Ki khio thiah ha ka por 4.30 shuwa ban mihsagi bad dang 6.30 ki la poi ha ki kamra klas jong ki. Ha kata ka hostel ym don ilektrik, ym don kor pynkhluit pyn-daitthah. Ki khynnah ki sum ki sleh da ka umpjah la dei hapdeng ka lyiur ne ha pach ka tlang. Ka la long ka jingim kaba eh dashisha.

Ha Shantiniketan, ka jingpule jong ka Indira ka la long kham hakmat barabor ban la ki paralok jong ka. Ka la loh ruh ia ka nam "Ka Theisamla basaw jong ka Shantiniketan" na u Lat, u Sir John Anderson, haba u dang leit ban jngoh ia kata ka skulbah ha u snem 1935. Kane ka kyrteug ka pynpaw la kawoi ka jingshisha : ba ka Indira nadeh kita ki por ha Kolej ka la sngewtyanat bha ban polo shaphang ka *socialism*-ka jingtabit labiang lang.

Ha Shantiniketan, ka Indira ka la nang ruh ban shad Manipur hapoh ka jingtabit hikai u Naba Kumar. Ma ka hi ka la sngewtyanat la kane ka jingshad namarba ka jam klasibak.

Ha u Iaitong 1935, katba ka dang ia praktis ia kane ka jingshad Manipuri, u Tagore u la khot ia ka Indira bad u la Iathub ia ka ba ka kmie jong ka, ka la kem shitom kynsan. Ka Indira da kaba jaijai, khlem treh nongleit synran, ka la leit hi na Calcutta sha Allahabad—"I papa i la hikai ia nga ban leit ban wan wat tang marwei ruh," ka la ong ha u Tagore. Hadien kane kam shym ioblad shuh ban leit biang sha Shantiniketan.

Ha u Jymmang 23 tarik 1935, ka Indira ka la synran ia la ka kmie sha Europe ban shah sumar bad ban shongthait. Ha kane ka khep, u kpa jong ka um shym lah ban ia don lang bad ki—naba u dang shahset ha phatok na ki daw ka jingfaleh laitluid kaba la sdang ban ih ha man la ki dong jong ka Ri. Ka Indira ka la poi bad la ka kmie ha Badenweiler. Hangne, ka jingkoit jingkhiah jong ka kmie jong ka, ka la nang troin shuh shuh. U Nehru u la poi sha kata ka jaka ha u Nailur 19 tarik. Kane ka jingleit poi jong u Nehru sha Badenweiler, ka la ai mynsiem shibun eh ia ka Indira.

Dei ha Badenweiler ba ka Indira ka la lakynduh ngung shi ngung bad u Feroze Gandhi, uwei na ki samla bashitrbem ieid Ri, uba ka Kamala ka da ieid eh. Une u samla u la ithub ithaw bad u la sdang ban ieid tyngkai ia ka Kamala naduh kawei ka ang ha ba ka Kamala ka la leit ban kren paidbah ban kyrsiew ia ka mynsiem ieid ri ha Bombay. Ha ka por ba ka Kamala ka dang shah sumar ha Badenweiler,



u Feroze u dang pule ha ka London School of Economics. Ka jinglaithuh ithaw jong u bad ka Kamala ka la khing ia u ba un poi man ka teng shajan ka jingthiah pang jong ka. Dei hangne ba u la sdang ban lakynduh bad ka Indira, kaba long ka nongsumar ba khlem tyng-kai lalade, ha kaba shakri synnia-sngi ia la ka jong ka kmie.

Ha u Kyllalyngkot 1936, la rah noh ia ka Kamala na Badenweiler sha Lousanne ha Switzerland. Hangua ka Kamala ka la khlad noh ha u Rymphang 28 tarik, haba ka dang dap 36 snem karta. La ka jingim jong ka, ka la long kaba lyngkot, ka la noh ia u synniang uba radbah sha ka thiar jong ka jinglah lailuid. Ki pateng pakit babun hara kin nang lai kyn-maw icid ia ka, kum kawei ka kongsan bad ka ksan-nam hapdeng ki nonglah lailuid.

Hadien ba la thang ia ka met jong ka Kamala ha Lousanne, ka Indira bad u kpa jong ka ki la shu leit shongkai pynklet noh ia ki jingsngewsih sharud ka pung Montreux. Khyndiat por hadien kane, u Nehru u la leit buh biang ia ka Indira sha England ba kan pyndep ia ki jingpule jong ka hapoh ka jingsumar suher jong ka Agatha Harrison.

Ka la long ka sien banyngkong ba ka Indira ka la dei ban shong ban sah marwei ha Ri nongwei, khlem don la ka kmie ban synrua ia ka. Donbok ba don u Feroze uba la pyrshang kaba don ei la i buit i bor ban pynbywagie,

ban pynkmen bad ban pynklet ia ki jingsngew-sih kiba dang ban jur ha ka mynsiem jong ka. U Feroze u la long kum u khun na ka bynta ka Kamala katba ka dang im, mynta ynda ka la khlad noh na kane ka pyrthei u la iohi ia ka 'mat mihpli ha ka khun jong ka.

Na ka daw ki jingkynmaw tymfang ia la ka kmie kaba dang shu khlad dang shen, ka Indira ka khlem lah ban pass ia ka Entrance Examination, ban loh rung sha ka Oxford University. Haba u Nehru u la loh ia kata ka khubor u la pynshur ia la ka khun phrangsngi ba kam dei ban duh jingkyrmen; Kumba ma u hi u ong, ki eksamin hateng hateng kim da long ki diengkot kiba thikna haduh katta katta.

Ha ka synrai u snem 1937, ka Indira ka la wanphai sha India ban fakynduh ia la u kpa. Mar fakynduh ia ka, u Nehru u la ban jur ba ka dei ban leit ia leh biang ia kata ka eksamin kaba kam shym lait. Ha kita ki khyndiat bnai ba ka la sah ha India, u Nehru u la phah ia ka ba kan leit ban pyajana i ka subjek Latin hapoh ka jinglarap jong u Phadar C.E. George uba don ha Allahabad. Hadien laibnai da ka jingminot, ka la lah ym tang ban thoh ne ban pule hynrei wat ban kren ruh shaid shaid ia kata ka ktien.

Kum ka jingpynkhreh na ka bynta ka Eskamin ban loh rung sha ka Oxford University, U Nehru u la phah ia ka Indira sha ka Badminton School kaba pajik na sor. Ha u rymphang 1938, ka la leit rung sha ka Somerville College jong ka Oxford University, Hange ruh kam da angew-

suk eh, na ka daw ka jingtympang kaba shyit shi shyit la ka. Kumta, ka Indira ka la rai ban leit phai biang nob sha India.

Ha ka tlang jong uta u snem, ka Indira ka la wanphai sha India. Tang mar shu la iuh kjat ha ka 'dewbah, ka la leit mar mar ban ai kyrteing ialade ban long ka riewdkhot jong ka seng Congress, namarba ha kata ka por ka la kot sha ka 21 soem ka rta. Hynrei ka khlem tyrpeng kam tyrpeng jam namarba kam da koit da khlaifi thikna.

Hadien san bnai ka la leit phai sha England ban pyndep la ka jingpule jong ka.

Ki snem kiba bud, kiba ka la pynleit ha England, ki la long ki snem kiba la phrang la ka ba man la ki dong. Dei hangne ba ka la loh lad ban iashim bynta ha ka lypung ka Indian Student Union bad ban lohruing ha ka mynshem jong ki nonglaleh laithuid.

Ha kawci ka sugi u Krishna Menon, u la phone sha ka ban wan khnaang sha ka jingla-lang ki Nong India bad ban pule la u kyrwoh na u kpa jong ka. Ka Indira da ka jingban eh jong u ka la leit, hynrei haba ka la poi hangta, ki la kyntu la ka ba ka dei ban kren ruh shikyntien arkyntien. Kane ka la pynkelmar jingmut la ka thlim, namarba kam pat ju mliem ban kren paidbah. Jait ba baroh baroh ki la pynbor eh, ka Indira ka la leing, hynrei khlem mih sur. Uwei u nongbuid u la pynta na ka

liang u paidbah—"ka kren ne ka pah khnai." Kata ka jingren biria jong uta u briew ka la pynrkhie ia baroh shaid. Da ka jingsngewleh-raiñ ka Indira ka la shong noh pynkloi sbhek.

Ki sngi jong ka ha England, kin jin da long kiba tym pang bad kiba pynpang mynsiem, lymda don u Feroze Gandhi uba ju synran ia ka ha kti ha kjat ha ka leit ka wan, ka laid kai, ka peit kai, ka leit bam leit dih sogewbha bad kumta kumta ter ter. Ka jingieid jong ki ka la nang ih man la ka sngi, haduh ba ka thong jong ka jingīapyrkhat jong ki ka la long ka jingīapoikha poiman ha ka burom.

U Feroze, u long u samla briew uba shynrang bha. U la leit teng sha Spain bad sha Russia ha ki sngi shongskul jong u ha England. Shisien u la leit ruh sha Paris (France) kum u nongaikhubor na ka bynta ka National Herald. Dei hangne ba u la shah kem bad ba u la shahset shipor arpor ha ki pulit, ba ki suba ba u dei u dkhot jong ki seng pynkhih pyrtnei.

Ha ki rengmat ka thma bah ba-ar, ka Indira ka la kut jingmut ban wan phai noh sha la Ri. Kumta, da ka jingsynran lem jong u Feroze, ki la mih da ka jhaid bad ki la poi ha ka kadlieng Bombay ha u Lber 1941 da ka buek basaiñ. Ha kadlieng, ym shym don briew ban khublei wansuk ia ka, namarha u kpa jong ka u don ha phatok na ka daw ka jing-lakhiiñ taitluid.

## LYNNONG

### 5

#### KA JINGIM KABA THYMMAI

"Haduh ba ngan da dap khatphra ne khatkhyndai snem ka rta, nga la raikut ba ngan ym shongkurim," ka la ong ba uwei u briew uba la interbiw ia ka. Hynrei kat ban da poi u snem 1941 haba ka la wanphai hadien ka khrehkot khrehsla na England, ka la rai da kumwei pat, ban iapoikha marmar noh hi bad u briew, uba ma ka ka mon bad ka ieid.

Ynda u Nehru u la lait na phatok, ka Indira ka la iathuh ba u ia la ka jong ka rai. U kpa jong ka u la pisa jingmut shibun haba u la ioh ia kata ka khubor, naba u la angnud ba ka Indira ka dei ban iapoikha poiman bad u samla uba na ka ling ka sem ki bahab bahaiñ, kiba don spah don hajar, ba kam dei ban shu jied khlem da pyrkhat bha. U Nehru u la sngewthut ruh namarba ma u bad ka ling ka sem jong u ka wan na ka jait Brahmin katba u Feroze u dei u Parsi—ka jinglapher ha ka niam ka rukom. U Nehru u la ai jingmut ia la ka khun ba ka dei ban apshuwa shipor arpor, ba kan da peitthuh bha la kañi kaba kamut bad ban shimti da kaba pyrkhat sañi bha. Ka jingmut jong u ka long ba na kata ka por, ka lah ban iakhynduh la kiwei pat ki samla India babun, kiba lah ban dei ka bhab jong ka.

Ka Indira ka la rai, bad haba ka la rai, ym don ba lah ban buh diengkhang diengpyngkiang ban khang lad khang lynti la ka. Ka la long kumjuh ha kane ka jhan (crisis) jong ka jingim jong ka. Wat la don bun kiba la kern pyrshah da ka jingtohmet, ka Indira kam shym pynsngap la ki, hynrei ka la laid shaphrang ban feid bad ban jied la u briew uba ka sogew ba u long ka bhah jong ka.

Ha ka 26 tarik u Lber 1942, ka sngi *Ram Navmi* (Ka sngi kha u Ram), kine ki arngut ki samla ki la la poikha poiman da ka burom katkum ka riti lehniam ki Hindu. Ym don ka leh rong leh tamasa, ka rong ka rup ne ka khawai dawai kaba palat. Ha kata ka sngi jingkmien la poi tang khyndiat ngut ki briew ba la dawot (invite) kyrpang. La ka long ka jingleh kaba ym da don rong don rup, hynrei ka la long ka sngi kaba dap da ka jingshongkun, ka jingdonburom bad ka jinghun.

Mar ladep ka lehniam lehrukom jong ka poikha poiman, hadien khyndiat segi, ka Indira bad u Feroze ki la leit kai sha ranab ki lum Kashmir tang arngut hi, ban plie la ka juk bathymmai jong ka jingim jong ki.

Ynda la dep ki sngi shuti halor ki lum pyngegad jong ka Kashmir, namarba don ki jingujor pyrshah la ka jingbit jingbiang, ka jingpora aini ka poikha poiman jong ki, kine arngut ki samla ki la leit ruh bakumat ka bor sorkar na ka byata ka *Chil Marriage*, khang

ban khang khyrdep ia ki jingpharep sniew jong ki bried kiba shu ap rhah tang kumno ban ioh pynsniew ne ban pynjot pynpra. Ka Indira bad u Feroze ki la leit iaid lyngba ia kane ka Civil marriage khlem da len ia la ka jong ka jingngeit. Ynda ki la poi ha Allahabad, ki la mih iing noh na Anand Bhawan sha kawei ka iing rit ba shu biang kaba don hajan.

Ha u snem 1942, Jymmang, u Mahatma Gandhi u la sangot : "Mih noh na India" (Quit India), ha kaba ma u lang bad ki nongieid ri baroh ki am ban ioh noh hi ia ka jinglailuid ka Ri India na ka jingsynshar jong ki dohlieh. Ka Seng Congress ha ka jingialang paidbah jong ka ha Bombay ha u Nailar 7 tarik, ka la pdiang ia kane ka sangot jong u Gandhiji bad ka la rai ban ialeh dohim dohiap ban kot sha kata ka thong. Ka Indira bad u Feroze ruh ki la ia shim bynta ha kane ka jingialang da ka jingkut jingmut ban trei bad ban imsnigi na ka bynta la ka jong ka Ri.

Hadien kata ka jingialang, ka Indira ka la leit phai noh sha Allahabad katba u Feroze bad ki lok jong u ki la sdang ban ieng ialeh. Kine ki la long ki snigi jong ki jingtieng jingsmiej baharukom na ka bynta ka India baroh kawei, khamtam eh ia ka iing ka sem jong ki Nehru bad jong ki Gandhi. Ki pulit phareng ki la ap miet snigi ban pahara sawdong ka iing jong ka Indira, ban jngoh ban syntiat ia ki nongwan nonglekt kiba rung ba mih nangta.

Haba iohi ia kine ki kynta bajawumat jong ka Ri, ka Indira ka la sngew ha lade ba ka dei ban shynrang mynsiem ban noh jynsur la i bor ha kaba ieng syndah ka Ri kaba pisa lynga da ki jingbanbeifi baharrukom. Ynda ka poi ha Allahabad, ka la shem ialade ba ka long ka nongsumar ia ka iing ka sem kaba heh bad kaba thylli namarba ki kmienah kmiesan jong ka ruh ki la shah tan ha ki pulit. Dei ha kine ki sngi ba ka la pynrieh bad ka la iada ia u Lal Bahadur Shastri na ki pulit ha ka iing jong ka. Ka la lah ban buhrieh ia u ha la iing da kaba ong ia ki pulit haba ki wan jurib ki wan kylli, ba ha iing jong ka don tang uwei u briew bad uta ruh uba pang khrew bad uba shu thiah.

U Feroze, da kaba riam kum u shipai, la u fiuhmoh fiuhmaifi u la poi ha Allahabad khlem da hap ha kti ki pulit kiba amsia ban ioh teh ioh khum ia ki nongialeh laitluid kum ma u. Ynda u la poi ha Allahabad, u khlem ioh ban leit iasyllok lang bad ka lok jong u, namarba don bun ngut palat ki pulit kiba pahara ia ka iing ha kaba ka Indira ka sah. La ki kynroh ki jrong, wat la ym don jingkieng, la jynjar ka lynti, kumno re da kino ma ki lad, ki ju iakynduh man ka teng.

Ka Indira ka la iohmad nyngkong ia u dieng pulit ha ka madan jong ka Erwin Christian College ha kaba ka la dei ban kren ia u paid byllien. Mar ia pynher ia ka lama Congress, kaba long ka dak jong ka jaitbynriew balaitluid ha kata ka por, ki pulit ki la poi bad ki la bom naphang



kat ia uba ki ioh, la dei ki shynrang ne ki kyn-  
thei, ki rangbah, ki samla, ki tymmen ki kro  
ne wat ki khynnah ruh. Dei hadien ba ka la  
iohmad ia ka *jingbtiar* kita ki dieng pulit ba ka  
Indira ka la nang shynrang mynsiem shuh shuh  
ban aiti wat ia la ka jingim na ka bynta la ka Ri.

Ym slem hadien kata ka jingjia, Ka Indira  
ka la 'sngew ia ka hamsaia ba ki pulit ki la ioh  
ia ka hukum na ki bahalor jong ki ban kem ia  
ka. Da kaba lum kaba lang khyndiat tylli ki  
jaiñphong bad ki kot ki sla, ka la mih soit na  
Anand Bhawan bad ka la leit sha ka jaka shong-  
rieh jong u Feroze bad u Malaviya. Kine ki lai-  
ngut ki la sdang ia kawei ka steshon wireless ba-  
rit na Allahabad ban ai khubor ia ki jingialeh  
laitluid Ri. Kane ka jingshongrieh jong ka ka  
khlem neh slem, naba ha u Nailur 10 tarik 1942,  
ka la rai ban leit kren paidbah ha kawei ka lym-  
pung ba la pynbeit da ki Nongialeh laitaluid Ri,  
ha Allahabad. Ki briew ki la sdang ban ia lum  
ha ka por 5 baje janmiet bad haba ka Indira ka  
dang shu kren shikyntien arkyntien, ki pulit  
phareng ki la poi da ki trok ban kem ia ka bad  
ia kita ki nongieid Ri. U Feroze uba dang mut  
ban shu leit sngap kai na kawei ka iing bamar-  
khap, haba iohi ia uwei u pulit ba u pynap da  
ka suloi na ka maloi khlieh jong ka, u la mareh  
ban iada ia la ka lok. Shen ki pulit, da ka jing-  
sngewkmen bad ka jingsngewhuit jrut ki la rah  
ia ki baroh arngut sha phatok.

Ka jingim hapoh phatok ha ki khyndai bnai  
kiba bud, ka la long kaba jynfar sat. Ka truat

ka shu jaw um miet-sngi tang mar ia hap slap malu mala ruh. ka sbor dewbilat kaba hap man ka teng na ka sad, ka la long kaba pynmysaw hateng hateng ia baroh kiba ia don ha kata ka phatok. Mynsngi ki iohlad ban leit rud ha kawei ka jaka hapoh kompon, hynrei mynmiet ki hap leit hi ha iing naba ym shah ia ki ban mih na iing shabar. Kaba kham pyntriem ha kine ki phatok ka la long ki khñiang ki puit, ki jakoid, ki lambit, ki khnai bad wat ki bseñ ruh hateng hateng. Ha phatok ki shet ia ka bam ka dih la jong. U khaw u kba ki ioh da thew khlieh, u khaw ba la khleh milai lang bad ka jakhlia jakhleid bym ithuh ithaw; kaba kynthup ia ki maw, ki shyiap, ki ñiut ki ñier, ki ksai byrni, bad kumta ter ter. Baroh ki la dei ban ia sah lang lymbrum ha kawei ka kamra lynter, kaba la set op ym tang na ki khubor hynrei wat na ki jingdonkam kiba shimet ruh.

Ka phatok jong u Feroze, ka don hajan hangta bad da ka jingbit jong ka sorkar, ka Indira ka la iohlad ban iakynduh ia u jan man la ka talaw. Ka la long kaba pyntriem khait ia ki kynthei ha ka phatok jong ka Indira haba ki ju iohsngew teng teng ia ka jinglynñiar jong ki samla shynrang kiba shah bom, shah thab bad shah kynjat ha ki pulit bad ki nongap phatok.

Ha u Jymmang 5 tarik, ka Nongsumar phatok ka la phah khot ia ka Indira bad ia ka kmienah jong ka, kaba la shah set lang ha ka juh ka phatok sha ka kamra ophis jong ka. Ka la iathuh ia ki ia ka rai ban pyllait noh ia ki.

Kumta ha ka 13 tarik ki la ioh ban ring myn-  
 siem sa shisien ia ka lyer khuid lyer pyngngad  
 balaitluid kaba shlei ia ka mariang jong ka Ri.  
 Ha kito ki bnai kiba ka Indira ka la don ha pha-  
 tok, ka la hikai ia kiwei pat ki longkynthei ban  
 nangban thoh ban tar bad ban pule. Nalor kata  
 ka la pynlut ia ka por jong ka, ha kaba pule  
 bun tylli ki kot. Ngi lah ban kylli balei ba ka  
 sorkar phareng ka da set slung sa ia ki kynthei,  
 hato kam biang ban set tang ia ki shynrang ?  
 Da kaba set ia ki kynthei, ka sorkar phareng  
 ka la kwah ban hikai ia ki nong India, ba ki  
 kynthei kim dei ban ia tuklar ia ki ka n sorkar.  
 Hynrei kane ka bym lah long, namarba ym  
 dei tang ki shynrang hynrei wat ki khun kynthei  
 ruh ki long ki Khuo jong ka Ri, bad kum ki  
 khun ki sngewdei bad ki shonghok ruh ban leh  
 eiei na ka bynta la ka Ri.

Ha u Nailar 1943, la pyllait noh ia u Feroze  
 na phatok. Ka la long ka jingiasyllok shi ing  
 kaba shoh mynsiem. Kumta ki la leit shong leit  
 sah ha Allahabad hangta ka Indira ka la kha  
 ia u Rajiv shisnem hadien, kata ha u Nailar 20  
 tarik u snem 1944. "Na ka bynta kano kano  
 ka kynthei briew ka jinglong kmie ka long  
 ka jinghun kaba khraw tam." la ong ka Indira,  
 "Ban wanlam sha ka pyrthei ia ka jingim ba-  
 thymmai, ban iohi ia ita i jingjanai barit,  
 bad ban phohsniew shaphang ka jingkhraw  
 jong i lashai lashiengi, ka long ka jingpyrkhat  
 kaba pyndap ia ka mynsiem da ka jinglyngngoh  
 bad ka jingkmien."

Ym slem hadien ba ka la kha ãa u Rajiv, la khie buk ka jingphlei snam kaba shyrkhei hapdeng ki Musulman bad ki Hindu. Ka Indira ka la tur sha kata ka lympung ban tem ãa kata ka ding-bah da ka mynsiem kaba shynrang. Ka jingpyrshang jong ka ban wanlam biang ãa ka jingsuk bad ka jingïasngewthuh jingmut kam shym pulom ei, hynrei ka la sei ãa ki soh kiba bang bad ki bathiang. “Nga tip ba ka edukeshon kaba phi la ïoh bad ki snem kiba phi la don shajngai na la ka Ri kin ym long kiba lehnohei,” la kren ïaroh u Gandhiji.

Ha u snem 1946, u Nehru u la leit noh na Allahabad sha Delhi. Dei ha Delhi ba ka la kha shwa-bnai ãa u khun ba ar jong ka, u Sanjay. Mar ãa kha ãa une u khun ba ar, la mih biang ka jingïashrut bad ka jingïa um-snam ha Delhi. Ka Indira sa shisien ka la trei jynsur mynsiem ban wanlam ãa ka jingïasuk ïasaiñ bad ka jingïasngewthuh jingmut hapdeng ki khun ka Ri.



## LYNNONG

### 6

#### KA INDIRA HA KA INDIA BALAITLUID

Ha ka 15 tarik u Nailar, ka India ka la ioh ia ka jinglaitluid, bad la jied ia u Jawaharlal Nehru kum u Myntri Rangbahduh (Prime Minister) banyngkong jong kane ka Republic. Ka la long ka jingkmén kaba khraw ia ka Indira ban iohi ia la u jong u kpa ha u ieng ha ka kyrteng bad ka nam jong u babun u balang ban shimti noh ia ka bor synshar khadar na ka kti ki dohlieh, hadien ka jingialeh kaba la neh da ki phew snem. Ka jingiaumsnam ha ki sngi kiba bud hapteng ki musulman bad ki Hindu ka la khring biang ia ka ban leit long ka nongpyniasuk. Haba u Gandhiji u la poi marmet sha Delhi ban pynsuk-pynsaiñ bad ban sop ban spaiñ ia ka jinglhieh ka jinglashun iapen hapteng kine ki ar kynhun, u la ong: "Nga la kyrpad ia ki babun kiwei pat bad ki la ia jubab 'Hooïd Bapu', hynrei nga tip ba ki artatien." Da kaba shaniah ha ka bor jinglah jong ka, u la phah ia ka ba kan long ka nongpynsuk pynsaiñ bad ka nongpynshngaiñ ha ki jaka kiba jy llei da ka iashun iapen.

Ha u kyllalyngkot 29 tarik 1948, ka Indira lang bad ka kmienah jong ka, da kaba ialam lang ia u Rajiv, ki la leit ban iakynduh ia u

Gandhiji ha Bengal. Ka la long shisngi shuwa ba u Gandhi, u Rishot-blei ka Ri un shah siat iap ha u Nathuram Godse, ha ka sngi kaba bud. Ma ka, bad u khun jong ka, ki la ioh ia ka jingkyrkhu kyrdoh na u Gandhiji. Ka jingkyrkhu kyrdoh khatduh shuwa ba un leit phai noh sha ka mei ka iaw, u ñi u kong la jong.

Haba u Nehru u la shimti ia ka kam Myntri Rangbahduh, la rai ba u dei ban leit shong leit sah noh ha Teen Murti House, kaba long ha shuwa, ka iingshong jong u Commander-in-chief jong ki British-Indian Armed Forces. Ka la long ka iing kaba heh bad kaba itynnat, kaba long thik kum ka iing paki dulan. Ynda u Nehru u la shimti ia kata ka iing, ka Indira kum ka nongsumar iing sumar sem jong u Nehru, ka la weng lut ia kita ki durmot bad ki jingsah kynmaw bap̄her jong ka sorkar Bilat kiba dang dap ia ka iing ka sem. Ynda la weng ia kita kiei kiei baroh, ka Indira ka la pyndap ia kata ka iing kaba la ithylli lyngkrang da ki sim ki doh bad ki mrad ki mreng ba laiphew jait. Ka la long ka jingieid jong u Nehru ia ki mrad ki mreng kaba la pynlong ia ka khun jong u ba kan ieid ia ki kham palat.

Ha Teen Murti House, ka Indira ka la dei ban peit ban jngoh ia ki kamra ba kin beit kin biang, ka da phikir ban pynkhreh ia ki jingbam kiba bang bad ha ka juh ka por da kaba pyrkhat ia ki nongwan nongleit la ki dei kiba bit ban bam doh, ne la ki pang ki shitom bad ki donkam ka bam kaba kyrpang.

Ha ka por ba ka long ka nongsumar iing ha Teen Murti House, ka Indira ka la synran ia u kpa jong ka ha kaba leit jngoh ia ki dong ka pyrthei bafar. Ka Indira ka la leit lang bad u Nehru sha ka General Assembly jong ka United Nations ha u Naiwieng 1948, ha kaba u la kren pyrshah ia ka jinglehbeia na ka daw ka rong snieh doh. Dei hangne ba u la kren kyntu ba dei ban pynwai noh ia ka mynsiem kob ki nongbuhai shnong. Ha u snem 1948-49, ka la synran ia u sha ka Commonwealth Prime Minister's Conference. Ha u snem 1949 ka la synran ia u sha America, ha u Iaiong 1950 sha Pakistan, ha u snem 1954 sha China bad ha u snem 1955 sha ka Bangdung Conference bad sha Russia.

Ka sien banyngkong ba ka Indira ka la leit jngoh pyrthei marwei khlem la u kpa, ka la long ha u snem 1953, haba ka la leit sha Russia bad kiwei de ki jaka bamarkhap. Ka Indira ka la khring ia ki matlong jong ki Nong Russia baroh kiba la fiiew ia ka kum kawei ka riewkbraw. Kane ka la paw shynna na ki shithi kyrpad jong ki longkmie ka Russia ban shah ba kin pynkyrteng ia ki khun jong ki da ka kyrteng jong ka.

La ka Indira ka bunkam ha iing bad habar, kam ju leh pat ia la u kpa bad ia ki arngut ki khun kiba dang khie dang saq. Ka hi ka ong kumne : " . . . Ym pher la nga bunkam katno katno ruh, ne nga thait nga sogewshitom katno katno ruh, nga ju loh por ban lalekai bad ban pule ia ki kot jingathuhkhana ha ki khun jong nga".

Ha u snem 1950, la jied ia u Feroze kum u dkhhot jong ka Dorbar Thawaiñ (Parliament). U la poi sha Delhi bad u la shong la sah bad ka ha Teen Murti House. Shuwa kata, u Feroze u la kyntait ban leit shong noh sha Delhi bad u la ban ruh fa ka Indira ba ka dei ban sah ha Allahabad ym ha Delhi. Ka Indira kaba la kham ieid ia u kpa, ka la kwah ban synran ia u-u bapli uba sah marwei khlem paralok, khlem nong-synran naduh ba la khlad noh ka kmie jong ka, ka Kamala Nehru. Kumta ka jingleit shong leit sah jong ka sha Delhi bad u Nehru ka la long kaba u Feroze u la pyrshah eh ha kaba sdang. Bun kiba la kylli, Balei haba kumta kam shym la kohguh ia u ? Don ki kritik kiba ong ba ha kata ka por ka la khuslai eh ia ka jingkoit jingktiab bad ka jingbunkam jong u kpa jong ka. Ka la sngew ba ka dei ka kamram jong ka kum ka khuh phrangsngi ban don ha kti ha kjat jong u bad ban aibor ia u. Ka la sngew-thuh shai ruh ba un ym lah ban im slem lymda don bakyrshan namarba u la noh ka met ka phad. Don pat kiba tynruh ia kane ka jingkylli: Hato kam ieid ia u Feroze, u tnga jong ka uba ka fa jied mon ban fa long kawei shi jingim ? Ka Indira ka jubab ba ka ieid tyngkai eh ia u. Ka lah ban long ba ka la kham jan sha u kpa ban sha u tnga jong ka, da ka jingpyrkhat ba u kpa jong ka u kham donkam fa ka ha kata ka khyllipmat ban fa u tnga jong ka, bad shisied ba u la leit noh na kane ka pyrthoi - kan im ban shakri janom tang fa ia u tnga.

U Feroze, u la shuh jied sha ka Dorbar thawaiñ (Parliament) ar synshong mar bud, kaka



ha u snem 1952 bad 1957. U la long uwei na ki rishot ki tympha jong ka Congress Socialist Forum. U Feroze u la long u borbah. U la loh ia ka jingiaroh na man ki dong ki liang, khamtam eh na ka daw ka jingpynpaw paidbah ia ka jingsniew kaba kbih ia ka Bharat Insurance Company bad dei ma u uba la trei shitom ban wanlam ia ka aifi ban *nationalise* ia ka. Kumta naduh u snem 1955, u la kylla long uwei na ki heh ki haiñ ka India ba la ithuh paidbah, na ka daw ka jingbit bad ka jingbymriej jong u ban ieng na ka bynta ka jingshisha. U Feroze u la feid burom ia u Nehru, hynrei um ju sangap jar haba um iahapjingmut bad ki rukom pyniaid kam pyniaid jam jong u. Na kata ka daw, u la shem jingeh shibun ban shong ban sah ha Teen Murti House lang bad u kthaw jong u

Ban shu kren lyngkot, ka jingim jong u Feroze kam shym long kaba suk kaba saifi, teng teng u la dei ban mad ruh ia ki jingmong kiba kthang. Kane ka ju jia khamtam eh ha ki khawai ki dawai, ha kiba ka lok jong u, ka Indira, ka ju shah khot katba ma u pat um ju loh wat shikyntien ruh na la u jong u kthaw. Don ki por haba ma u ruh u poi sha ki khawai dawai, ba katba ka tnga jong u ka loh ia ka jaka kaba kham bit kham biang, ma u pat u hap shong ha kyndong, Kumta ban lait na ka kajia majia, u Feroze u la leit shong noh ha ka ling ba la mang kyrpang na ka bynta ki M.P. Dei hangta ba u ju khot ia ki jingialang bad ba u lakyuduh brieu da kaba suk hynsien.

## LYNNONG

### 7

## KI KJAT SNGI PHYRNGAB

Ha u snem 1955 katba ka India ka dang don ha la ka kamra thiah na ka daw ka jingpang balong khlieb, U U.N. Dhebar uba long u President jong ka Indian National Congress bad u Lal Bahadur Shastri ki la wan tyrwa ha ka, la ka mon bad ka kloi ne em ban long ka riewdkhot jong ka Congress Working Committee. Da ka jingban eh jong ki, ka Indira ka la mynjur. Da kaba shimti ia kane ka kyrdon jingim bathymmai, ka Indira ka la sdang ban shat phyrnai ha ka dongdit jong ka sañ hima sima. Nangne ka la pynpaw ialade kum ka briew kaba lah kaba iai, kaba tbit bad kaba nang ban pynñaid kam pynñaid jam.

Shuwa kata, naduh u snem 1945, u Govind Ballabh Pant, u Nongialam ka seng Congress na Uttar Pradesh, u la tyrwa la ka ban ieng kum ka M.L.A., hadien pat kum ka M.P. na ka juh ka konstituensi: hynei ka Indira ka la kyntait.

Ha u snem 1951, ha ka General Election banyngkong jong ka India. Ka Indira ka la farap ia la u kpa da kaba leit na kawel ka jaka sha kawel pat ban kyntu ia ki briew ban ied ia u. Kat ban da poi ki General Election u snem 1957

bad 1962, ma ka ka la don ha ki rynsan kren paidbah bapher ka seng Congress. Dang nyngkong eh, ki nongsngap ki la duna hyorei katba nang laid ki sngi ki ia, ki briew ki la nang tuid ban sngap ia ki ktien padiah jong ka.

Ka Indira ka la long ruh ka nongtreikam bashongshit bha jong ka Women's Department of the All India Congress Committee, bad ka ju pynleit la ka por ha kaba hikai ia ki longkmie kumno ban lehkhuid lehsuba, ban nang ban aibam aidih ia la ki khun ki kti, ban thung jhur thung jhep ha ka kper rit kper ria kaba don ha kyrpong iing bad kumta ter ter.

Ha ki snem kiba bud, ka la long teng ruh ka President jong ka All India Youth Congress, ka dkhoh jong ka Party Sub Committee on Economic Planning, Small savings bad ka Congress worker's training.

Ha u snem 1959, 2 tarik u Rymphang, katba ka Indira ka dang leit jngoh ia ka konstituensi jong u kpa jong ka ha Uttar Pradesh, ka la ioh ia ka khubor ba la jied paidbah ia ka han long ka President jong ka Indian National Congress, hadien ba u U.N. Dhebar u la ieh kam noh. Kane ka la pyri ia ka jingpaw khmat jong ka bad ka jinglah jong ka ban trei ban ktah ha ka rukom kaba u paidbah u sngewtyngat. Kumta, haba ka dang dap dang tang 41 soom ka rta, ka la long ka President jong kane ka Party bafar ba la seng naduh u snem 1955. Ka Indira ka la

long ka kynthej kaba saw ban long ka shongknor bad ka nongialam ha ka histori jong kane ka party. Ka la shimti ia kane ka lyngkor bakhia na U.N. Dhebar ha Delhi ha u rymphang 1959.

Ka Indira ka la bat ia kane ka kam President khatwei bnai. Haba ki la tyrwa ia ka ban tyrpeng biang ia kane ka juh ka kam hadien kita ki bnai, ka Indira ka la kyntait bad u Nehru ruh u khlem pynbor ia ka ban shimti ia kata ka jingbakhkhieh.

Ha kita ki khatwei bnai jong ka jinglong President, ka Indira ka la pynpaw ia la ka jong ka jinglah ban pyniaid ia ki kam ki jam da kaba tohi jngai bad da ka bashlur ban kitkhieh ia ka bha ne ka soiew. Ha kane ka por la jia artylli kiei kiei kiba la pynpaw ia ka rong bashisha jong ka. Kawei ka dei ka jinglakajia majia ha Bombay, kaba la mih na ka daw ka jingia-thut ha ka ktien ka thylliej. La pynkhamti ha ka ba kan leit jngoh bad ban ai ia ka kaiphot halor kata ka jingshem jong ka. Ha kaba leit marmet sha Bombay ban thew ban woh hi dalade ia kita ki jingjia, ka Indira ka la kren paidbah ha palat 150 tylli ki jingialang. Dei ma ka, kaba la frei shitom da ka jingtohi jngai kum ka Iarmangkalai bashisha ban pynbor ia ka Congress Working Committee ba dei ban phiah noh ia ka Bombay ha ki ar tylli ki jylla, kata hapdeng kiba kren ia ka ktien Mahathi bad ka ktien Gujarati. Kumta la mih ki state Maharashtra bad Gujarat.

Nalor kane ka kynrum kynram, la mih sa  
ka jingla thut ba Kerala hapdeng ki dkhoh jong  
ka seng Congress hi. Ka la long kaba pynpisa  
mysiem ia ka seng Congress, haba ka Commu-  
nist Party of India ka la loh 35% ba ka Kerala  
Assembly bad da ka jinglarap jong ki dkhoh  
bym don seng, ki la pynlong sorkar. Ka seng  
Congress ka la loh ia kane ba ka long kum  
ka dak jong ka jingbymshamiah shuh ki brieve  
ha ka jingialam jong ka.

Ha ka Elekshon u snem 1959, ka seng Com-  
munist Party of India hapoh ka jingialam jong u  
E.M.S. Namboodripad, ka la loh 43% ( Kata 8%  
shuh ban ia kaba ka la loh ha u snem 1957 ),  
da kaba pynba ba ka suk ka saifi ka lah ban  
mih tang na ka jingsynshar ka sorkar kaba bat  
ia ki aifi jong ka jinghikai komunist. Kane ka  
la long pyrshah ia ka riti synshar ( Constitution )  
jong ka ri India kaba la mynjur da baroh lang  
ban bud ia ka *Socialistic pattern of society*.  
Haba ka Indira ka la leit jngoh ia ka Kerala ha  
u snem 1959, ka la shem ba kane ka jylla ka la  
kylla bak ly bak. Ha ki skul, ha ka jaka jong  
ki kot kiba fadei shaphang ki nonglaleh laeluid  
Ri la pynmih bujli pynban da ki kot kiba dei  
shaphang u Lenin, u Stalin, u Mao Tse Tung;  
da kaba pyni ba kine ki long ki nongpynim ia  
ki brieve kiba shuh loh roit ba kiba donbot.  
Kaba la kham ma shuh shuh ban ia kata, ka  
la long ka jinghikai ba ki pashat ha ki rit ki ria,  
ha ki kynnath ki samia ba ka Ri kaba lah ban  
pynait ia ia Ri Nong India dei tang ka China.  
Kane ka long kaba ha bad kaba myasaw en ia

ka India baroh kawei hi, kaba dang sha sdang ban khie ban san. Nalor kita ki jinghikaf pynjem rngiew-Ri, ka sorkar Communist ha Kerala ka la leh thombor shaba palat halor ki briew jong ka jylla ha ki liang kiba bun. Ka Indira ka la kren kynthah ia ka sorkar Kerala ha doh bad dei namar ka jingiohi jngai jong ka, ba la pynjari ia ka jingsynshar da u President ha kata ka jylla ha u Naitung 31 tarik 1959.

Haba ka Indira ka la wanphai na Kerala, mar ia iuh kijat ha Delhi ha ka por II baje mynmiet, ka la ioh ia ka khubor basngewsih ba la rah noh ia u Feroze Gandhi, u lok jong ka sha hospital namar ba sangeh kynsan u klong-snam. Na ka kadlieng sufi ha Delhi, ka Indira ka la leit beit beit sha ka jynthah pang jong u bad ka la shong marsyndah bad u baroh shimiet. Dangstep phyrngab ha ka step kaba bud, u Feroze u la khlad noh ha ki ksangkti jong ka. U Feroze u la long u samla uba jubor—ba la bna nam kylleng na ka bynta ka jingshida bad ka jingialeh jong u pyrshah ia ka bam sap bam pap. U la long u sangot baradbah ha kaba weng noh ia ki jingjvrsieh na ka Ri. Sniewbok ba u la khlad noh dang samla—shuwa ba un lah ban leh kham bun, shuh shuh kiei kiei na ka bynta la ka jong ka Ri. U Feroze u la lap kum u khun bashisha jong ka Ri, ha ka madan laleh ban da ia ka burom bad ia ka maii bakhrav jong ka.

“Ka la long kumba doe ba poe ia aga ariang wak”, la ong ka Indira haba doe ba kylli ia ka kumpo ka la sogew. La thang ia u Feroze katkum ka rini niam Hindu bad Pasi. Ka

jingleit on thang ia u lyngba ki surok jong 'ka nongbah Delhi ka la long kaba khapngiah bad kaba shlei da ki briew. Hapdeng kita ki briew babun, la don ruh u Myntri Rangbahduh, u President ka Ri bad kiwei pat ki kynrem ki lyndan.

Ha u snem 1961, ka Indira ka la rung biang sha ka jylli jong ka saiñ hima sima. Ka la ieng ha ka elekshon sha ka Congress Working Committee. Ka la ioh 331 vote bad tang saw ngut kiba khlem vote na ka bynta jong ka. Ha u snem uba bud ka la iohrung sha ka jinglong dkhhot ka Congress Central Election Committee. Shuwa kata, ka la ioh ia ka khusnam na ka Yale University na ka bynta ka jinglah jingiai jong ka ha ka liang ka saiñ hima sima. Ha u juh hi u snem, ka la long ka dkhhot mihkhmat jong ka India sha UNESCO, ka la long ka nong-kitkam jong kane ka seng, bad la jied ia ka kum kawei na ki nongialam ha ka jingialang ha Paris.

Ka Indira ha kane ka por, ka la leit jngoh pyrthei sawdong kum ka nongmihkhmat jong u kpa jong ka sha Kenya bad Zanzibar. Ka la leit sha America man la u snem namar kino ma ki jingdonkam.

Ha u snem 1962, la thung ia ka kum ka Chairperson jong ka Citizen's Central Council, ban lum ban lang ia ki bor jong ka ri, hadien ka jingsbah iuhroit jong ka India ha ka China ha ka thma ba la long ha uta hi u snem. Ka.

Indira ka la ai mynsiem ia ki shipai bad ka ju leit wat shapdeng ki jingialeh ban aibor ia ki nonglada-ri. Ka la pyrshang katba lah ei ban kyntu ia ki briew ba kim dei ban sheptieng ia kino kino ki bor kiba na shabar, da kaba kyntu ia ki ba kin ieng tylli mlon kawei ha kino kino ki jingdonkam. Ka la lum ia ka bai bei na kylleng ka Ri. Ka Indira ha kata ka por ka la long ka rishot bah jong u kpa jong ka uba la shah shukor khamakha ha ki ktien bang ktien thiang jong ka China.

U Nehru u la khlad noh ha ka 27 tarik u Jymmang 1964, namar ka jingsangenh syndet u klongsnam. Ha kane ka khap ruh ka Indira ka la pyneh ia la ka rngiew ha kaba peit ba jngoh hi dalade ia ki kam ki jam baroh kiba iadei bad ki riti niam khatduh jong u kpa jong ka. Bun bun ngut ki kynrem ki lyndan na satlak ka pyrthei ki la ia poi sha Delhi ban ia jngoh khatduh ia u Nehru, u Myntri Rangbahduh banyngkong jong ka India balaitluid. Hapdeng jong ki la don u Lord Mountbatten bad u Douglas Home, u Myntri Rangbahduh ka Britain, u Kosygin ka Russia, u Dean Husk ka America bad kiwei kiwei da bun hara. La thang ia ka met jong u Nehru katkum ki riti niam Hindu da kaba kynud artat ia ki jingduwai Vedic ha Shantivan. Khatlai sngi hadien, la rah ia u dpei jong u na Delhi sha Allahabad ban bret ha ka Wahblei jong ki Hindu—ka wah Ganga. Da ka jingpaît dohnud ka Indira ka la shong baroh shimiet hajan ka met iap jong u kpa jong ka, uba ka da ieid bad shakri tista man la ka sngi.



Ka Cabinet meeting kaba la iakynduh hadien ka jinghlad noh jong u Jawaharlal Nehru, ka la jied ia u Gulzarilal Nanda kum u Myntri Rangbahduh na ka bynta shipor arpor, naba u Nanda u la long u Myntri uba Rangbahduh ha ka kynhun ki myntri ka Cabinet u Nehru.



## LYNNONG

### 8

## HA 'MATIÖNG KA RI

Laibnai hadien ka jingkhlad noh jong u kpa jong ka, ka Indira ka la mih noh na Teen Murti House sha kawei ka iing kaba kham rit, kaba la ai'ha ka kum kawei na ki Myntri ka Sorkar India. Dei ha u Naitung 2 tarik 1964 ba la kynthup ia ka ha ka jylli ki Myntri ka Ri India. La ai ha ka ia ka kam Information and Broadcasting. Hadien ka jingkhlad noh jong u Nehru, ka Indira kam shym la kwah ban rung shisyn-don sha ka rynsan ka saifi hima sima, hynrei u Lal Bahadur Shastri ia uba la jied kum u Myntri Rangbahduh ba ar jong ka Ri, u la kyrpad ia ka ba kan ym kyntait, namarba u sngew ba ka jingdon jong ka ha ka lypung ki myntri kan nang pynphuh pynphieng ia ka jylli ki Myntri jong u bad ban ioh ia ka jingshaniah jong ki briew. Da ka jingbymbanse ka la shimti ia kata ka kam kaba la pynkhamti ha ka.

Man ka sngi hynriew baje ka ju khie na bathiah la thait la jrem katno katno ruh, Ka pyndep bak bak ia ki kam jong ka ha iing ha sem. Shuwa ban dihsa step, ka la da dep peit lyngba ia ki kot khubor, bad tang mar dep dihsa ka la leit sha ophis ban iakyn-duh ia ki briew kiba wan donkam ia ka.

Napdeng kita, don ki briew kiba na ka party jong ka, Ki Politician, ki kynrem ki lyndan napoh ri bad nabar ri, ki kynthei bad ki khyn-nah skol. Ka Indira kam ju kyntait iano iano ruh. Ka iakynduh ia kat kiba wan. Mynsngi pat ka dem diap ban peit ban jngoh ia ki kam kiba iadei bad ka department jong ka. Dei tang ha ka por janmiet ba ka ju ioh por na ka bynta ialade - kata ruh lada ymdon ba dawot ia ka sha ki khawai ki dawai kiba kynrei na ka bynta ki briew kiba kum ma ka.

Ha u Nailar 21 tarik 1964, ka Indira ka la shah jied sha ka Rajya Sabha khlem don nong aireng pyrshah na ka Uttar Pradesh Vidhan Sabha Constituensi. Ka khlem treh ban ai kyrtong na ka bynta ka Lok Sabha, namarba kane, ka bam por bad bam bor palat. Kam shym kwah ban paw paidbah than namarba dang shu lah khlad noh u kpa jong ka. Ha ka Dorbar Rajya Sabha, ka Indira ka shu shong jarjar, kam ju heh nia. Wat ha ki jingialang jong ka Cabinet ruh kam ju kren khlem da thew ia ka jingdon-kam ; hynrei ka kam ka kham sawa ban ia ka ktien.

Ha u Nai risaw 1964, u Kosygin u la mihpli ia u Khrushchov kum u President jong ka Russia. Ka Indira ka la leit jngoh ia ka ri Russia da ka jingdawot sngewbha jong u Kosygin ban pynkblaifi shuh shuh ia ka jingladei bad ka jinglasngewthuh jingmut hapdeng kine ki artylli ki ri. Da ka jingshemphang jong ka ha ka jingladei bad kiwei pat ki Ri, kumba ka la iohlad

haba synran ia u kpa jong ka, U Nehru, kumta ha u juh hi u snem 1964, ka la leit ban ia shimbynta ha ka Commonwealth Prime Minister's Conference ha London kum ka nongmibkhmat jong u Lal Bahadur Shastri. Hadien kata, ha ki 17 bnai kiba bud, ka la leit jngoh sngewbha ia ka France, ka Yugoslavia, ka Burma, ka Mongolia, ka America, ka Canada, ka Soviet Union bad ka Italy.

Katba ka Indira ka dang don sha jngai na la ri, ha la rympei ki jingjia kiba harrukom ki la sdang ban pynsynjor ia ka sorkar bad ban pynpisa jngmut ia ki nongsynshar ri. Ha u snem 1965, la mih ka jingkhhiwin jong ki Madras pyrshah ia ka jingbuh ia ka ktien Hindi kum ka ktien ba la ithuh da ka sorkar. Ka jing-iakhhi ka la long kaba shykhei. Kaba la kham pynsynjor shuh shuh ia ka sorkar-kmie ka long ka jingieh kam noh jong ki arngut ki Myntri kiba dei na kita ki thain. Haba ka Indira ka la wanphai na Moscow ka la pynbor ia ki nongpynfaid ka Seng Congress ban phah peit phah jngoh bad ban phah thew phah woh marmet ia kita ki jingjia da ki dkhot jong ka Congress Working Committee bad ki dkhot jong ka sorkar, ym ban shu hun ha ki kaiphot ba la shu phah na ki jylla khlem don ba leit peit hi. Haba ym shym don ba kwah ban leit sha Madras, ka la tyrwa mon ialade bad ka la leit ban peit ban jngoh ia kita ki jingjia. Ka jingdon jong ka ha Madras, ka nongbah jong ka Tamil Nadu ka la pynjem jai ia ki nongpynkhhiwin baroh. Ka la kren sngewthuh ruh ia ki, ba ka sorkar kan ym

pynbor halor jong ki ia ka ktien Hindi. Kane ka long ka jingshlur kaba maian na ka bynta ka kynthei briew.

Hadien kane ka jingiakajia majia ha la rympei halor ka phang ka ktien ka thylliej, la mih ruh sa ka thma Pakistan ha u juh hi u snem. Ha ka por ba sdang ka thma, ka Indira ka la don ha Srinagar ka nongbah jong ka Kashmir. Da ka jingshynrang mynsiem ka la kyntait ia ka jingkyntu ba ka dei ban mih noh nangta marmar. Kum ka shipai bashlur ka la leit sha ki jaka ialeh ba ih bha ban ai mynsiem ia ki shipai India. Jngai na ka madan thma pat ka la kyntu ia ki briew ba kin long kiba la khreh ban ialeh na ka bynta la ka jong ka Ri da kaba ia noh kylluid sha u synñiang ka Ri ne ban long kiba la kloï wat ban ia mih madan ruh ha kaba iada ia ka.

Arpnew ar sngi hadien, ki arliang mam-la, ka India bad ka Pakistan, ki la pynbna ia ka jingiasangeh thma, bad ki artylli ki ri ki la ia buh sngi ha Tashken (Russia) ban soi ia ki dular iasuk. Dei ha kane ka snem ba u Lal Bahadur Shastri u la shu iap kyndit kynsan, hadien ba u la dep soi ia kata ka dular bad ka Pakistan. Kane ka la jia ha ka 10 tarik u Kyllalyngkot 1966. Haba la khlad noh sa une u rangkynsai, u Nanda u la kiew biang sashisien sha ka shuki Myntri Rangbahduh na ka bynta shipor arpor ban pyndap ia ka jaka kaba thylli haduh ban da jied ia u Nonglalam uba thymmai.

Kum ka myntri kaba dei peit ia ka Department Broadcasting and Information, ka Indira ka la ailad ia ki nongialam ka liang pyrshah ban kren lem lyngba ka All India Radio, kaba long haduh kata ka por ka rynsan ba dei trai tang jong ka seng kaba synshar. Nalor kata, ka la pynshlur ia ka jingpynmih phlim, bad dei da ka jingiarap basani jong ka ba la don ka III International Film Festival of India da ka jingshong-kun bad ka jingjop kaba khraw. Kum ka Myntri nongpeit nongjngoh ia kane ka kam, ka la leh katlah katlai ruh ban pyniar ia ki kor ki bor jong ka radio ba kan poi sha man la ki nongkyndong jong ka Ri, kumba ka la pynpaw shai ia kata, ha ki snem shuwa ba kan khlad noh, haba ka la pyrshang ban pynphriang ia ki lad ka Communication kum kawei na ki mat trei-kam bakongsan tam ha kaba phrang ia ka longbriew-manbriew ki khun ka ri, ba kin ym long tang kum ki jakoid ba shu hun ha kawei ka nan hynrei ba kin iohi jngai bad ba kin lah ban kheif kor ia la ka jong ka kolshor da kaba iohi ia kiwei ki jait kolshor sawdong kylleng ka pyrthei. Kane ka long kawei na ki lad bakongsan tam ha ka Edukeshon na ka bynta jong ki.



## LYNNONG

### 9

## KA NONGĬALAM JONG KA RI

Ha ka 19 tarik u Kyllalyngkot 1966, ka Congress Parliamentary Party ka la dei ban iakynduh lang ha ka mynshem jong ka Parliamentary House ban jied ia u Nongĭalam bathymmai. Mar ia khlad noh u Lal Bahadur Shastri hi, la sdang ka jing ia aireng hapdeng ki kynthun bapher hapoh ka seng Congress, kaba kynthup ia ki arliang mamla-kata : Ki Syndicate ba ĩalam da u Morarji Desai bad kiwei pat kiba pyrshah ia ka syndicate bad ia ka jinglong nongĭalam jong u. Na ka bynta ka shuki thylli jong u Shastri don tang arngut ki ban ia aireng : u Morarji Desai bad ka Indira Gandhi.

Ha kata ka step jong ka jingĭaleh, dang-ngir dang ngab, ka Indira ka la mih na iing ban leit jngoh pan bor na ki rishot bah ka Ri kiba la thiah lyngngai hapneh ka mariang bakyn-jai. Ka la leit da ka kali sha ka jaka ba la thang ia u Gandhi—ka Rajghat, bad sha ka jaka ba la thang ia u kpa jong ka, u Nehru, ha Shantivana. Nangta ka la leit sha ka Museum jong u Nehru ha Teen Murti bad ka la ieng jarjar khyndiat por hakhmat ka dur jong u kpa jong ka, kum ban pan bor ba un synran ia ka

sha ka thong jong ka jingjop. Nangta ka la leit sha ka mynshem jong ka Parliamentary House.

Ki briew, da ki hajar ngut ki la ia ap habar da kaba pyrta "Lal Gulab Zindabad" katba ka dang mih na la ka kali. Haden ba ka la ai khublei ia kita kiba la ia lum lang khruai rui rui ha kata ka mynshem, la sdang ka jingiathep vote. Kiba dei ban ia thep vote ha kata ka sngi, ki la don 526 ngut, ki ba long tang ki dkhok Ka Dorbar Thawaiñ (Parliament). Kata ka jingiajied nongialam ka la sdang ha ka por II baje kiewnsngi bad ka la kut pat ha ka por 3 baje nohphai sngi. Haden ba la niew ia kita ki vote la shem ba ka Indira ka la jop ia u Morarji Desai 355 vote la 169. Haden ba la pynbna ba ka la jop, Ka Indira ka la ieng joit ban ainguh ia kita kiba la jied ia ka bad kumjuh ruh ia kito kiba khlem jied ia ka.

Haba ka la mih na Parliament House, u Paid byllien u la dap ia ka surok ka lynti ban khublei iaroh ia ka. Ka Indira ka la khublei kylliang ia ki da ka khmat kaba phuhsamrkhie, bad nangta ka la leit beit beit sha ka iingdulan jong u President. U Radhakrishnan, uba long u President ha kata ka por, u la pdiang sngewbha ia ka bad u la dawot ia ka ba kan pynlong ia ka sorkar.

Ka pyrthei baroh kawei, ka la pdiang sngewbha ia ka khubor ba la jied Myntri Rangbah duh ia ka. U President Lynden Johnson



jong ka America, u la phah kyrwoh khublei kumne : “Nga dang khmih lynti ba ngin nang lah ban pyniar bad ban pynjylliew shuh shuh ia ka jingialok bad ka jingiatreilang hapdeng jong ngi shaduh kaba kut”. U Myntri Rangbahduh jong ka Russia ruh u la phah kyrwoh ai khublei kumne : “Ha Soviet Union la burom feid ia phi kum kawei na ki nongsaiñ hima sima bad ka statesman bapawkhmat duh jong ka ri India. Ngi kyrmen ba ka sorkar kaba phi phin íalam kan íai bud sani bha ía ka lynti kaba u Jawaharlal Nehru u la prat lynti bad ban pynurlong ruh ía ka jingangnud jang u”. Ki kyrwoh khublei ki la tuid na u Harold Laski u Myntri Rangbahduh ka Britain, u Eisaku Sato u Myntri Rangbahduh ka Japan, u Syiem Mahendra jong ka Nepal, u President Ayub Khan jong ka Pakistan, u Pope Paul VI ka Vatican State, u Dudley Senanyake u Myntri Rangbahduh ka Sri Lanka, u President ka Tanzania u Julius Nyerere, u Lester Pearson u Myntri Rangbahduh ka Canada bad kiwei de ki nongíalam na ki ri babun.

Ha ka jingkren paidbah banyngkong jong ka lyngba ka All India Radio, ha ka 25 tarik u Kyllalyngkot 1966, hadien ba la pynsmai ía ka kum ka Myntri Rangbahduh ha Asoka Hall, ka la ong : “Laiphew hynriew snem mynshuwa, ha kane ka juh hi ka sngi, ka sur jong nga ka la ía mir lang bad ka jong ki hajar ngut ki briew, kiba ía bud kynnoh ía ki kyntien smai ía ka jinglailuid.

“Ha u snem 1947 ia kata ka jingsmai la pynpura. Ka pyrtnei ka la pynpaw ia ka jing-ithuh ba ka bor thymmai kaba shongnongrim ha ka riti synshar paidbah bad ka jinglaitluid niam ka la ioh ia ka jinglaithuid. Ha ki Khat-hynñiew snem, ha kiba u Jawaharlal Nehru u la long u Myntri Rangbahduh, ka jingiätylli jong kane ka ri kaba dap maiñ da ki jingiäpher ha ka niam, ka imlang shahlang bad ka ktien ka thylliej, ka la kylla long ka jingshisha. La kha ia ka ri ba synshar-khadar paidbah, kaba don ruh ia ki thied bad ki tnaw kiba jwat. Ngi la shim ia ka kabu kaba nyngkong, ban pynbha bad ban pynbit pynbiang ia ka jingim ki briew jong ngi da kaba saiñdur bha ia ka jingroi spah ka Ri. Ka India ka la khyl-lie ia ka sur ha kaba kren na ka bynta ka jinglaitluid kiba shahbanbeiñ bankhoh kylleng sawdong, ban wanrah ia ka jingkyrmen bad ka jingshlur ia ki babun. Lah ban iohsngeu ngai bah na u pud u sam jong ka, ia ka sur jong ka jingsuk bad ka jingpyrkhat lem, kaba kyntiew ia ka jingialong lok bad ka jingiäasuk iasaiñ hapdeng ki jaitbynriew baroh . . .”

Haba ka Indira ka la shimti ia kane ka kam, ka Ri ka la long ka bym biang satia ha ki liang babun. Ka jingduh na ka thma pyrsah ia ka China ha u snem 1962. Ka jingrkhiang ka mariang ha ki jylla babun jong ka Ri, ka jingiäksaid ha ka liang ka dap bam dap dih bad ka jingbym ioh shuh ia ki jingiärap na-bar ri khamtam na ka America, ki la ialam ia ka ri sha ka lyngkhyrwiang jong ka jinglap-

thngan, ka iaptyrsaw, ka sliang, ka lyngkhuif  
lymbiang bad ka jinglakhihwin baharrukom ha  
ki dong bapher jong ka Ri.

Ka jingdon jong ki Myntri kiba naduh ka  
por jong u kpa jong ka ha ka Cabinet, ka la  
long kaba teh ba khum ia ka rukom pynfaid  
jong ka. Kine ki kti tymmen ki la pyrshang  
ban teh lakam ia ka da ka mon jong ki; hynrei  
ka Indira ka dei ka Indira.

Mar ia shimti ia ka kam Myntri Rangbah-  
duh, ka la dei ban peit ban jngoh ia ka jingpyn-  
khihwin ki Sikh, ban ioh ia ka jylla (state) la  
jong kaba ki khot, ka Punjab Suba—ka jylla ka  
ban kynthup tang ia kito kiba dei na ka jait  
Sikh. Nalor kata ha mihngi pat sa ka jingialeh  
pyrshah jong ki Naga bad ki Mizo Kaikhlaw ka  
la pynkordit jingmut ia ka shibun. Ka jingsyier  
ka Kashmir na ka jingkhwan ka Pakistan, ka la  
long ka jingkit kaba khia ba ka Indira ka la dei  
ban kit ban bah.

Ha la rympei, ka la trei dohim dohlap  
khlem pyrwa ia ki jingkren pyrshah kiba wan  
lyngshop wat na ki dkhot jong ka party jong ka.  
Da ka jingshynrang mynsiem ka ju pyndem ia  
kita ki jingkren khohnioh baroh da kaba ong,  
“Ka Congress ka long ka pyrty kaba heh, hynrei  
ka India ka kham heh shuh shuh”. Da kane  
ka jingthmu ka la sdang ban trei miet sngi ban  
wallam ia ka jingsuk ha ka Ri.

Ia ka Punjab, khnang ban ioh ia ka suk ka  
saiñ, ka la ia bhah ia ka ha ki 3 tylli ki jylla ?

**Ka Punjab, ka Haryana bad ka Himachal Pradesh. Dang nyngkong kane ka la wanlam ĩa ka jinghren khñium na ki laiphew dong jong ka Ri, hynrei ym don lad shuh da kumwei. Ka Indira ka la leh ĩa kaba dei hadien ba ka la pyrkhath sani bha ĩa ki daw bathaiñ baroh.**

**Ha Nagaland ruh ka la ĩaleh katlah katñai ban wanlam ĩa ka jingsuk bad ka jingñasngewthuh jingmut khlem da leh jem bad ha ka juh ka por khlem leh khor. Ka jingñaleh jong ki Naga Kaikhlaw ka la long kaba sat sia na ka bynta ka Ri, ymtang namar ka jingduh briew da ki bun khlieh kiba la kyllon ha kata ka dong khlem daw, hynrei na ki jingpynbudnam na ki Ri bamarkhap kiba ap kmang tang kumno ban pynheh ĩa ka barit ba kin ĩohnong myrsiang ma ki.**

**Kh nang ban ĩakynduh ĩa ka jingñapthngan ĩaptyrsaw kaba jan sar lin ĩa ka Ri baroh kawei, ka Indira ka la duriap ĩa ki saw mat treikam kiba long kine :**

**1. Ka jingpynhiar dor ĩa ka tyngka kum ka lad ban pynshlur ĩa ka jingshalan mar shabar Ri bad ban pynsuk pynsaiñ ĩa ka khañi ka pateng ha ka liang jong ka Ri, ha kaba ĩadei ba kiwei pat ki Ri.**

**2. Ka jingñaleh ban kyntiew ĩa ka thung ka tep (Green Revolution) ha ki jylla baroh jong ka Ri, lyngba ka jinglarap jong ki sorkar jylla.**

**3. Ka jingkyntu ban nang pynñat ĩa ka jingtrei bad ka jingplie ĩa ki Karkhana rit (Small Indus ries)**

4. Da kaba hikai bad kaba kyntu ia ki briew ban saiñdur bha ia la ka longling longsem da kaba pyndonkam ia ki lad ki lynti kiba ka sorkar ka ai lyngba ka Family Planning.

Ka Indira ka la leit sha America ban iakyn-duh ia u President Johnson uba la pdiang sngew-bha ia ka bad uba la sngewlem ia ka jingud jingnam jong ka, ba duna bam duna dih ha India. Haba iohsngew ia kata, u President Johnson u la phah mar mar 3.5 million ton ka bam, da kaba kyntu artat ia ka world Bank ba kan iarap jynsur ia ka India. Katba ka dang don ha America ka Indira ka la pynskhem ia ka jingiateh lok hagdeng kine ki artylli ki Ri. Haden ba ka la sah ha America laisngi, ha ka 30 tarik u Lber 1966, ka la leit pat sha England bad hanpta ka la iakynduh ia u Myntri Rangbahduh, u Wilson, nangta ka la her sha Moscow ban iakynduh ia u President Kosygin.

“Lyngba ki shiphew sngi ba nga la poi ban leit jngoh ri, nga la shem ia ka jingialong lok kaba khlaifi bha na ki ri bapher . . .”. Mar ia poi na kane ka jingleit wad bam jong ka, ka Indira ka la peit la jngoh hi ia ka jingsam bam ba kan dap kan biang ha ki jylla bapher baroh jong ka Ri.

La ki kam ha iing ki tan ki khring ia ka jingmut jingpyrkhat bad ia ka bor jong ka, ka Indira ka ioh por pat ruh ban iashim bynta bad ban noh la u synfiang ha ki jingdonkam ka pyrthei. Ka la kren pyrshah ia ka America,

kaba la al jingiarap ia ka India, ba ka del ban weng noh ia ki shipai jong ka na Vietnam ; Ban pynkut noh ia ka thma bam briew kaba shu pynjulor ia ka pyrthei. Ka da ban artat ruh biang pa biang ia ka jingkordor ka jingim briew.

Kawei na ki jingleh kiba la pynsniew dur ia ka ha la Ri, dei ka jingpynhiar ia ka dor jong ka tyngka. Ki riewdkhot jong ka Congress ki la pyrshah ia ka bad ki briew ruh na kylleng ki la wohdong wohnia ia ka ba ka mut ban pyn-dem ia ka Ri ha ki sla kjat jong ka America. Ka Indira ka la leh ia kaei kaba ka sngew ba ka long kaba dei. Ka Ri ka donkam ia ka jingiarap ba nabar ri, bad khang ba kan roi ka khañi ka pateng jong ki khun India, ka pisa kaba kin ioh ka dei ban long kaba khambun. Kum ka nuksa, shuwa kata, shi dolar ka long tang 4 tyngka 76 naya katba hadien ka jingpynhiar shuh shuh ia ka dor jong ka tyngka, shi dolar (Ka tyngka America) ka shong dor 7 tyngka 5 naya.

Kane ka jingpynhiar ia ka dor jong ka tyngka ka la ktah shibun ia ka sorkar baroh kawei. Kito kiba la kren tohhoh ia ka napdeng ki heh ki hañi ka seng Congress ki la long u Morarji Desai, u U. N. Dhebar, u Ram Subhag Singh bad kiwei. Kane ka long kawei na ki daw ka jingpait-jingpra ka seng Indian National Congress.

Ha ka jingkren paidbah jong ka lymba ka All India Radio ha ka miet 12 tarik u Jylliew 1966 ka la ban jur ia ka jingleh jong ka, ka.

long ban pynroi ia ka spah jong ka Ri ym ban khñiot ia ka bad ban bret ia ka ha ki nongwei. Ka la ong: "Shah ia nga ba ngan iathuh hok ia phi. Ka jingrai ban pynhiar ia ka dor jong ka tyngka kam shym long satia kaba suk. La shim ia kane ka rai hadien ki jingpyrkhat kiba sani bha . . . . Mynta ngi dang iaid lyngba ka por kaba khim bad kaba jynjar bha, kaba ym pat ju jia koit naduh ki snem ba ngi la ioh ia ka jinglailtuid. Da kaba leh ia kane phi dei ban sngewthuh shai kdar ba ngim shym pulom ha ka jingleh jong ngi. Dei tang kito ki batieng kiba nud ban ong ba ngim lah ban jop . . . Nga kwah ban iathuh ia phi, ba nga la leh ia kane ym na ka daw ki bor mynder kiba patied ia ngi . . . Mynta ka miet ngam kular ei-ei ; hynrei nga kwah ia phi ba phin ia pyrkhat ia kaei kaba nga la ong. Ka jingpynhiar ia ka dor jong ka tyngka ka long tang ka lad kam long ka kliar jong ka lynti jong ngi."

Ka General Election basaw sha ka Lok Sabha ka la long ka madan thma na ka bynta ka Indira. Ka la leit malu mala kumba 15,200 mer bad ka la kren paidbah palat 160 tylli ki jaka. Katba ka dang kren paidbah na ka rynsan ba la pynbeit itynnat bha ha Orissa, kyndit kynsan don ba kawang maw ia ka na u paidbah, bad uta u maw u la dei na ka khmut jong ka. Ka snam ka la tuid na ki 'liewkhmut jong ka, hynrei ka khlem ran dien. Ka la sei ia ka rumar bad ka la niad noh ia kata ka snam kaba dang iai tuid da kaba kyrhuh artat: "Kane ka long ka jingpynjah burom ia ka Ri ym ia nga,

namar kum ka Myntri Rangbahduh jong ka Ri India, nga mihkhmat ia ka Ri." Ki bried na kylleng ki la pynrem ia kata ka jingleh tohmet jong uta u bried ha Orissa. Kane ka jingjia ka khlem pynsangeh ia ka iaide ka ieng jong ka, namar da ka khmut kaba shah sop ka la leit ban kren paidbah ha kiwei pat ki jaka babun jong ka Ri. "Mar ia mih na ka kamra ba la suh ia ka jingmong ha ka khmut", la ong ka Indira ha la ka kmienah, "nga la kylli ia u doktor ioh u la bujli da ka khmut thymmai kaba itynnat ha ka jaka jong ka khmut kaba rim. Phi tip ba ka khmut jong nga ka jrong than bad hangne ka don ka lad kaba biang tam ba un ai ha nga da ka khmut kaba itynnat".

Ka result jong kata ka Elekshon ba la pynlong ha u Rymphang 1967, ka la pynkyndit ia ki dkhon ka seng Congress baroh. Ka Congress ka la duh noh 83 khlieh bad ka shu long lahduh tang da 25 khlieh. Kiba kham pawkhmat na kita kiba la shah rem ki long u Kamaraj, u S.K. Patil bad kiwei. Ialade hi ka Indira ka la jop da kaba tam bun bun hajar khlieh.

Ha ka jingoren paidbah jong ka lyngba ka All India Radio hadien ba la pynbna ia ki result jong ka Elekshon, ka Indira ka la ong : "Ka synshar paidbah ka mut, ba ka don ka jingjied. Ka jingjied ka mut ba dei ban don ki lad kiba da kumwei pat. Ka long ka dak ka shin kaba bha ba kita ki lad kiba da kumwei pat ki dang mih ir shi ir bad ki dang ia aireng"



Ha ka step babud jong ka jingpynbna ia ka result, ka Congress Parliamentary Party ka la iakynduh ban jied ia u Nongialam. Ha kane ka sien la jied biang ia ka Indira wat la ki syndicate ki da pyrshah eh. Da ka jingban ki nongialam ka seng, ka la kynthup ia u Morarji Desai kum u Myntri Rangbahduh-khynnah (Deputy Prime Minister), la ka Indira bad ki nongkyrshan jong ka ki da pyrshah jur eh ia kane. Ha kata ka jhan jong ka jingiasynrop lang bad u Morarji ha ka trei ka ktah, ka Indira ka la kut jingniut ba kan pyndep ia kaba ka thmu wat lada don u khla ha shyngkup jong ka. Ha ka kynhun ki myntri jong ka, ka Indira ka la pynkiew kyrdan ia u Jagivan Ram, u Maharaja Karan Singh bad u K.K. Shah namar ka jingshida jong ki ha kaba kyrshan ia ka.

Ka jinglong Myntri Rangbahduh ha ka sien kaba ar, ka la long kaba pher bak ly bak na ka sien ka banyngkong ha kaba ka dang dei ban khreh ia ki jnit ki jnat jong ka saiñ hima sima, ha kaba ka dang dei ban pyndem ialade ha ka jingabuit, ka jingsei nia ba kham f.w jong ki myntri bakham tymmen. Mynta ha kane ka khyllipmat, ka Indira ka kwah ban pynpaw ialade kumba ka long khlem da shah shet shalai shuh ha kito kiba la long myntri naduh ki por jong u kpa jong ka.

Haba la tyrwa ia ka shuki Myntri Rangbahduh - khynnah ha u Morarji, i kumba ki jingthut baroh kin shu jah rngai, ba la sop la spaiñ ia ki jingmong baroh; hynrei, kane kam

shym long kaba shisha. Ka lhuh hapdeng ka kynhun jong ka Indira bad jong ki Syndicate ka la nang jylliew bad nang iar shuh shuh. Kane ka la paw shai kdar ha ka jingjied President kaba la long ha u snem uba bud. Ki Nongialam ka seng Congress, kaba kynthup ia u Kamaraj, u Desai bad kiwei kiba la am sia tang kumno ban pyntroiñ ia ka Indira, ki la pyrshang ban phrung ha ka shuki President da u briew uba nud ban ai nia bad ban leh pyrshah ia ka, u briew uban ym shu shah jem ha ka. Kumta ki la sei ia ka kyrteng jong u Radhakrishnan, ba ma u, u dei ban long biang u Kandidet jong ka seng Congress, katba ka Indira bad ka kynhun jong ka ki kwah ban pynieng da u Zakir Hussain uba long u Muslim bad uba iadei bad ka. Ki liang pyrshah pat ki la jied da u Subha Rao, u Nongbishar ka Supreme Court, u briew uba kwah ban ieng ha la ki jong ki kjat, u bym aili iano iano ruh. Ha ka bakut ka Indira ka la ioh ia la ka mon bad u Zakir Hussain u la shah jied kum u President da kaba tam ia u Subha Rao da 7% vote. Ka jingjop jong u Zakir Hussain ka la kyntiew ia ka Indira bad ia ka Seng Congress, katba ka liang pyrshah ka shu ksaid ha ka lanot bad ka jingshipa. La ka seng Congress ka la jop, don ki dkhot ki bym shym la sngewbha ia kata ka jingjop. Kine ki la sdang ban kynnoh ia ka Indira ba ka kwah ban leh mon palat eh wat halor ki kam kiba iadei bad ka seng.

Ka jinglapher jingmut hapdeng ki dkhot jong ka Seng Congress ka la nang iar shuh shuh

man la ka sngi. Kane ka la paw tyngkreiñ wat ha ka jingadei jong ka Indira bad u Desai. Katba ka Indira ka kren da kumwei, u Morarji pat u ju kren da khongpong. Ka Indira ka la kham jan sha ka Soviet Union katba u Morarji pat sha America bad u kren pyrshah ia ka Moscow man ba u ioh lad. Bun bunsien ka Indira kaba bat ia ka kam myntri bar-ri, ka la dei ban saw kyrang haba u Morarji u kren pyrshah ia ki jingrai jong ka sorkar ha kaba ma u hi u long u nongialam ba ar. Kane ka jingbym ia sngewthuh jingmut hapteng kine ki arngut ki nongialam, ka la ialam ia ka Ri baroh kawei ban ngat sha ka 'liewlep jong ka dum dngiem.

Kane ka jingiakynad hapteng ka Indira bad u Morarji ka la ialam sha ka jingiakhlad lynti ha u Naitung 1969, haba ka la thoh sha u kumne "Nga la pyrkhath jylliew shaphang kane bad nga sngew ba katkum ka hok, ngam dei ban pynkhia shuh ia phi da ka jingbah khlieh lang kum u Myntri uba dei peit ia ka kam pisa tyngka. Ia kane ka kam ngan sa tyrpeng bad peit noh hi dalade ..." Khlem da ap ia ka jingjubab jong u Morarji, ka Indira ka la pynbna ia kata, ha ka jingialang ki nongthohkot khubor. U Morarji da ka jingsngewkthang u la iehnoh ruh wat ia ka jinglong nongialam ba-ar ha ka Cabinet.

Hadien laisngi ba u Morarji Desai u la iebkam noh, ka Indira ka la *Nationalise* ia

*ki Bank* jong ka ri da ka bor jong u President. Kane ka long ka jingleh ba la pdiang sngewbha da ki seng saifn hima bapher jong ka ri bad da ki dkhot babun jong ka seng lait noh ki Syndicate. Da kane ka jingleh ka Indira ka la pynpaw paidbah ia ka jingthrang jong ka sorkar ban pynwandur ia ka jingtabit iabiang paidbah ha ka Ri. Ka jingiaroh ba ka la ioh na man ki dong ka la teh ia ki thylliej jong ki Syndicate kiba la sngewrem ba ka la weng noh ia u Morarji na ka kam Myntri ba dei peit ia ka Pisa tyngka.

Ka 'liewlep jong kane ka jingbym ia dei jingmut hapdeng kine ki arliang mamla ha ka seng Congress, ka la poi ha u Naitung, haba ka shuki President ka la thylli biang sa shisien. Ha kane ka khep, ka seng Congress ba pyrshah ia ka Indira ka la wallam ia ka kyrteng u Sanjiva Reddy, u briew uba pyrshah ia ka, uba dei na ka liang ki syndicate kum u Kandidet jong ka Congress. Ka Indira pat ka la mang ia u V.V. Giri ban pyndap ia kata ka shuki. Da ka jingbymbanse, ka la hap kren na ka bynta u Reddy, hynrei ha bym dei na ka rynsan jong ka seng, ka Indira ka la kyntu ia ki nongbud jong ka ban jied ia u briew uba ki sngewdei ban kyrshan katkum ka jingiatiplem jong ki. Da kane ka jingleh ka pynpaw shai ia ka jingkwah ba ki nongbud jong ka kim dei ban kyrshan ia u Reddy hynrei ia u Giri.

Ha ka 20 tarik u Nailar, la pynbna ia ka result jong ka jingjied President ha kaba u V.V. Giri u la jop da ka jingkyrshan ki nongbud ka Indira. U President jong ka Congress Party u la sngewingkhong khait da kane ka jingleh jong ka Indira bad ki nongbud jong ka, bad u la pynbna ba yn sa sympat jur ia ki kum ki nongialeh pyrshah ia ka party. Haleh, kane ka jingkyynnoh ka khlem seisoh eiei namar ba u President ka seng ruh u la leh kumjuh ha kaba ia teh lok bad kiwei ki liang pyrshah ban pynpulom ia ka Indira khlem pynpaw. Kane ka jingleh jong u ruh ka la long pyrshah ia ka party. Kumta baroh arliang ki la shu ia sngap jar da kaba ing hapoh dohnud.

Ha u Naiwieng 12 tarik, ka jingphiah ia ka party ka la urlong dashisha. Dei ha kane ka sngi ba ka Congress kaba shah ialam ha ki syndicate, ha ki nongialam kiba khwan bor, ka la beh party noh ia ka Indira na ka daw ba ka la shu leh klep bad leh bymsuitñiew ia ki jingpyni ki nongialam ka seng. Ka Indira ka la ioh ia kane ka khubor basngewsih katba ka dang don ha Hungary. Haba ioh ia kane ka khubor, ka Indira ka la leh jai jai khlem pynpaw ia kano kano ka jingsyier namarba ka tip thikna ba kin bun kiba dang bud ia ka. Kata ka Congress kaba la beh party ia ka, ka la khot ialade : ka Congress (O) kaba mut Congress Organisation bad ia ka party jong ka Indira pat ka Congress (R) ne Congress Ruling. 310 na ka 429 ngut ki MP

ki la iakynduh lang ban pynpaw ia ka jing-  
kyrshan jong ki ia ka Indira. Da ka jingiarap  
jong ka Party Communist, Ka Party Socialist,  
ka DMK bad ki MP bym don seng, ka Indira  
ka la lah ban bat ia ka shuki Myntri Rang-  
bahduh khlem synjor.

Ha ka 22 tarik u Naiwieng, ka Indira ka la  
khot ia ka jingialang pyllun jong ka A.I.C.C.  
Ka la long kaba lyngngoh ngaiñ ba na ka  
750 ngut ki dkhot, 446 ngut ki la poi sha  
kata ka jingialang ban kyrshan ia ka kum ka  
nongialam. Kane ka jingiaphiah bad ka jing-  
iakhlad lynti ka la long ka pansngiat ba la  
thaiñ da ki 'tiew iwbiñ na ka bynta jong ka.  
Kumba ki ong ba kham lah u nongshun  
uba nabar ban ia u nongshun napoh, ka Indira  
ka la shem ia kata ba ka long kaba shisha.  
Mynta ba la iakhlad lynti, ka Indira ka sngew  
ba wat la ka shuki jong ka kam da skhem  
kum mynshuwa, hynrei, ka long kaba kmen  
ba ka lah ban rai dalade hi ha ki kam ki  
duk katkum ka jingdonkam khlem da shah  
tynruh da kumwei pat ha ki briew kiba wad  
myntoi shimet.

Shisnem hadien kane ka jingkiew rasong  
jong ka ha kaba pynwandur ia ka party kaba  
thymmai—ka Congress (R), ka Indira, ha ka  
27 tarik u Nohprah 1970, ka la kyntu ia u Pre-  
sident ban pynlong elekshon noh shisyndon.  
U President u la mynjur ia ka jingai jingmut  
jong ka khlem pyntud. Ka la long ka sien ka  
banyngkong naduh ba ka Ri ka la ioh ia ka  
jinglailtuid ba u President u la pynlong ia ka  
elekshon shuwa ban kut ka san snem.

## LYNNONG

10

### KA NONGIALAM BYM RIEJ

Hadien ba la pynbna ia ka jingpynwai noh ia ka Dorbar Thawaiñ (Parliament), ka Congress (O), ka Swatantra, ka Jana Sangh bad ka Samyukta Socialist Party ki la pynlong ia ka jingiateh lok ban ialeh pyrshah ia ka Congress (R). Ki la thaw da ka ktien phira "*Indira Hatao*" (Kaba mut Weng noh ia ka Indira). Haba ka Indira ka la iohsngew ia kata ka ktien phira jong kita kiba ia pyrshah ia ka, ka la ai ha ki nongkyrshan jong ka da kawei pat ka ktien phira kaba ia syriem "*Garibi Hatao*" (Kaba mut weng noh ia ka jingduk). Kane ka la long ka jingpyrkhat kaba stad bad kaba dei por.

Ha ki jingkren ialap Elekshon, ki liang pyrshah ki la kahait ia ka ha doh, katba ka Indira pat ka shu sngap jar khlem kren tohmet iano iano ruh wat ia kito kiba kren pyndait ia ka. Ha ka jingleit sha Gujarat ha u Kyllalyngkot 1970, ka la biria kumne ia kito kiba pyrshah ia ka, kiba la ai nam ia ka ba ka long ka Hitler, Ka Stalin, ka Mussolini bad kumta ter ter. Haba iohsngew ia kita ki kyrteng pynbudnam ia ka, ka Indira, ka la pynbiria ia la ki nongkyrshan da kaba ong ba kan bha lada ki-

ta kiba pyrshah ia ka, ki la lah ban iamir jingmut ban pynkup ha ka tang da kawei ka nam. Ban ia kaba kren pyrshah ia ka longbriew kiwei, ka Indira, ka sngewkmen eh ban kren shaphang ki jingeh bad ki jingdonkam jong ka Ri, jong u duk u rangli bad ka jingdonkam jong ka sorkar ban pyntreikam ia ki mat kiba lah ban ialam ia ka Ri baroh kawei sha ka pahuh pahai bad ka jingdap ka jingbiang. Dashisha, kaba kren tohmet ia ka longbriew kiwei kam myntoi eiei, namar haba ngi kawang ktieh ia kiwei ngi klet ba dei ka kti jong ngi kaba jakhlia nyngkong nyngshap, kumba ong mano re. Kumta ka la ia id la ieng, ka la trei la ktah, bad ka la pyni ha ka rukom kren rukom khana jong ka ba kam dei ka briew ka bapoh. Ka jingbymkhuslai jong ka ia ka jingkren tohhoh ki Nongialam ka liang pyrshah ka pynpaw shai kdar ba ka Indira ka don ia ka Thong kaba kham khraw ban ia kino ma ki briew shimet, ba ka thong jong ka jingialeh jong ka, ka dei ka jingdap ka jingbiang lang u paidbah babun.

Naduh u Kyllalyngkot haduh u Lber 5 tarik ka Indira ka la ia id palat ia ka 30,000 mer da ka liengsuiñ, 3,000 mer da ka kali bad da ka rel. Ka la kren paidbah ha ki 409 tylli ki lypung jingialang paidbah. Ka la leit ban ia shim bynta la kumno kumno ha ki 15 tylli ki jingialang paidbah shisngi shisngi. Nalor kata ka la jngoh hi dalade ia ki kot ki sla, ki dular kiba ka dei ban peit ban jngoh kum ka Myntri ba ha khlieh duh jong ka Ri. Ia kane baroh ka la leh khlem rie j ha ka por ba ka jingialeh ka dang shongshit bha pum.



Ha ka jingleit jong ka sawdong, ha kane ka khlep, ka Indira ka khlem shah kawang maw, ka khlem mong khlem mynsaw hynrei la pdiang sngewbha ia ka kylleng kum ka Riewsaifi hima sima bapaka. Ka nam jong ka, ka la phriang kylleng na ka bynta ka *Natinalisation of Banks* bad ka jingweng noh ia ki *Privy Purses*.

Ha ka result jong kata ka Elekshon, ka Indira ka la jop da kaba palat bun khlieh. Ka la ioh 70 khlieh palat ban ia ka jingfaleh haba ka Congress ba dang iatylli ha u snem 1967. Ki liang pyrshah ki la shu ia pulom khoit.

Ha ka 17 tarik u Lber 1971, la jied biang ia ka kum Ka Nongfalam jong ka Congress Parliamentary Party. Ha ka jingkren jong ka ia ki M.P. ka seng Congress ka la ong : "Ha ka jing-sbun mynsiem jong phi, phi la ong ba ka jing-jop ka long namar jong nga. Kata kam long kaba shisha. Kane ka long ka jingjop jong ngi baroh kiba la ia treilang .... ban weng noh ia ka jingduk ka long ka kam kaba radbah. Ngam tip la ngin lah ne em dashisha ban weng jynduh noh ia ka. Ngilong tang ki briew, ngilah ban bakla, ngilah ban sahdien ; hynrei ngi dei ban pyni, long kat kaba long, ngin ia buh lang ia ka buit ka bor jong ngi baroh ban weng noh ia ka jingduk khai .... Kane ka Elekshon ka long u shabi uba la plie ia ka khyrdop, hynrei ka jingleit ka long kaba dang jngai hakhmat jong ngi. Ka long ka jingleit lynti kaba jngai bad ka ba shitom eh ...."

Ka jingjia kaba khraw duh ha ki snem kiba bud ka la long ka jingialam jong ka, ba ka Bangladesh kan ioh ia ka jinglailuid bad ka jingithuh paidbah da ki Ri bapher satlak ka pyrthei. Kane ka la kynting ia ka sha ki kliar ka jing-phuhmut phuhmat bad ka jingskhem.

Ha u snem 1970, u Nai nohprah, ka Awami Leaque jong u Sheikh Mujibur Rahman, ka la jop da ka jingbun khlieh bapalat liam sha ka Pakistan National Assembly. Kane ka la long kum ka jingmynjur jong ki briew baroh kiba don ha ka Pakistan ha Mihngi ba ka por ka la ih ba kin weng noh ialade na ka jingsynshar jong ka Pakistan na Sepngi. Haba ka Awami Leaque ka la jop kumne, ka Sorkar na ka Pakistan-Sepngi bad u Bhutto kum u nongialam, ka la kyntait ban khot Dorbar ia kata ka Assembly ba dang shu dep shah jied. Mar kumta hi, ka Awami Leaque ka la sdang ia ka jingiakhih da kaba khot ia ki Nongshongshnong baroh jong ka Pakistan-Mihngi ba kin ym ia kohnguh sorkar shuh. Kane ka la wanlan ia ka jingiaum-snam ha ki jaka bapher. Ha ka 25 tarik, ki shipai Pakistan-sepngi ki la sdang ban leh bor halor ki nongmihngi. Da ki hajar hajar ngut ki nongphetwir bym lah fiiew shuh ki bym sngew lah shah ia ka jingbanbeifi ki la poi sha India. Ia u Mujibur la kem bad la rah sha ki phatok ka Pakistan-Sepngi. Haba iohi ia kata, ki nongbud jong u ki la pynbna ia ka jingleh dohim dohiap ban ioh ia ka Ri la jong kaba lailuid, kaba ki sngewdei ban jer kyrteng, KA BANGLADESH. Haba iohi ia kanë, ka Indira ka la

ñiew bha ïa ki kyrdon kiba kan shim, ba ka Ri kan ym long kaba shah kynnoh ba ka leh ban bor halor ki kam ïing kam sem jong ka Pakistan, ha kajuh ka por ban jngoh ba ka bam ka dih ka biang ka dap nador ba ka dei ban pyndap ïa kita ki nongwanwir wanhap.

Ban ïalehthma ha Bangladesh ha ka por lyiur ka long kaba ma, na ka daw ka jingshlei um bad na ka daw ki shipai ka China kiba lah ban hiar khlem jingeh na ki lum Makashang haba ka ïor ka duna. Ka Indira da ka jingai-jingmut lem jong ki nongïalam shipai baradbah, ka la mang ba ka por kaba bit babiang tam ban shoh ka long ha ka por tlang, haba ki shipai ka China kin ym lah ban sam lyngba ïa ki Makashang.

Da ka jingai jingmut ki proh jingmut, ka Indira ka khlem leh eiei ban khang ïa ka jingwanpoi ki shipai na Pakistan Sepngi, bad ka khlem khangduh ruh ïa u pud u sam jong ka na ki nongphetwir. Namar lada ka khang khyrdop sa ma ka, ki bapli, da ki milion kin hap ha ki tyrsim bym don dohnud jong ki shipai ka Pakistan Sepngi. Ka India ha ka juh ka por, ka la ïarap ban ai jinghikai ïa ki Mukti Bahini, ki shipai Kaikhlaw jong ka Awami League da ki kynsai jong ka shipai India bad da ki B.S.F. Kumta ka jingïarap ïa ka Bangladesh ka la long da ka pisa, ki tiar bad da ka jingpyntbit ïa ki.

Man ka sngi ka jingwantuid jong ki nongphetwir ka la nang jur nang jur. Ki la [poi

haduh 30,000 shisngi shisngi. Hadien phra bnai ki la poi kumba 10 Million ngut. Ka Indira ka la kyrpad kyrpon ia ki Ri bapher jong ka pyrthei ban wan iarap lem ha kaba bsa ia uta u paid-wir babun da u synñiang ha ka bam ka dih, ki dawai dashin bad ki jaiñ ki nep. Ka da kyntu ruh ia ki ban ñaleh katba lah ban pynsa-  
ngeh noh ia kata ka thma bambriew ha Bangla-  
desh.

Dei ha kane ka por ba ka Indira ka la soi ia ka soksular 20 snem ka *Treaty of Peace, Friendship and Cooperation* bad ka Soviet Union ha u Nailar 1971. Ka dei da ka jingbymbanse ba ka la pdiang ia kane ka soksular kaba ka Russia ka la tyrwa ia ka naduh u snem 1969. Dei ha kane ka por ruh ba ka jingialong lok hapsedng ka Pakistan, ka China bad ka America ka la khlaiñ bha. Kumta ban pyllait ñalade na kane ka jingkhia shiliang ha ka jingñadei lok dei jor hapsedng ki Ri ka la soi ia kata ka soksular. Ha u Nailur jong uta hi u snem ka Indira ka la leit jngoh hi ia ka Moscow ban pynsgewthuh ia ki Rangbah Nongñalam ka Russia ia ka jingkhia ka jingñaleh ha ka Pakistan-Mihngi, da kaba ong: "Phi phin ym lah ban shongsuk kynjai, haba pluh ka ñing ha mar syndah ñing jong phi". Lang bad u Kosygin ka la pynrem ia kata ka jingleh thombor jong ka Pakistan halor u khun u ksiar la jong.

Ha kat kine ki por, ka India ka la ñaleh katba lah ei ban ym leit tur da ki shipai sha ka madan thma pyrshah ia ka Pakistan, hynrei ha

ka juh ka por ka la pynshrai ia ka da kaba  
iarap ia ki nongialeh Kaikhlaw da ki rukom bad  
ki lad kiba bun.

Ha u Risaw 24 tarik, ka la mih na la Ri ban  
leit jngoh 3 taiew ia ki Ri kiba don ha Ri sepngi,  
ban ioh ia ka jingkubur bad ka jingpynrem jong  
ki pyrshah ia ka jingleh sat jong ki shipai  
Pakistan ha Bangladesh. Ka la leit sha Belgium,  
France, Austria, Britain, West Germany bad  
America katba ka thma kaba jur ka dang klang  
ha tyngkong iing jong ka Ri jong ka.

Ha ka por ba ka dang don shajngai na la  
rympei, ka la ioh ia ka khubor ba ki shipai  
Pakistan ki la sdang ban ia lum ha ki bordar  
pyrshah ia ka India. Da kane ka jingleit jngoh  
ia ki ri sepngi ha ka por kaba thain bha, ka  
Indira ka kwah ban pyni ia ki ri ha ka pyrthei,  
ba ka Ri India ka long ka Ri kaba la khreh  
hynrei kaba ialeh katlah katiai ban ym ialeh da  
ka sum ka wait. Ha ki jingkren jong ka, ka ju  
ban ba ki jingjia ha Pakistan ki long ki jingjia  
jong kawei pat ka Rympei iing bad ba ka India  
kam kwah ban iatuklar; hynrei la kumno  
kumno ruh, ka India ka long kaba la shu khreh  
ban iakynduh bad kino kino ki jhan.

Ha ka miet 3 tarik, katba ka Indira ka dang  
don ha Calcutta, ki lieng suifi ka Pakistan-Sep-  
ngi ki la wan ther bom ia ki phra tylli ki  
kadlieng suifi jong ka Ri ha ka por 5.47 janmiet.  
Kane ka jingwan ther bom jong ka Pakistan ka  
la long ka bhah kaba biang bha ba ka India kan

pynbna ia ka thma pyrshah ia ka Pakistan. Mar ia ioh ia kata ka khubor, ka la mih soit na Calcutta da ka liengsuiñ shipai sha Delhi da kaba shah synran ha ka kynhun ki liengsuiñ-thma. Mar ia poi ha Delhi, ka la khot ia ka jingialang kyrkieh jong ka Cabinet bad ha ka step kaba bud, da ka jingiamynjur jong ki Nongialam ka liang pyrshah, u President u la pynjari ia ka *Internal Emergency*. Halor kane ka phang ka Indira ka la ong kumne ha ka Dorbar thawaiñ (Lok Sabha) : “Ki la pynbor ha ngi ia ka thma, Ka thma kaba ngi ngim shym la kwah bad kaba ngi la ialeh katlah katiai ban kiar . . . ngi dei ban long kiba la khreh na ka bynta ka jingialeh kaba jlan . . .” Arsngi hadien kata, hapdeng ka jingkyngnoi risa jong ki Nonglashong Dorbar, ka Indira ka la pynbna ba ka India ka kubur ban itnuh paidbah (recognise) ia ka Pakistan-Mihngi kum ka *Bangladesh*.

Ka thma ha Bangladesh kam shym neh slem. Ka Indira ka la ai jingmut ia ki shipai ba ki dei ban pyndep noh ia ki kam ki jam ha Bangladesh hapoh ka 15 sngi, shuwa ba kiwei pat ki Ri kin ia mushlia kam. Kane ka jingialeh ka la iaid beit iaid biang hapoh ka jingialam batbit eh jong u General Manekshaw, uba la ioh ia ka nam *Field Marshal* banyngkong duh jong ka ri India. Ka jingialeh ka la jur bha ha ka ka thaiñ mihngi kata ha Bangladesh. Ha Sepngi, ki shipai India ki la shu iada ia kaba dei ban iada khlem leh palat. Kane ka thma ka la long kaba pher bak ly bak na ki thma ialeh hashuwa :

pyrshah ia ka China (1962) bad pyrshah ka Pakistan (1965). Ha kane ka kynti, ki shipai India ki la pynpaw ia la ka jong ka bor da ka jingsngewthuh jingmut kaba paka hapdeng ki shipai-khyndew, ki shipaisuiñ bad ki shipai-duriaw.

Mar ia iohsngew ia ka jingpynbna thma jong ka India pyrshah ka Pakistan, ka America ka la phah ia ki kor thma bakhlaiñ duh jong ka - *Ka Seventh Fleet* sha ka duriaw jong ka India ha ka 9 tarik. Ka America ka la phah ia kane ka kynhun ialeh da kaba pynpaw ia ka jingthmu jong ka tang ban pyllait im ia ki nongtrei ka America kiba don ha Bangladesh. Kata ka la shu long tang ka pushara ia kaei kaba ka da mut jylliew—ban iarap ia ka Pakistan ban pynpait pynpra ia ka India lada lah. Mar kumta hi, ka India ka la phai sha ka Soviet Union na ka bynta ka jingiarap. Ym slem ka Russia ruh ka la phah ia ki Kor ki bor thma bakhlaiñ duh jong ka na Vladivastock ban buddien ia kata ka kynhun ialeh ki nong America. Ha ka 12 tarik u Noh-prah, u Kuznetsov, u Deputy Premier jong ka Russia u la poi ha New Delhi ban shong pynshngaiñ ia ka India. Ha ka jingfalang jong ka Security Council jong ka United Nations, ka Russia ka la iada ia jingleh jong ka India. Lada ym don sa ka Russia ban kyrshan ia ka, ka jing-ialeh jong ka India kan ym long kaba seisoñ eh haduh katta katta.

Ha ka 13 tarik u Nohprah, ka kynthun shi-pai Pakistan hapoh ka jingialam jong u General Niazi ka la pdiang ia ka hukum raikut (Ultimatum) jong ka India, ba ki dei ban aiti noh ialade bad ban sangeh thma la kumno kumno shuwa ka 16 tarik. Ha ka nohphai sngi jong ka 16 tarik, katba ka Indira ka dang don ha ka mynshem ringdur Television bad ki briew na Sweden, ka la ioh ia ka khubor ba u General Niazi u la kubur ban aiti noh ialade bad ban sangeh thma noh shisyndon. Markumta hi, ka Indira ka la mih na kata ka kamra bad ka la leit beit sha ka Dorbar Thawaiñ (Parliament) ban pynbna ia kata ka Khubor Babha hapdeng ka jingkynhoi risa jong ki dkhoh baroh.

Ha kata ka sngi kaba u General Niazi u la aiti noh ialade ha u General Aurora jong ka India, ka Seventh Fleet jong ka America ka la jagai tang kumba laiphew kynta na Bengal. Ban ym hap ha ki jingkynrum kynram, ka Indira ka la pynbna noh mar mar hi ia ka jingsangeh thma ha ka thaiñ Pakistan-sepngi, kumban pyni ba ka India ka long ka Ri kaba ieid ia ka jingsuk jingsaiñ bad ba ka la ialeh thma tang namar bym banse.

Ka pyrthei baroh kawei ka la peitmat bad ñiewkor ia ka jingkhelaiñ ki shipai India. Ka jingkynteit jong ka Indira ia ki briew kiba ong ba ka India bad ka Pakistan ki ia long kumjuh, ka la urlong dashisha mynta. Ki la peiphang ba kumba ka ong—"ka Ri India ka kham khelaiñ bunshah ban ia ka Pakistan."



Ha kata ka thma, ka India ka la knieh noh na ka Pakistan 5,619 sq. miles ka jaka bad kum ba 90,000 ngut ki shipai. Ka Indira ka la iaroh jynsur ia ka jinglah jong ki shipai bad ka la pynkup ha u General Manekshaw ia ka nam Field Marshal. Ma ka ruh ka la iohpdiang na u President ka India ia ka Khusnam Bharat Ratna na ka bynta ka jingnang jong ka ban pyniaid ia ki kam ki jam kiba la warlam ia kata ka jingjop bakhraw. Na ka bynta kane ka juh hi ka daw ka la ioh ruh ia ka Mexican Academy Award.

Hadien ba u Mujibur Rahman, u la lait noh na ka phatok ha Pakistan-Sepngi, u la poi da ka liengsuiñ sha Delhi ban ainguh ia ka Indira bad ia ki Nong-India baroh hi kiba la iarap kylluid mynsiem ba ka Ri jong u kan ioh ia ka Jing-laitluid.

Hadien ka thma, ka kyrteng bad ka nam jong ka Indira ka la saphriang kylleng ka pyrthei kum kawei na ki briew bapawkhmat duh ha ka pyrthei, katba ka nam jong ka Pakistan kum ka ri baiaryngkat bor bad ka India ka la nang synjor. Ka India ka la paw kum kawei na ki Ri bakhlaiñ duh ha Asia. Ka jingong jong ka, ka long dashisha kaba dei-ba ym lah ban buh ia ka India bad ka Pakistan ha kajuh ka kyrdan, Ka India ka kham khraw bun bun shah ia ka Pakistan.

Kh nang ban pynbeit ia ka jingpynphai noh ki shipai ba shah kem ha ka thma, ka Indira ka la dawot ia u Bhutto, u Myntri Rangbahduh ka

Pakistan ban ia kren sngewthuh jingmut halor kane ka kam ha Simla - kawei ka Ri lum jong ka India. Ha ka 28 tarik u Jylliew, u Bhutto, ba la synran da ka khun jong u ka Benazir bad kiwei pat ki kynrem ki lyndan ki la poi ha Simla da ka Helicopter. Hangne ruh ka Indira ka la pynpaw biang ia ka jingstad bad ka jingshemphang jong ka kum ka Nongsaiñ hima sima ba la phrang.

Ha ka 17 tarik u lber 1971, haba ki shipai India ki la mih lut na Bangladesh, ka Indira ka la leit jngoh ia ka Dacca, ka Nongbah jong ka Bangladesh. Hangne ka la ioh ia ki jingiaroh kiba bun, kum ka nongbah tympha bad ka nongpynim ia ki briew ka Bangladesh. Dei ha kata ka snem ba ka India bad ka Bangladesh ki la soi ia ka soksular paralok kaba arphew snem kaba iasyriem bad ka soksular ba la soi hagdeng ka India bad ka Soviet Union.

Naduh kane ka por, ka India ka la kham jan shuh shuh sha ka Soviet Union ban sha ka America. Ki snem ki la pynpaw ia kane ka jingiatrei synrop lang ha ki liang kiba bun jong ka ioh ka kot, ka Industry bad kiwei de ki phang. Dashisha ka jingong, ba u lok ha ka shipa dei u lok uba shisha, ka paw shynna ha kane ka khep.

Ka jinglah jinglai jong ka ha kane ka thma, ka la pynioh na la ki jong ki parari ia ka jingsngewieid sngewthoifi bad ka jingsngewsarong ka ba palat liam. Kylleng, ki briew kim lah khlem

da nam ia ka jinglah jingiai, ka jingshemphang  
 bad ka jingstad jong ka, kumba ka la pynpaw ha  
 ka por jong ka thma.



## LYNNONG

### 11

#### KHLEM PYNKSAN, TANG KABA DEI

Ka I, Safdarjang Road, ka la kylla long ka iing shong jong ka Indira naduh u snem 1964, haba la pynlong ia ka ka Myntri ba dei peit ia ka kam Broadcasting and Information hapoh ka jingialam jong u Lal Bahadur Shastri kum u Myntri Rangbahduh. Kane ka la long ka iing ka bym da heh than kum ka Teen Murti House. Ka don saw tylli ki kamra thiah. Katba dang iaid ki sngi ki ia, katba ki arngut ki khun shynrang jong ka ki nang ia heh ia san, ka la sngewdonkam ban pynheh ia kata ka iing khyndiat. Katkum ka jingong jong u Yashpal Kapur ha ka Saptahik Hindustan (5.3.73), ka Indira kam ju lah shah ban iohi ia kino kino ki jingjakhlia ha iing ne ha phyllaw. Ka ju pynbeit pynriam dalade hi ia ki miej ki shuki ha iing bad ha ophis. Ka peit ka jngoh bi dalade ia ka kper syntiew kaba don ha phyllaw. U mali u dei ban da kynjoh ktien ia ka shuwa ban bet ne ban thung ia uno uno u syntiew. Ha iing ruh kumba la ong haneng, ka peit ka jngoh dalade hi ia ka jingpynbeit ki miej ki shuki, ki almari, ki karpit bad ia ka rong ha iing ha sem. Ka jied hi ia ki jaiñ pyrda, ki jaiñ sop shuki ba kin ia mir bad ka rong jong ka kynroh. Ka nongshet ruh kam laitluid, ka hap twad jingmut

na ka ban shet aŭ. Kumta la ka long ka briew kaba bunkam bunjam hynrei ka ioh por pat rub ban peit ban jngoh ia ki kam iing kam sem bateh bad bathaiñ.

Kum ka Myntri Rangbahduh kaba tyrpeng ia ki jingkit kiba khia, Ka Indira ka ju khie dang step man la ka sngi, wat la ka leit thiah ynda la synñia bha. Mar ia khie ka leh ia ki eksersais Yoga, nangta ka sum ka sait, ka sad ka khyllong, bad mar ia dep diñsha step ka peit luk liak ia ki kot khubor bad ki makasin bad nangta ka sa peit sa ia ki kot ki sla kiba u Private Secretary jong ka u wanlam.

Ha ka por 8.30 kiewsngi ka mih na la iing, na I, Safdarjang Road ban leit sha ka I, Akbar Road, kaba don markhap hi, ban iakynduh ia kito kiba kwah ban ia kren bad ka. Napdeng kita, ju don ki Myntri jong ka, ki Nonglalam na ki jylla, ki briew na ka Seng Congress, ki Nonglalam ki liang pyrshah, ki riewniam na ki jingngait bapher, ki nongrep, ki khyannah skul, ki nongwankai sngewbha na Ri bad nabar Ri, bad ki briew kiba shu kwah ban iohi bad ban shu ia shondur bad ka. Kumne man ka step ka ju iakynduh ia ki briew da bun hara. Ka hi ka batai: "Ha ka jingladei jong nga bad kito kiba wan ban iakynduh ia nga, ngam ju leh khyllaiñ . . . . Ngam ju pynlut por ha kiei kiei ki bym donkam . . . . ha India", ka bteng, "ki briew ki pynlut ia ka shiteng kynta kaba hashuwa, ha kaba kylli - kumno phi long? . . . Kumno ki khun? . . . . la lang katno ngut ki ksiew? . . . .

Ngam don por na ka bynta kine ki rukom bang ktien. Ymdei ba ngam ngeit ia kita ki jingleh, hynrei nga sngew ba nga dei ban pyndep nyngkong nyngshap ia ki jingtrei, hadien kata ban ia shong bad iathuhkhana”.

Ha ka por 10 baje kiewsngi, ka ju poi ha ka ophis jong ka, kaba don ha South Block, ne haba ka Parliament ka shong iatai, ka la poi sha Parliament ha kata ka por. Ha ka por shibaje ka ju leit bam ja sha iing nangta ka shongthait shikynta bad ka leit biang sha ophis. Janmiet ka ju sngewtynn timer eh ban shu ioh shong ha iing bad la ki khun. Hadien ba la dep bam dep dih ka shong biang ban trei ban ktah haduh ynda la jan dap shiteng synfia, nangta kan sa leit thiah. Ka Indira ka trei ym duna ia ka 12 kynta shisngi. La ka bunkam bunjam, ka ju iohpor pat ban ia kren ia khana bad ki ba ha iing ha sem, ki khun bad ki pyrsa.

“Ym ju don shuti na ka bynta jong nga”, la ju ud ka Indira, ki sngi kiba ka jup yrshang katlah katiai ban lait na ka ka trei ka ktah dei tang ki sngi u Trai. Ha ki sngikha jong ka ruh, ka ju pyrshang ban ym don ha Delhi, hynrei ban ia kmen iasngewbha tang shikhun shikmie ha kano kano ka kyndong bajaijai jong ka Ri.

Ha kat kane ka jingbunkam bunjam jong ka ha kaba ialam ia ka Ri synshar paidbah baheh tam ha pyrthei, ka Indira kam ju klet wat shikhyllipmat ruh ia ka kamram jong ka jinglong kmie jong ka. Ka la phah ia ki khun

baroh arngut sha ri nongwei ban khrehkot khrehsla bad ban pyntbit lalade. Haba ki don ha iing bad ka, ka Indira kam ju latai bad ki ia ki nia saifi hima sima, kumba ma ka hi ka ong : "Nga pyrshang katba lah ei ban pynjngai ia ki na kata".

U Rajiv, u khun banyngkong jong ka, hadien ba u la pas na Cambridge, u la trei kum u nong-fiah liengsuifi ha ka Indian Airlines. U long u briew uba jajai, bad u bym ju da kwah ban paw khmat palat. U para babud jong u, u Sanjay, u long uba pher bal ly bak na la u hynmen. Une u long u samla uba ieid ia ka rong ka tamasa bad jan man ki thliew iing ha Delhi ki ju don nia eiei ban latai shaphang ka longbriew jong u. Ka jingkiew skong jong u kynsan kynsan ha ka Elekshon ha u snem 1971, ka la pynlong ia ki briew baroh ban pyrkhata ba la mang ia u da ka kmie ban bteng ia ka kam jong ka. Sniewbok ba kane ka jingangnud jong ka kmie, lada ka long kaba shisha, ka la shu pulom haba u la khlad noh na kane ka pyrthei, hiphew sngi hadien ba la thung kam ia u kum uwei na ki *General Secretary* jong ka *Congress (I)*, ha ka aksiden ba la jja katba u dang shong ha ka liengsuifi. Une u samla u la kwah ban seng ia ka karkhana shna kali-rit-ka Maruti ha Delhi, kaba la long ka daw jong ki jingkren thut na ki liang pyrshah baroh ha ka iing Dorbar *Parliament*.

Haba kine ki arngut ki khun jong ka, ki ju wan lalam paralok sha iing, ka Indira kam ju

ong eiel, ka sngap ia ki jinglakren jong ki khlem leh btai ne salia. Ka Indira ka long ka kmie kaba shisha.

Ka Indira ka long ruh ka briew kaba sngewtynnat eh ban pule kot. La ka bunkam ha kaba iakynduh ia ki jingeh bapher jong ka ri, ka ju ioh por pat ban pule ia ki kot khubor, ki makasin, ki kot jinglathubkhana bad ki poitri. Ha ka almari bub kot jong ka, ki don ki kot ba la thoh da u T. S. Eliot, u Jean Paul Sartre, u Albert Camus, u Andre Malraux, u Kingsley Amis, u J. Krishnamurti, bad ki kot shaphang ka Helen Keller, u Albert Schweitzer, u Paul Robeson uba ka ithuh, u Dylan Thomas, u Charlie Chaplin, u Mao Tsetung, u Tito bad kiwei. Ka don ruh ia ki thup kot bakynsai kiba ia dei shaphang ka *Anthropology* ka sobjek ba ka Indira ka ju sngewtynnat eh.

Man ka step ka Indira ka ju sngewtynnat ban leh ia ki *Cross word Puzzle*, kiba ju don ha ki kot khubor. Ka ju smat ban pyndep ia kane khamtam ha ka por ba ka dep dihasha mynstep. Ka ju sngewtynnat ruh ban leit peit kai phlim, haba kam iohlad ban leit peit sha ki iing sinema kiba don ha sor, ka ju phah pyni kyrpang ia ki phlim kiba ka kwah peit ha ka Presidential Palace. Haba ka leit jingleit shajngai na la Ri, khamtam haba ka dang dei ban synran ia la u kpa, ha ka por ba ka lait; ka ju sngewtynnat eh ruh ban leit peitkai, ban leit sha ki *opera*, ki *art galery* bad ban leit sha ki dukan die kot.



Ka Indira ka ju sngewieid eh ruh ia ka shad ka mastieh kumba la pyni mynba ka dang don ha shantiniketan. Bunsien ha ki jingleit jngoh ia ki kyntoit ri, ka ju ia shim bynta ha ki jingshad kiba laiphew har.

Ka Indira ka nang shaid shaid bha artylli ki ktien : Ka Hindi bad ka English. Haba ka leit ban jngoh ia ki kyntoit bapher jong ka Ri, ka pyrshang ruh ban nang shikyntien arkyntien ia ka rukom kren jong kita ki kyntoit. U Myntri Rangbahduh jong ka Canada, u la lyngngoh ngaiñ haba u la iohsngew ba ka kren ia u da ka ktien French kaba paka ha u Naitung 1973 haba ka la leit jngoh ia ka Ri Canada.

Ka Indira ka long ka briew kaba ieid ia ki jingfalehkai bad ki sports. Da ka jinganguud ba ki khun ka Ri kin kiew irat ha kane ka liang, ka la pdiang ban pynlong ia ka Asian Games ha Delhi ha u snem 1982. Ka jingpyn-deng ha ka ia ka medal ksiar *Gold Order Of the International Olympic Council* ha u snem 1983, ka la long ka dak ka shin kaba shai ban pynpaw ba wat ka pyrthei baroh kawei hi ka kubur ba ka long ka briew kaba ieid ia ki sports bad ki jingfalehkai. Naduh ki Nongfalehkai Kirkit, ki Nongfaleh hoki, ki nongfalehkai tenis bad ki nongmareh ki nongkynthih, ki leid ia ka, naba ka long ka briew kaba sngew-sarong lem bad ki ha ki jingjop jong ki.

Ha ka liang ka *Science* bad ka *technology* ruh ka India ka khlem sah dieo na ka daw ka

jingkyrshan bad ka jingpynshlur jong ka Indira, Ha u Jymmang 1974, ka India ka la pynbthei ia u bom nuclear banyngkong ha Pokharan, kaba don ha ka jylla Rajasthan. Dei da ka jingbud-dien jong ka ba ha u iaiong 1975 u Aryabhata u la kiew sha suiñ. Kane ka long ka sien banyngkong ba ka India ka la ia shim bynta ha ki prokram ha haw haw. Marbud la pynkiew sa ia u Bhaskara I, u Rohni I, u Rohni II, u APPLE, u Bhaskara II u INSAT-I (A) bad u INSAT-I (B) bad ka jingiashimbynta jong u Rakesh Sharma ha kaba leit sha haw haw bad ki nong Russia ha u snem, 1984. Dei da ka jingiarap sbun bad ka jingkyntu jong ka, ba lai kynhun ki la leit sha ka Antartica. Ha ka jingialam jong ka kum ka Myntri Rangbah duh, ka India ka la lah ban iarap ia ki 30 tylli ki Ri ha ka liang ki karkhana bad kiwei de ki technology.

Ym kum kiwei pat ki kynthei India, ka Indira kam ju deng ksar, kam ju deng kpieng deng ksah, kam ju pyndonkam ruh ia kino kino ki jingsleh bad ki jingtah iwbihi kiba ki kynthei briew ki ju sngewtynnat. Ka long ka briew kaba lebhuid. "Nga long kum kiwei pat ki briew," ka ju ong, "Ngam ju leh mynleh. Nga long barabor kumba nga long. Haba nga dom, nga pyni ba nga dom. Haba nga kmen nga pyni ruh shabar ba nga kmen".

Ha ka jingim barieh jong ka, ka Indira kam da long eh kum u kpa jong ka, uba kyntait ia kino kino ki rukom ngeit blei baroh. Ka Indira

ka ngeit ha u Blei, ka sap tipniam kaba ka la ioh na la ka kmie. Ka burom ia ki sadhu bad ki swami, khmtam ia ka Anandmai-ka Kmie, kaba long ka lok jong u Aurobindo. Ka Indira ka ngeit ha u Blei, la ym ju da kham iohi ia ka ba kan duwai ne kan puson. Ka pule ia ka Bhagavad Gita man la ka sngi, ka leit jngoh ruh ia ki jaka kyntang jong ki niam baroh. Don kiba la kynnoh ia ka, ba ka long kum kiwei pat ki Nong India kiba ngeit bie, kiba ngeit ha ki khlur, ki nongpeitkti bad ki nongpeitkot. Ha ka jingim jong ka, kam ju pynpaw shabar ia ka jingngeit jong ka, namar kum ka khlieh duh jong ka Ri ka bym ia shah ia kano kano ka niam, ka sngewdei ba ka jingleh bad ka jingsngew jong ka shimet hi, kam dei ban pynthut ia ka jingiaid beit ki kam ki jam ka Ri.

Ka wei kasap kaba paw shynna duh ha ka, dei ka jingbymshaniah jong ka ha ka jingaibuit tang jong uwei u ar. Bun kiba la ong, ba ha mynbasdang ka la dem kum u khah ha ka jingaibuit bashemphang jong u Ashoke Mehta, u Dinesh Singh bad kiwei ; hynrei hadien hadien pat ma ka hi ka la rai ia kaba ka sngewdei. Haba don ba ong ba ma ka, kum ka Myntri Rangbahduh ka don ia ka bor bamaiam, ka Indira ka ju phai ktien da kaba ong : "Ka Myntri Rangbahduh ha ka jingshisha kam don bor eiei, namarba la teh la khum ia ka da ki aiñ ki kanun, da ka Parliament bad kiwei pat kiba kum kita. Ngam lah ban shu jied ia uba nga mon . . ." ka la kren pynkut.

Ha ka jingpynñaid kam pynñaid jam ka In-  
 dira kam ju sngewtynnai ña ka jingleh pathar  
 ha ka liang ka pisa ka pilaiñ. Na ka bynta  
 jong ka, kiei kiei baroh ki don la u pud u  
 sam. Ka hi ka la thoh kumne sha u Myntri  
 Rangbah ka Jylla Maharashtra ha u Jylliew  
 1971. "Kan ym myntoi eiei ña ngi ban kren  
 shaphang ka jingroi jingman ka ñoh ka kot  
 paidbah, haba mangi ngi leh lutphut. Bun-  
 sien haba nga pdiang ña ki jingkhoh sngewbha  
 ban ña don lang ha ka jinglapoikha poiman ha  
 ki ñing jong ki nonglatreilang jong nga, nga  
 ju sngewlynga marwei marwei bad nga sngew  
 kum ban shu mih noh hi soit. Nga tharai ba  
 ngi dei ban pynlong ña ka kum ka aiñ jingim  
 jong ngi, ba ki jinglapoikha poiman ha ki ñing  
 ki sem jong ngi, kin ym lehrong lehtamasa  
 palat . . . . Ymdon kino kino ki ri kiba la  
 ñaid shakhmat ba kin lut phut haduh katne  
 katne ha ki khawai dawai kum ha ka Ri  
 jong ngi."

Bun bun ngut, khamtam kito kiba pyrshah  
 ña ka, ki la suit rong ña ka ba ka dei ka  
*Dictator*. Kane ka lah ban long kaba shisha  
 hynrei ym ha baroh ki jingleh jong ka. Kum  
 ka nuksa, da kaba sngap ña ka jingud jing-  
 nam jong ki riwulum ka dong shatei lam mihngi  
 ka ri, ka Indira ka la pynñoh ña ki jylla ba-  
 thymmai ha u snem 1971, ña ka Meghalaya,  
 ka Manipur bad ka Tripura da kaba thaw ña  
 ki artylli ki Union Territory; ka Mizoram bad  
 ka Arunachal Pradesh. Lada ka dei ka Dicta-

tor kan ym pynlong ia ka Elekshon ha Nagaland ha u snem 1974, ka elekshon kaba nyngkong naduh ba ka Ri ka la ioh ia ka jinglailuid.

Ka jingñiew ia ki briew kiba lah kiba iai kum ki blei, ka long kaba dang jia ha kane ka Ri India jong ngi baduh kine ki sngi ki ia. Dei ia kane, kaba ngi khot ka *Personality Cult* ba ka Indira ka la pyrshah eh. Ka jingñiew-blei, ka jingnguh jingdem ia ki balah bai ai ka la paw shynna ha bun ki khep jong ka jingim jong ka, ha kaba ki briew kiba kwah ban ioh eiei na ka ki la pyrshang ban leh bad ban kyntu ruh ia ki paidbah ban leh. Kane ka paw shai kdar ha kaba ki briew ki pyrshang ban ai kyrteng ia ki nongbah bad ia ki *Institution* da ka kyrteng jong ka. Kum ka Alexander Dock ha Bombay ban khot roh Indira Dock, ia ka *Canal* ha Haryana ban khot da ka kyrteng jong ka. Kine ki jingai jingmut ki la mih ym na ka, hynrei kumba la pyni haneng, na kito kiba bud synran ia ka. Haba ka *Women's wing* jong ka Congress ka la kwah ban pynlong ia ka sngikha jong ka kum ka *Women's Day* (Ka sngi burom ki kynthei ka Ri), ka Indira ka la pyrshah. Kumjuh ruh, ka Sorkar kmie, da ka jingkyrpad jong ka sorkar Meghalaya ha u Naiwieng 1972, ka la pynrung ia ka bill hapoh Parliament ban pynlong ia ka skul-bah (University) ka ban kyrteng ka Indira Gandhi University. Kane ka kyrteng ka la pynlong ia ki dkhoh ka Dorbar thawaiñ, ban kyntait bad ban biria ruh ia ka sorkar jylla Meghalaya.

Kane ka la wan khamtam eh na u Hiren Mukherjee, u MP Communist uba la ong ba ka jingpynkyrteng ia ka University ha Meghalaya kum ka Indira Gandhi University, ka long kaba pyrshah ia ka raiñ ka rem. U la pynrem ia ka kum kawei na ki rukom jylliah poh'jat ban ioh eiei shuh (an instant of Sychophantic adulation). Hadien, dei ka Indira hi kaba la kyntu jur ia ka Cabinet ban pynkylla noh ia kata ka kyrteng. Ka nongbah jong ka Arunachal ruh ka la dei ban shim ia ka kyrteng jong ka, katkum ka jinglamir jingmut jong ki kyrem ki lyndan ka Arunachal, hangne ruh ka Indira ka la pynpaw ia la ka jingpyrshah.

Ha ka jingim jong ka, ka Indira ka kham lah ia ki jinglaroh ban ia ki jingkynnoh ka da bishar sani bha ia ki jingkynnoh shuwa ba kan pynnoh la ka rai. Ma ka bi ka la ong ia kito kiba pyrshang ban jylliah kjañ ia ka khnang ba kin ioh kiew skong: "Ym don kano kano kano ka Ri kaba dei ban pynshong nongrim ialade tang ha uwei ne kawei ka briew...Lada ka Ri ka pynshong nongrim ialade tang ha uwei ne kawei ka briew kata kam long kaba bha na ka bynta jong ka".



## LYNNONG

12

### KI SNGI BADUM NGIEW

Ha ka 12 tarik u Jylliew 1975, artylli ki jingjia ki la wan lyngshop lang ha ka juh ka sngi ban pynkyndeh dohnud bad ban pyn pisajingmut ia ka Indira Gandhi. Dej ha kane ka sngi ba u Nongbishar jong ka Iingshari ha Allahabad (Uttar Pradesh), u Jagmohanlal Sinha u la rai pynrem ia ka Indira, ba ka la leh palat ha ka Elekshon u snem 1971, da kaba pyndonkam ia ki nongtrei sorkar na ka bynta ka konstituensi jong ka. Ia kane la tih bad la pynpaw pyrthei da u Raj Narain, u kyrtong uba la shah pynrem ha ka.

Ka Kashari ka la rai pyntem ia ka, ba ka la leh be-aiñ hapoh ka section 123 (7) jong ka *Representation of People's Act*. Ki daw ki long kine :

1. Ba ka Indira Gandhi ka la ioh ia ka jingiarap jong ki ophisar sorkar ban pynbeit ia ki rynsan bad ban pynbiang ia ka ilektrik na ka bynta ki loudspeaker ha ka jingialang ba ka la dei ban kren paidbah ha Rae Barelli ha u rymphang shitarik bad 25 tarik, 1971.

2. Ka jingpyndonkam ia u Mr. Yashpal Kapur naduh u kyllalyngkot 7 tarik haduh 24 tarik 1971, haba u Yashpal Kapur u dang dei u

Gazetted Officer ha ka kam jong ka sorkar India, uba dang bad ia ka kam Officer on special duty ha ka Secretariat jong ka Myntri Rangbahduh.

Haba iohsngew ia kane ka jingpynbna jong ka Allahabad High Court, ki Nongialam ka liang pyrshah, ki la ban ba ka Myntri Rangbahduh ka dei ban iehkam noh khlem pyntud shuh, katba ka Indira pat ka kiew sha ka Supreme Court ban iada ialade.

Ka daw kaba la pynkhaweit shuh shuh ia ka Indira ka long ka jingkyntu paidbah jong u Jayaprakash Narayan, uwei na ki nongialeh laitluid bapawnam ka Ri, ha ka 25 tarik u Jylliew ha Ramlila Ground ban ialeh tynggeh pyrshah ia ka Sorkar. Une u la kyntu ia ki pulit, ki shipai ban ym kohnguh shuh ia ki jingbthah jong ka sorkar, ia ki shakri sorkar ban ym leit trei leit ktah shuh bad ia ki khynnah skul ban pep skul noh kum ka jingialeh pyrshah ia ka Myntri Rangbahduh ka bym iehkam noh, hadien ba ka la ioh ia ka rai jong ka Allahabad High Court.

Kane ka jingkyntu jong u JP (Jayaprakash Narayan kumba ki ju khot ieid ia u) ka long kaba ma bad kaba mynsaw ia ka Ri baroh kawei hi. Lada ka Indira kan iehkam noh, mano keifi ban kit ia ka lyngkor jong ka Ri ha kata ka por bakhim ? Nalor kata ka jingkyntu jong u kam shym laid jai jai sah, naba ym slep ki briew kiba shim kabu ki la phnang la ki jong ki



lad lohngong, khlem da pyrkhat ia ka burom ka  
ijot jong ka Ri.

Kaba la kham ktah shuh ia kata ka jingrai  
jong ka Allahabad High Court, ka la long ka  
jingpynbna ia ka result elekshon sha ka ling  
Dorbar Thawaiñ ha Gujarat, ha kaba ka seng  
Congress ka la rem. Kane ka la long kum u kuli  
bakthang tam ha ka shadem jong ka Myntri  
Rangbahduh kaba long ka puron-pdeng ha kata  
ka jingfaleh.

Nalor kine ki daw, ka tlang jong u snem  
1974, ka la long kaba la pynjulor khait ia  
ka thung ka tep baroh. Kumta, ka Ri baroh  
kawei ka la don ha ka tyngam jong ka 'Nem-  
sniew kaba shykhei. Ka dor ka mur ka la shu  
siat shaneng khlem sngewthuh, ka jingbun jong  
ki nongdie tuh ia ki marbam-mardih bad ia ki  
jingdonkam bapher, ka la pynlong ia ki briew  
ban leh kiar na ka sorkar, kaba ki sngew, ba ka  
shu heh tang ka nia khlem kam. Kane ka la paw  
shai ha ka jingleit jong ka Myntri Rangbahduh  
sha Maharashtra ha u kyllalynghkot 1974, ha kaba  
ki paidbah ki la kawang ia ka da ki juti, ki  
slipar da kaba pyrta dom : "*Bhashan mat do, ra-  
shan do*" Kaba mut wat ai ha ngi ia ki jinghren,  
hynrei, ai ha ngi ia u rashon. Ka dor ka mur, ka  
la sdang ban kiew naduh ki por jong ka Thma  
Bangladesh hi, ha kaba ka India ka la dei ban  
kit ia ka ram kaba khia ban pyndap pynbiang ia  
ka bam ka dih ha ki nongphetwir bad ha kaba  
bsa ia ki shipai da ka bam bad da ki tiar faleh  
ki barem dor,

Kaba kham ma, kaba la ap kmang ha tyng-kong jong ka Ri ka la long ka jingialeh bad ka jingbymimasuk ha man la ki dong jong ka Ri hi. Ki Nazalite ka Calcutta ki la long ka bih kaba sniew tam ba ka Ri ka la iohi. Ka jingiakhih paidbah jong ki nongtrei nongktah, ka jingia-umsnam kylleng kylleng, ki la long dashisha ki dak kiba pynpaw ba ka jingpait jingpra jong ka ri kam jngai shuh.

Namar kine ki daw baroh, ka Indira ka la sngewdei, da ka jingai jingmut jong u Myntri Rangbah ka West Bengal, u Siddhartha Shankar Ray, ban pynjari noh da ka *Internal Emergency*. Kumta ha ka 26 tarik u jylliew, u President Fakhruddin Ali Ahmed u la pynjari ia ka Emergency hapoh iing. Ka Emergency ka la long ka lad kaba biang tam ban pynbeit pynbiang ia kiei kiba duna. Ka trei ka ktah ka la iaidei por, ki nongtrei sorkar ki la pyndep donburom ia ki kamram jong ki, da kaba poi bad kaba mih na ophis ha ka por kaba biang. Ki shnat baroh kiba hap hapoh ka jingpyniaid jong ka Sorkar ki la iaidei beit iaidei ryntih. Ki nongkam bymman ki la shah pynkhuid uwei hadien uwei pat. I kumba ka bneng kan sa khuid kdiar ha ki khyndiat por.

Ha ka 27 tarik u Jylliew, u President Fakhruddin Ali Ahmed u la pynjari ia ka aifi *Maintenance of Internal Security Act*. Da kaba pynjari ia kane, ka sorkar ka la ioh lad ban kem ia kino kino ki briew kiba ka i shankhmat, khlem don iingshari ban iada, khlem ailad ia kita kiba

shahkem ban tip ia ka daw balei ba ki shah khum shah teh. Namar ka jingbym pyndonkam bha ia kane ka aiñ, ha ka jaka ba kan long ka nonglada ka la long pynban u diengsympat bad ka jingkahdum ia ki jingpyni kiba lah ban long kiba donkam ha ka jingshisha.

Shen shen, la mih sa u khun jong ka Indira, u Sanjay Gandhi ha ka dongdit jong ka saiñhima sima, kum u nongialam ka shnat ki samla. Une, nalar ki 20 mat treikam ba la pynbna da ka kmie jong u, u la pynbna sa ia ki 5 mat treikam na ka bynta ki samla. Une u samla, da ka jingleh jong u, (la u angndd ban lehbha), u la pynsniew dur shibun eh ia ka kmie jong u da ka jingdawa bad ka jingleh thom bor jong u halor ki rympei ling da kaba pynbor ia ki briew ba kin pynduna khun. U Sanjay u la pynbna ba baroh ki nongtreikam sorkar ki dei ban pynduh khun noh hadien ba ki la ioh laingut ki khun. Ha ka jingialam jong u, da ki spah ngut ki nongkhrong ki la shah lum na ki steshon rel bad shah ialam sha ki hospital ban shah puid pynduh khun. Une u samla u la kyntu bad u la pynngeit ia ki baduk batoi da kaba tyrwa pisa ruh bun bunsien.

Khlem pep, Ka Thong ka long kaba bha eh : kata, ban pynduna briew, namar ka jingbun briew palat ka pynhiar ia ka ioh ka kot, bad ka kynshoit ia ka dor ka mur ban siat shaneng. Phewse, Ka Lad kaba u la pyndonkam ka long kaba pyrshah ia ki aiñblei aiñbriew jong ka pyrtthei naduh mynkulong kumah.

Katkum ka jingjurib hadien ka Emergency, la shem ba la kem bad set phatok palat 1,50,000 ngut ki briew na ka Ri baroh kawei. Na kine 40,000 ngut ki la shu shah set khlem daw. Bun hajar ngut ki la ñap na ka jinglehbein lekhoh ki pulit. Katkum ki kaiphot bapaw pyrthei hadien, ki pulit ka Karnataka, ka Kerala, ka Haryana, ka Madhya Pradesh, ka Bengal bad ka Maharashtra ki long kiba la leh jubor duh halor ka longbriew manbriew.

Dei ha ka 26 tarik mynstep, ba la sdang ban kem ña ki Nonglalam ka liang pyrshah baroh jong ka Ri bad ba la khang khyrdep ña ki kot khubor. Ka Sorkar ka la shim noh na ki nongshongshnong, katkum ka riti synshar, ña ki hok ba la tyngkai ha ka Part III (peit art. 359). Ki sngi jong ka Emergency ki la long ki sngi ba ym pat ju iohmad koit naduh ki sngi ba ka India ka la long ka Ri kaba laitluid.

Katkum ka Riti synshar, ña ka elekshon bahynriew jong ka India sha ka Dorbar Thawaiñ Lok Sabha, dei ban pynlong ha u rymphang 1976; hynrei, da ka jingban jong ki dkhoh ka seng jong ka, khamtam eh jong u Sanjay, ka la pyotud noh ña ka da shisnem. Ka daw ba ki nongiatreilang jong ka ki la ai ka long ba ka Ri kam pat bit pat biang ban pynlong elekshon, namarba dang bun palat ki kynrum kynram.

Ha u snem 1977, la pynlong ña ka jingjied dkhoh sha ka Lok Sabha ka bahynriew. Ka la

long ka lhuh bajylliew na ka bynta ka Myntri Rangbahduh, ka bym shym la poi pyrkhath ba ka party jong ka bad ma Ka hi ruh kan rem ha kata ka jingialeh. Ka Janata Party ka la jop pyrshah ia ka, da ka jingaiti-mon jong u JP ialade ban kyntiew ia kane ka party pyrshah ia ka Congress da kaba leit sha man ki dong jong ka Ri. Bun na ki nongialam ka liang pyrshah ki la ialeh da kaba don ha phatok khlem ioh kren hi dalade ha ki nongjied.

Ka la long ka bym shym poi pyrkhath ba ma Ka kan shah kyntait ha ki briew jong ka Ri. Ki daw ba ka Indira Gandhi ka la shah rem ki lah ban long kine ;

Ka jingbakla kheih jong ka Indira ia ka jingpawnam jong ka. Kam tip ki briew ki pyrkhath kumno shaphang jong ka bad shaphang ki jingleh ka sorkar jong ka. Ka daw kaba kongsan ha kane ka khep ka long namar ka jingkhaw khyrdep ia ki kot khubor, ki kot, ki radio bad ki ryusan kren paidbah. Ka RAW, ka jabieng peitthuh ba ka la pyndonkam, ka la bakla shibun haba ka la ai jingmut ia ka Indira ba kiei kiei baroh ki biang.

Ka daw baar, ka long ka jingbakla jong ka ha kaba tharai ba da kaba pynbna ia ka elekshon, ki dkhot ka seng Congress kin ia tylli mlon kawei ban kyrshan ia ka ; phewse, kane ka long kaba bakla, namar bun na ki dkhot jong ka seng Congress ki la ngiah ia ka jingshim

kabu bad ka jingleh thombor jong ki katto  
katne ki riew bat bor.

Ka jingpynlong ia ka Congress for Democracy (CFD) da u Jagivan Ram, u Bahuguna bad u Nandini Satpathy, ka la long ka jingduh kaba khraw ia ka Congress ba la ialam da ka Indira.

Ka daw balai kaba la wanlam ia ka jingkyllon khram ka sorkar, ka long khlem pep ka jingpyndom pynsat jong ka sorkar ia ki briew lyngba ka jingpynduh khun jubor (Compulsory sterilisation). Kane ka jingleh thombor halor ka longling longsem, ka la long kaba kthang tam ia u briew baroh naduh u baduk haduh uba don ba em. Ka jingbthah ba ki nongtreikam sorkar baroh ki dei ban pynduh khun noh hadien ba ki la loh laingut khun, ka long ka thliw jyntep ba u Sanjay bad u Bansilal ki la tih na ka bynta ka Indira Gandhi.



## LYNNONG

13

### KA JINGIALEH KABA SHYRKHEI

Ka Indira, da kaba shaniah ban jop beit ha ka jingfaleh elekshon sha ka Dorbar Thawaiñ (Parliament) ka la pynbeit ban pynlong ha u Lber 1977. Ka daw ba ka la rai ban pynlong kloi ban la kaba la mang ka long, namarba katba dang faid ki snem, ki dor ki mur ruh ki la nang kiew. Ka la sngewdei ban shoh la u nar katba u dang saw. Artat ha uta u snem, u jingthung jingtep bad ka bam ka dih ka la shu biang, kumta shuwa ba kan poi ka lyiur bad ka jingduh bam duh dih ka la sngewdei ban ym pynslem shuh.

Da ka jingshngaiñ shimet, ka la kren lymba ka All India Radio bad ka Doordashan ha u kyllalyngkot 18 tarik, 1977 ban pynwai noh la ka Parliament bad ba yn sa pynlong la ka Elekshon ha u Lber jong uta hi u snem. Kane ka jingpynbna ka la long kum u pyrthat uba pynkyndit la ki briew baroh. Ha ka jingkreñ jong ka ha kata ka miet ka la ong: "Man ki elekshon ki long ka jingphla la ka jingngeit. Ka long ka kabu ban pynkhuid la ka jingkynrum kynram ha ka kam paidbah. Te, to ngin la leit sha ka Elekshon da kaba kut jingmut ban pynskhem shuh shuh la ka bor jong u paidbah bad paa kyntiew la ka kyrteng jong ka Ri India."

Shuwa ba kan ai ia kane ka jingkren lyngba ka All India Radio, ka la phah hukum ban pyllait noh ia u Morarji Desai, katba ia u JP la pyllait kham hashuwa. Hadien kata, ka la pyllait ia ki nongialam ka liang pyrshah uwei hadien uwei pat.

Ha ka 20 tarik u kyllalyngkot, ka sorkar ka la weng noh ia ka jingmana halor ki Kot khubor khnang ban ailad ia ki liang pyrshah ban ia airenng da kaba.khuid bad da kaba laitluid. Ha ka juh ka sngi, u Morarji, u la pynbna paidbah ba ka liang pyrshah kan ieng tylli lang kawei bad man ka konstituensi kan pynieng tang uwei u kandidat ban pyrshah ia ka Congress. Ha ka 30 tarik uta u bnai, u Morarji u la plie paidbah ia ka jingialap elekshon jong ka Seng Janata (kaba kynthup ia ki liang pyrshah baroh) ha Ramlila Ground. U paid babun sat u la poi sha kata ka jingialang ban synrop lang bad kane ka party thymmai jong u JP, uba ki khot ieid u *Lok Nayak* (U Nongialam ki paidbah) bad ia ki nongialam ka seng ialam pyrshah.

Ka la long ka bym shym poi pyrkhath ia ka Indira haba ka la loh ia ka shithi ieh kam noh jong u Jagivan Ram na ka seng Congress bad na ka shuki Myntri. Ka jingieh kam noh jong une u rangbah ka la long kum u bom uba la bthei ha ka jylli jong ka Congress. Ngim dei ban klet ba une u rangbah u la kyrshan tynghe ia ka Indira ha ka jinglapait ka seng Congress ha u snem 1969. U long na ka jait Harijan, ka jait bapoh. U don bun ki nongbud khamtam ha ki thain



Bihar bad Orissa. Ka Indira, mar ia loh ia ka shithi iekham noh jong u, ka la ong ba u Jagivan Ram u la shet kylla ia ka, naba um shym ia iathuh hano hano ia ka jingthmu jong u wat san minit shuwa ruh. "Ka long kaba shisha ba nga khlem iathuh ia ka", u la kren da kaba phuhsamrkhie artat, "Nga khlem ong eiei ia ka wat san minit shuwa ruh". U Jagivan u la seng ia ka Congress For Democracy, bad u la dawot ia ki dkhoh ka seng Congress ban ia mih paidbah ban iasynrop lang noh bad u khnang ban pyndem ia ka Indira.

Ha ka 5 tarik u rymphang, ka Indira ka la plie ia ka jingfalap Elekshon ka seng jong ka ha ka madan Ramlila Ground. Ha kata ka sngi ka la kren dom tynggeh ia ki liang pyrshah, ka ong ba ka seng Janata ka long "Ka *khichri* ki party kaba kynthup ia ki RSS bad ia ki Marxist". Da kaba pyrta shla ka la ong: "Lada kim sngewtynnatt ia ka synshat paidbah ha ka Ri jong ngi, ki long kiba laitluid ban leit sha kiwei pat ki ri kiba ki sngewtynnatt ne shano ba ki kwah ban leit, hynrei shah ia ki ba kin leit. Ngim kwah ia ki hangne". Kane ka jingong jong ka, ka long kaba palat bad kaba jnang ym tang ia ki nongialam hynrei wat ia u paid babun uba la ialum hangta ban sngap ia ka. Ha kata ka jingfalang ka Indira ka la sngewdom dei na ka daw ki briew kiba la ialum hangta, ki bym ia shahshkor ia ka, hynrei kiba ia kren kai bad kiba ia rkhe taha para ma ki kum ban bein ban khoh ia ka.

Ha ka 6 tarik, shisngi hadien kata ka jingialang paidbah jong ka, sa u JP bad u Jagivan Ram ki la pynlong ia ka jingialang paidbah ha ka juh ka madan. Ki briew ki la wan najan bad na jngai ban kyrshan ia u JP ha kane ka jingpyrshang ban pyniatylli ia ki liang pyrshah. U JP u la pynkut ia kata ka jingialang paidbah kaba dap smam da ki khlieh briew kiba shahshkor dngong da kine ki kyntien : "Ngin donkam ia ki vote bad ia ki no te (Pisa) jong phi ba ngin jop", u la kyrpad ia ki briew.

Ha basdang u Lber, ki jingialap elekshon ki la nang iaaid shaphrang bad ka Indira ka la nang sngewthuh ia ka jingpyrshah ki briew ia ka seng Congress. Kumta dohim dohlap ka la ksaid ban kot sha ka thong ka jingjop. Bunsien ha ka jingialap elekshon ka ju kren pyrshah ba ki pyn-donkam ia ki RSS bad ba ki da angnud ban pynlap noh ia ka. Kumta ka la ktah ia ka jing-sngew ki briew da kaba kdew sha ka niam ruh hateng hateng.

Ha ka konstituensi jong u Bansilal, u myntri iada ri, uba la lehbeifi lehsat labiang ia ki briew ka Haryana bad ka Punjab, da kaba pynshlur ia ka sorkar ban tynruh ha kaba pynduhkhun jubor ia ki, ka Indira ka la ong ia kita ki briew kiba la kylla isih Congress : "To ia klet bad ia map noh" ia kiel kiei kiba ka sorkar jong ka, ka la leh bakla.

Ki duk ki rangli ki ia bat shkor ban ym pynjop shuh ia ka, naba ka banbeifi ia ki. Ki

la shah pyntieng kohtympan kumne ha kito ki Iarmangkalai kiba pyrshah ia ka Indira bad kiba kwah ban pynkiew skong ialade da kaba krenbein krensniew ia ka. Ki Nongtrei sorkar kiba la shemphang, kiba la iohmad hi ia ka jingsynshar jong ka, ki don ia la ka jong ka rai kaba biang eh. Katba ki Nongialam ka liang pyrshah, ki la sei madan ia ki khana shaphang ki kynjri ki phatok. U JP hi, lai sngi shuwa ka jingiathep vote u la ong kumne: "Kane ka dei ka lad kaba khatduh na ka jong phi, lada phi bakla, ki 19 bnai jong ka jingbanbein kin sa kylla long ki 19 snem jong ka jingngiew. Haba ngi duh ia ka jinglaitluid, ngi duh ia kiei baroh", u la pynkut.

Ka sngi u Trai 20 tarik u lber 1977, ka la long ka sngi kaba pyntyndeh dohnud ym tang ia ki kyrtong, hynrei ia ki briew baroh jong ka Ri. Ki result ki la pynlyngngoh ia ki briew baroh, haba iohsngew ba ka seng Congress ka la rem ha bun jaka. Ha ka por shibaje mynstep, ka 21 tarik, ka All India Radio ka la pynbna ba ka Indira Gandhi ka la shah rem ha u Raj Narain jong ka Janata bad ha Amethi pat, u Sanjay ruh u la rem ha u Ravindra Pratap Singh jong ka Janata. 'Ka jingstad jong ki nong India ka paw rasong', la kren ki briew ha man ki dong da ka jingphuhsamrkhie ba katto ka jingbanbein ka la wai.

Ha ki snem 1977 haduh 1980 haba ka Indira ka la shah kynthet na ka bor synshar, baroh ki briew ki la sdang ban burom ieid ia ka na ka daw jong ka jingbym beit ryntih ka synshar ka



khadar hapoh ka sorkar Janata, kaba dap tang da ki jingīashrut ia khwan myntoi shimet bad ki jingpyrshang ban pynsniew dur ia ka da kaba tih ia ki jingsniew baroh ba la wan lyngshop ha ka por jong ka Emergency. Ka sorkar Janata ha ka jaka ban sdang ban trei pyneh rngiew ia ki briew da ki saiñdur kiba thymmai, ka la pynlut pynban ia la ka bor ka sor ha kaba seng ia ki Commision bapher ban wad ia ki dong ban sympat ia ka Indira bad ki nongiatreilang jong ka. Ka Commission kaba kham pawkham ka la long ka Shah Commission kaba kynthup ia u Justice J.C. Shah uba long teng u nongbi-shar ka Supreme Court ban peit ban jngoh bad ban ai kaiphot halor ki jingsniew, ki jingbanbeiñ bad ki jingleh palat paliang jong ka sorkar hapoh ka jingīalam jong ka Indira Gandhi.

Ka Indira ka khlem pynjem ialade hapoh kane ka Commission kaba la mang ban pyntwa ia ka. U Frank Anthony, u muktiar jong ka u la leh katba lah ban iada ia ka.

Ka jinglehbiej bakhraw tam ba ka Sorkar Janata ka la pynpaw, ka long haba u Charan Singh, u Myntri Korbar ri u la hukum ia ka Indira ban shah teh shah khum bad shah set phatok. Ka Indira ka la tyrwa mon ialade ban shah teh hat kheri, khlem kwah iano iano ruh ban bah jamin ia ka, ka la sah ha phatok shimiet. Kane ka jingleit phatok ka la pynpaw shai kdar ia ka mynsiem bashynrang kaba ka ju don bad ia ka jingbiej phngar jong ka Sorkar Janata, kaba la shu pynlut por ha kaba ialeh

para riewdkhot bad da kaba kynnoh sa kynnoh  
ia ki jingleh palat paliang jong ka Indira.  
Palat ia kata, kam shym don ia kino kino ki  
kam kiba kongsan kiba ka la leh.

Ka sorkar Janata ka la kyllon pding khlem  
lah kyrda shuh ha ka bakut u snem 1979.  
La buh ia u Charan Singh ban long kum u  
Myntri Rangbahduh shipor arpor tat haduh ban  
da pynlong biang ia ka Elekshon ha u kylla-  
lyngkot 1980.

Nalor kine ki jingbanbein kiba ka Indira  
ka la ioh na ka Sorkar, ka la mad ruh ia ki  
jingkynteit babun na ki dkhot ka seng Congress,  
kiba la kwah ban shoh pynjem jai ia ki arngut  
ki akhia jong ka, u Bansilal bad u V.C. Shukla  
khamtam, kiba la leh bor palat ha ka por jong  
ka Emergency. Ka Congress ka la pynpaw ia  
ka jingbym hun jong ka ia ki jingleh jong ka  
Indira. Kumta ban iada ialade, ia u khun jong  
ka, u Sanjai bad ia ki nongbud bashisha jong ka,  
ka Indira ka la wanlam biang ia ka jingpait  
jingpra ka party Indian National Congress na  
u snem 1978. Ka la ai kyrteng ia ka Party  
thymmai jong ka, ka Congress (I) kaba mut ka  
Congress jong ka Indira, da ka jingthmu ban  
bat skhem ia ki jingthmu tynrai jong ka Cong-  
ress ba la seng ha u snem 1885.

## LYNNONG

14

### KA RADBAH JONG KA RI

Hadien ba ka la rem ha ka elekshon ha u snem 1977 na Rae Barelli, ka Indira ka la jop pat ha u snem u babud na ka Konstituweni Chigmagalur kaba don ha Karnataka, ha ka bye-elekshon. Kum ka riewdkhot jong ka Lok Sabha, ka la leh thik kum ka nongfalam jong ka liang pyrshah ha kaba uwei na ki nongbud jong ka, u C.M. Stephen u la long u nongfalam. Ka Indira da kaba ym pynsngew ia ki jingleh-biej jong ka Janata, ka la pdiang ia ki nong-kitktien sorkar na ki ri bapher, ka phah kyr-woh sngewlem haba don ki jingjia basngewsih shano shano. Haba lyngshop ki lanot ha ki bynta bapher jong ka Ri kum ka jingshlei um, ka leit jngoh ia kita ki jaka marmet hi, katba u Morarji Desai pat uba long u Myntri Rangbahduh ha kata ka por, um ju leh ia kine kiei kiei kiba ktah ia ka 'matlong ka long-briew manbriew.

U Morarji Desai, u Nongfalam ka sorkar Janata u la ieb kam noh ha u Jylliew 14 tarik 1979, shuwa ka jinglapyni ia ka jingbunkhlieh ha ka Dorbar Thawaii Parliament. Da ka jing-toh kam noh jong u kumno, u President u la wer ia u Charan Singh ban long kum u Myntri-

**Rangbahduh shipor arpor tat haduh ban da long Elekshon.**

**Ha kata ka jingjied riewdkhot sha ka Lok Sabha kaba la pynlong ha u Kyllalyngkot 1980, ka Congress (I) hapoh ka jinglalam batbit jong ka Indira Gandhi, ka la plung biang da kaba ioh 352 na ka 542 khlieh—kaba mut 64.94%. Ha kane ka sien u Sanjay ruh u la jop na Amethi da kaba wanlam ia ki rangsamla babun sha ka Dorbar Thawaiñ kum ki nongshakri-Ri.**

**İa ka Indira la jied kum ka Nonglalam jong ka Congress (I) Parliamentary Party bad ka la shimti ia ka kam Myntri Rangbahduh ha u juh hi u bnai. İa u Sanjay la kyntiew sha ka rynsan General Secretary ha u Jylliew 1980. Une u samla u la khlad noh shiphew sngi hadien kata, na ka jingbthei bad ka jingpluh jong ka liengsuiñ ha kaba u la shong. Da ka jingkhlad noh jong u Sanjay, u Rajiv u la mih pli ia la u para da kaba jop ha ka bye-election na ka Amethi Konstituensi. La pynsmai ia u kum u riewdkhot ka Lok Sabha ha u Nailar 17 tarik 1981, bad ha u Rymphang 17 tarik 1983, la kyntiew ia u sha ka kyrdan kum uwei na ki hynriew ngut ki General Secretary jong ka seng Congress (I).**

**Ki jingkit ki la long kiba khia haba ka Indira Gandhi ka la shimti ia ka kam Myntri Rangbahduh ha kane ka khep. Hynrei yn ym don ba lah ban kyrngah ba kane ka la long ka juk-ksiar jong ka jingim jong ka. To ngin ia jngoh ia kita ki jingjia.**



Ka Jingkhihwin ha Assam ka la sdang naduh u snem 1979 na ka jingpynlong ia ka bye-election sha ka Konstituensi Mongaldai, ha kaba ki nongfalam ka All Assam Student Union (A.A.S.U.) ki la shem ba don bun ki kyrteng jong ki mynder ha ka lis ki nongthep vote ki ba shu wan poi ei na Bangladesh. Kumta ki la kyntu ia ka sorkar ba ka dei ban weng noh shi-syndon ia ki bad ban phai pat sha ka lis ki kyrteng jong ki nongthep vote u snem 1961. Kane ka jingkwah jong ka All Assam Student Union ka la ktik ia ki nong Assam baroh ban pynkhuid noh ia kata ka jyrseh-Bangla ioh ka bam kruiñ ia ka dong baroh kawei. Na kane ka phang la mih ki jingleh bor ha bun ki thaiñ jong ka ri Assam kaba la lam sha ka jinglaumsnam kaba shyrkhei ha ki bynta bapher, khamtam eh ha Nellie ha kaba la kulmar kulwit ka ri India baroh kawei. Ka Indira ka la plie ia ki lad ki lynti ban ia kren da kaba sngewtnuh bad ki nongfalam ka A.A.S.U., da kaba ia mir jingmut bad ki, ka la kloi wat ban ker kyn-roh ia u pud u sam baroh hapdeng ka Bangladesh bad ka India.

Nalor ka Assam la khie sa ka jinglaleh ha ki thaiñ Punjab. Ki daw kiba la wanlam ia kat kane ka saja ka la sdang da ka jingdawa jong ka Punjab ban ioh ia ka Chandigarh kaba long ka nongbah jong ka Punjab bad ka Haryana ba kan long noh tang ka bynta jong ka Punjab. Na kane ka jinglakajia majia kalor ka khyndew, la mih sa ka jinglakynad ha kaba sam ia ka um jong ka Punjab na ka bynta ka

thung ka tep. Nalor kata, ka jingpynkhyllem noh ia ka sorkar jylla jong ka seng Akali Dal ha u Risaw 1983, ka la pyn jylliew shuh shuh ia ka jingīapher jingmut hapdeng ka sorkar kmie bad ki nongīalam ka Punjab. Kaba kham sniew shuh shuh ka la long ka jingīamilai lang ia ka Saiñ hima sima bad ka Niam. Na ka jingīathut ha ka saiñ hima sima, ki nongīalam ka Akali Dal ki la wanlam sa ia ka niam. Dei namar kata ka daw ba bun ki Sikh bad ki Hindu ki la ia mynsaw bad ia iap. Ka jinglum tiar ialeh ha ka ĩingkhuid ĩingkyntang jong ki Sikh ha Golden Temple (Amritsar), bad ka jinghikai ia ki samla ban pyndonkam ia ki tiar ki tar ban siat pynīap ka la pyntroiñ shuh shuh ia ka jingīapher jingmut hapdeng ka Sorkar bad ki nongīalam ka Akali Dal. Shen ha ka dongdit jong ki sikh la mih sa u Bhindrawale, uba kyang ba ka Punjab ka dei ban ioh noh hi ia la ka jong ka Ri kaba laitluid na ka India. Kane ka long kaei kaei ba ka sorkar India kam lah ban shu sngap jar, naba ka long kaba pyrshah ia ka riti-synshar. Ki Punjabi (Ki sikh) ki la ia pyrta ba ki dei ban ioh noh la ka jong ka ri kaba ki la jer kyrteng ka Khalistan. Da kata ka jingthmu ki la pynmih ia la kf jong ki pisa, ki passport, ki stamp bad kiwei de ki jnit ki jnat. Ha ka ĩingkhuid ĩingkyntang jong ki pat, u Bhindrawale u la nang lum ia ki mar ialeh bad u la nang kynton ia ki kut iada da ka jingthmu ban ialeh pyrshah ia ka India

Ha ka 3 tarik u Jylliew 1984, ka Indira ka la phah ia ki shipai ban rung sha kata ka ĩing-

khuid ĩingkyntang. ĩa kata ka jingleit rung ki shipai sha kata ka jaka la khot ka Operation Blue Star. Ka Indira hi ka la ong "Kaei kaba pynpangnud eh ĩa ngi ka long ba ki jaka-khuid jaka-kyntang ha Punjab ki la kylla long ka ktem buh tiar ĩaleh, ka jaka rieh tngen ki briew kiba ka aiñ ka dawa . . . .". Ka jingĩaleh hapdeng ki shipai bad ki lehnoh ka la neh da ki khyn-diat sngi. Ha ka 6 tarik, ki Shipai India ki la jop bad ki la rung sha kata ka ĩing-khuid ĩingkyntang kaba la jot bad la sniew dur ha ki kuli bad ki tup ki man. Ha kata ka jingĩaleh bashyrkhei bun bun ngut ki la ĩap, napdeng kita la don u Nongĩalam ki lehnoh, u Bhindrawale, u President ka seng be-aiñ ka All India Sikh Student Federation - u Bhai Amrik Singh bad u nonghikai ĩa kita ki lehnoh u Major General Shuhbeg Singh uba la shongthait na ka kam shipai, bad kiwei pat.

Da kaba phah rung ĩa ki shipai sha ka Golden Temple, ka Indira Gandhi ka la tip shai ba ka la soi ĩa ka rai ba ka dei ban aiti noh ĩa la ka jingim ha kawei ka sngi. Khlem khaweit ka la ĩaid shaphrang. Haba ki nongai-buit jong ka ki la ong ba dei ban weng noh ĩa ki sikh kiba trei ha ĩing jong ka, ka Indira ka la kyntait ĩa kata da kaba ong ba lada ka weng noh ĩa ki, ka pynpaw ba kam shaniah ĩa ki Sikh, kiba long ki briew kiba bha lait noh ki lehnoh kiba shu leh bor khlem pyrkhat.

Nalor ba ka Indira ka dei ban ñakynduh ña kat kine ki jhan ha ka Ri, ka la lah pat ruh ban kyntiew ña kiwei pat ki dor hakhmat jong ka pyrthei.

Da ka jingshynrang mynsiem ka la pdiang ña ka IX ASIAN GAMES ha Delhi. Da ki jingpynkhreh kiba sani bad kiba la nam pyrthei, kane ka lypung ñalehkai ki Nong Asia kaba la pynlong ha u Naiwieng 1982, ka la pynkup ha ka ña ka nam kaba ka shonghok ban ñoh ka *Gold Order of the International Olympic Council* ha u snem 1983.

Ha u Naiwieng 1983 pat, ka Indira ka la kyntiew shuh shuh ña ka maiñ jong ka Ri da kaba pdiang ban pynlong ña ka jingñalang ka *Common-Wealth Heads of States* ha Delhi. La bun ki kynrum kynram ha ki thainñ Delhi ka la peit la jngoh ba kita ki nongleit nongwan kin suk, kin shngaiñ bad kin bit kin biang ha ka jingshong jingsah jong ki ha ka Ri. Shuwa kata, ha u lber jong u snem 1983, haba la pynlong ña ka jingñalang pyllun ka *Non Aligned Movement* (Ki seng bym ña shah liang) ha Delhi, la jied ña ka kum ka shongknor. Kane ka la long ka burom bakhraw na ka bynta ka Ri baroh kawei. Kum ka shongknor jong kane ka seng, ka Indira ka la loh lad ban pynskhem shuh shuh ña ka jingangnud jong ka ban leng ñaleh pyrshah ña ka jingñiewbeifi namar ka rong sniehdoh, ka jingwanlam ña ka jingsngewthuh jingmut ha la ri bad ha ki ri bapher jong ka pyrthei, bad kaba am pyrshah ña kito ki ri kiba lehbor halor ki ri

kiba khamrit. Kum ka shongknor jong kane ka seng, ka la leit sha ka United Nations ban kren pyrshah ia ki jingiakynnton tiar thma ha ri sepngi bad ban kyntu ia ki artylli ki Ri barad-bah ka America bad ka Soviet Union ban poi sha ka jingiasngewthuh jingmut.

U snem 1984 u la long u snem jong ki jingjia bapher ha ka Ri. Kawei ka long ka jingladei hpdeng ka sorkar kmie bad ki sorkar jylla. Kane ka jingiakhing ka la kham san kham ih hadien ka jingshabhehkam noh jong u N.T. Rama Rao na ka shuki Myntri Rangbah ka jylla Andhra Pradesh ha u Nailar 16 tarik 1984. Ka jingiakhih shityllup ka Ri, ka jingiehkam noh jong u Lat, uba kyrteng u Ramlal, bad ka jingwanphai biang jong u sha ka shuki Myntri Rangbah ka jylla, 32 sngi hadien, ka la pynsniew dur khait ia ka rukom synshar paidbah ha India. Ka Indira kum ka Myntri Rangbahduh jong ka Ri, ka la ong ba kam don kti don kjat eiei ha kata ka jingbehkam noh ia u Rama Rao, hynrei ki bor kiba ap kmang tang ban pynkhyllem ia ka, ki la shim ia kane ka kabu ban kawang ktieh ia ka longbjiew bad ka rukom synshar khadar jong ka. Ka Indira hi ka la ong kumne shaphang ki liang pyrshah ha ka 8 tarik u risaw: "Ngi kwah ba ka liang pyrshah kan long kaba khlaif bad ngim kwah ba kan ym don ia ka jingpyrshah ia ngi, hynrei ngim lah ban klet ia ka kamram jong ngi ia la ka Ri. Ngi dei ban iatreilang kawei haba don ki jing-sniew jingma kiba pynthut ia ka jinglong kawei bad ka jingiar ka ri jong ngi".

Ha Bombay ha u risaw 8 tarik, haba ka Indira ka dang kren paidbah ia ki ophisar ki shipai madan, ki shipai suiñ bad ki shipai duriaw, ka la ong, "Ngim long kiba riwspah hynrei ngi long kiba ieid ia ka jingsuk". Kane ka la long kum ka jingkren khatduh jong ka ia ka ri baroh kawei ruh. Da kine ki kyntien ka la kren lyngkot shaphang ki jinglah-jinglai bad ki jingpyrshang jong ka da ki bun bun snem kum ka Myntri Rangbahduh kaba ialam ia ka Ri kaba kum ka jong ngi. Ka Indira ka khlem lah ban weng ia ka jingduk-khai, hynrei ka la pyrshang ban bsut ha ka Ri bad ka pyrthei ruh ia ka jingsuk bad ka jingshngaiñ.

Ha ka 9 tarik u juh u bnai, ka Indira ka la kyntu ia ki khun ka Ri ban wad ia ki khuiñ ka jingsuk jingsaiñ, ym ha ki nongialam pyrthei kiba shu paw ngut nget ha ka dongdit jong ka ri, hynrei ban wad bor na ki Rishot-Blei ka histori jong ka pyrthei. Ka la ong : "U Buddha bad u Mahavira, u Lao Tse bad u Confucius, u Zarathustra bad u Socrates, u Jisu Krist, u Prophet Mohammed bad u Guru Nanakji ki la ai ha ngi ia ki kyrwoh ( Messeges ) bym lah ban duh. Nalor ba ngi don ia kine ki khuiñ bakor-dor, peit dang jia aiu ha kane ka pyrthei jong ngi mynta ?".

Ha ka 17 tarik ha Patna, ka la pynkynmaw biang ia ki Nong India baroh ba ka jingdonkam jong ka mynta jong ka Ri ka long ka jinglatylli lang kawei. Ka la kyntu ba kum ki nong India ngi dei ban tep noh ia ki jingsngew iapher na

ka daw ka miam ne ka ktien ka thylliej. Ka Indira hi ka la ong : "La ngi don ia ka kynhun shipai kaba khlaifi kaba lah ban iakynduh bad kino kino kijingma kiba na shabar ri, ki briew ki dei ban long barabor kiba la khreh ban iakynduh bad kino kino ki jingma kiba mih na ka Ri hi".

Ha ka 30 tarik, ka sngi bakhatduh jong ka jingim jong ka, ka Indira ka la don ha Bhuvaneshwar. Ha ka por mynsngi, ka la bam la dih bad ki shipai da ka jingsuk mynsiem. Ka la kyntu ia ki ban long kiba shlur bad kiba kloi ban aiti mon falade na ka bynta la ka jong ka Ri. Ha ka jingialang paidbah bakhatduh jong ka ha kata ka janmiet, ka la kren da ka jingshynrang mynsiem bad ka jingsngewsarong ban knia falade ha ka duwan jong ka Ri. Ka la ong : "Lada nga iap noh mynta ka sngi, man la i synjaw snam jong nga in sa ai bor ai sor shuh shuh ia ka Ri", ka la kren kum ka briew kaba shu don ia ka jingsngewthuh ba kan ym im slem shuh, hynrei ba kan sa dei ban aiti ia la ka jingim ban tei ia ka Ri. Halor kane ka phang ka la ban ar sien laisien bad ha kaba khatduh ka la pynkut "hynrei ngam tieng ia kine kiei kiei. Ngam sngeweiei lada nga dei wat ban aiti noh ia la ka jingim ha kaba shakri ia ka Ri". Kane ka jingong jong ka, ka la urlong ha ka step kaba bud.

Ka Indira Gandhi kam don shuh, hynrei ka Indira Gandhi ka im junom. Ki kuli jong ki lehnok ki la khang khyrdep ia u thylliej jong

ka, hynrei ki la plie wang ia ka sur jong ka sha man ki dong jong ka Ri bad ka pyrtnei shi-tyllup. Haba ka dang im bun kiba la shu iaroh ia ka khlem pynpaw, mynta haba kam don shuh ka loh ia ka jingiaroh kaba dei ka hok jong ka wat na ki rymmiang shyntur jong kito kibym shym shlan katba ka dang im. U Jawaharlal Nehru u la btin ia ka Ri badang khunlung bad ka Indira pat ka la pynsan pynrangbah bad pynstad pynnang ia ka khlem tyngkai ialade. Ia u Mahatma Gandhi ngi dang kynmaw pyrto kum "u Kpa ka jaitbynriew", nga sngew ba kam long kaba duna ba ngin nam ia ka Indira Gandhi pat kum "Ka kmie jong ka jaitbynriew bad ka nongtei ia ka India kaba thymmai."





## **KI PAR JINGTIP**

### **( Bibliography )**

#### **Ki Kot**

1. Abbas, K. A., THAT WOMAN-Indira Gandhi's Seven years in power.
2. Abbas, K. A., THE RETURN OF THE RED ROSE.
3. Bhargava, G.S., MORARJI DESAI Prime Minister of India.
4. Bose, John Dayal, Ajoy, THE SHAH COMMISSION BEGINS.
5. Mankekar, D.H., LAL BAHADUR (A political biography).
6. Mankekar, D.R. Mankekar, DECLINE AND FALL OF INDIRA GANDHI.
7. Masani, Zareer, INDIRA GANDHI (A Biography)
8. Mehta, Ved, MAHATMA GANDHI and HIS APOSTLES.
9. Nehru, Jawaharlal, GLIMSES OF WORLD HISTORY.
10. Nehru, Jawaharlal, LETTERS FROM A FATHER TO A DAUGHTER:
11. Sahni, Naresh Chander, INDIRA (A Study).
12. Scarfe, Allan and Wendy, J.P. (HIS BIOGRAPHY):
13. Singh, S. Nihal, MY INDIA.
14. Vasudev, Uma, TWO FACES OF INDIRA GANDHI:

**Ki Makasín**

1. Career and Competition Times (New Delhi)
2. Competition Refresher (Delhi)
3. Competition and Job aid (New Delhi)
4. Competition Success Review (New Delhi)
5. Frontline (Madras)
6. Home Life (Bombay)
7. Illustrated weekly (Bombay)
8. India Today (New Delhi)
9. Sunday (Calcutta)
10. The Teenager (Allahabad)
11. The Week (Kerala)
12. Weekend Review (New Delhi)

**Ki Kot Khubor**

1. Amrita Bazar Patrika (Calcutta)
2. Assam Tribune (Guwahati)
3. Sentinel (Guwahati)
4. Statesman (Calcutta)
5. Telegraph (Calcutta)

**CHECKED**

State Central Library  
Shillong



---

*La shon ha SCORPIO PRINTERS Mawkhar,  
Main Road Shillong.*

---